

HECHOS

Jesucristopa Jirit'eradaarãpa

Oodap'edaa

San Lucapa na historia p'ãji. Irua pedee pia p'ãda ome oodak'a p'ã pëiji ichi k'öp'ãyo Teofilomaa, nepiri aupait'ee Jesús bapata mãik'aapa ichideerã p'anapatap'edaa iru it'aa wãda t'ëepai. Na p'ãdade Lucapa jara bi Ak'õre Jaure chep'eda, sãga Jesude ijãapataarãpa iru ùraa jaratee wãpachida judiorãmaa mãik'aapa judio-eerãmaa paara. Audú jara bi Jesús ome nipapatap'edaarã p'anapata mãik'aapa Pablo bapata.

Naapiara jara bi Jesús it'aa wãda chi k'öp'ãyoorã taide mãik'aapa angeleerãpa iru waya cheit'eeda adap'edaa (cap. 1.1-11). Jara bi Matías jirit'eradap'edaa Judas Iscariote pari (cap. 1.12-26); Tachi Ak'õre Jaure ba cheda Jesude ijãapataarã ome mãik'aapa ãrapa jarateedap'edaa judiorã t'ãide (cap. 2); Pedro Juan ome jaratee nipapata (caps. 3.1-4.31); Cristode ijãapataarã p'anapatap'edaa (caps. 4.32-5.11) mãik'aapa irua jirit'eradaarã carcelde t'i nĩbidap'edaa (cap. 5.12-42); siete k'aripapataarã bidap'edaa (cap. 6.1-7); Esteban jita atadap'edaa mãik'aapa peedap'edaa (caps. 6.8-7.60); ijãapataarã erreudap'edaa Israel eujã jõmaade mãik'aapa Felipepa jaratee nipapata (cap. 8.1-40); Saulo Jesude ijãa beeda (cap. 9.1-31); Pedropa jaratee nipapata (caps. 9.32-11.18); judio-eerã chip'epatap'edaa Antioquía p'uurude (cap. 11.19-30); Herodepa ooda mãik'aapa piuda

(cap. 12); Pablo naapiara wāda Jesús ũraa jarateede judio-eerāmaa (caps. 13.1–14.28); ijāapataarā poro waibiara chip'edaidap'edaa Jerusalende (cap. 15.1–35); Pablo waya wāda judio-eerāmaa jarateede (caps. 15.36–18.22); Pablo t'ēpai wāda judio-eerāmaa (caps. 18.23–21.16) māik'aapa ijāadak'aa beerāpa Pablo carcelde t'i nībidap'edaa Jesude ijāa bada k'aurepa (caps. 21.17–28.31).

Tachi Ak'ōrepa jarada ichi Jaure pēit'ee

¹ Teófilo, naapiara k'art'a p'ādade pīmaa mia p'āji Jesupa ne-inaa ooda māik'aapa jarateeda it'aa wārumaa.

² Wāi naaweda, Ak'ōre Jaure k'ap'ia pari jaraji ichia jirit'eradaarāmaa k'āata oopataadait'ee.

³ Piuda t'ēpai chi k'ōp'āyoorāmaa cheji māik'aapa unupiji wāara ichi chok'ai bi. K'āima cuarenta wāyaru misa, ichi k'ap'ia unupipachi māik'aapa jarateepachi Tachi Ak'ōrepa oopi k'inia bi ichide ijāapataarāmaa.

⁴ Ewari aba chi k'ōp'āyoorā ome bak'āri, māgaji:
—Wānaadapāde aji, Jerusalendeepa awara āyaa. Nīdapāde aji, mi Ak'ōrepa jarada oorumaa, mia parāmaa jaradak'a ooit'ee perā.

⁵ Juan Bautistapa poro choopachi paniapa. Mamīda taarā-e Tachi Ak'ōrepa ichi Jaure ba chep-iit'ee parā k'ap'ide.

Jesús it'aa wāda

⁶ Ma t'ēpai Olivo Eede p'anadak'āri, Jesús k'ōp'āyoorāpa iidijida:

—Tachi Waibia, ¿řraweda Israel pidaarã p'uuru waibia papiit'eek'ã ajida, ai naawedapemak'a, chĩara jua ek'ari p'anada-ee?

⁷ Irua p'anauji:

—Parãpa k'awadaik'araa bida aji, sãapai Tachi Ak'õrepa ne-inaa ooit'ee, parã-it'ee-e perã. Irua aupaita mãgee net'aa k'awa bi.

⁸ Mamĩda Tachi Ak'õre Jaure parã ome ba chek'ãri, ichia k'aripait'ee nejõmaata oodamerã Ak'õrepa oopi k'inia bik'a. K'awapiit'eeda aji, jõmaweda mia ooda eperãarã k'aripait'ee, parãpa jarateenadamerã Jerusalén p'uurude, Judea eujãde, Samaria eujãde, awaraa eujã t'imí beede paara.

⁹ Mãga jarap'eda, Tachi Ak'õrepa iru it'aa ateeji. ãchia ak'i jõnide jřararade t'ĩudachi mãik'aapa waa unuda-e paji.

¹⁰ Mãgá it'aa ak'i jõni misa, angeleerã omé ãchi ik'aawa bainĩ p'ana chejida. P'aru t'o-t'oo jĩ p'anajida.

¹¹ Mãirãpa mãgajida:

—Galilea pidaarã, ¿sãap'eda it'aa ak'i jõnima? ajida. Jãgí Jesús parã ome bada mãik'aapa it'aa wãda waya cheit'eeda ajida, parãpa iru it'aa wãru unudap'edaak'a.

Matías jirit'eradap'edaa Judas Iscariote pari

¹² Maap'eda Olivo Eedeepa Jesús ome nipap-atap'edaarã waya chejida Jerusalendee. ĩpata ewate paji mãik'aapa ãchi ũraade jara bi ma ewate t'imí wãdaik'araa bi. Mamĩda t'imia-e bada perã, chejida.

13 P'uurude panadak'ãri, wãjida ãchi p'anapatap'edaamaa it'ipema pisode. Ma chedap'edaarã paji Pedro, Juan, Santiago, Andrés, Felipe, Tomás, Bartolomé, Mateo, Alfeo warra Santiago, Simón Celote apatap'edaa mãik'aapa Santiago warra Judas.

14 Mama ãchi it'aa t'ĩpachida Jesús ïpemaarã ome mãik'aapa Jesús nawe María ome, ichiaba awaraa wëraarã ome.

15 Ewari aba Jesucristode ijãapataarã ciento veinte see nĩbide Pedro bainĩ beeji mãik'aapa mågaji:

16 —Ïpemaarã Cristo k'aurepa, chonaarãweda Ak'õre Jaurepa jarajida aji, Rey David it'aideepa eperã abaapa Jesús peepiit'ee. Mãga jara bi Tachi Ak'õre Ñraa p'ãdade. Íra Davidpa jaradak'a uchiaji Judas ome.

17 Judas tachi k'õp'ãyo paji mãik'aapa tachi ome auk'a mimiapachi.

18 Mamĩda k'achia ooda pari p'arat'a p'aadap'edaapa irua eujã neto ataji. Mama iru baaidachi mãik'aapa chi jĩsi chedachi.

19 Jerusalende p'anapatap'edaarãpa iru piuda k'awaadak'ãri, ma eujã t'ĩ bijida *Hacéldama*, ãchi pedeede jara k'inia bi “Waa Eujã”.

20 Mãga p'asada perã Judas ome, awaraa jiridaipia bi iru mimia oomerã. Mãga oodaipia bi Tachi Ak'õre Ñraa p'ãdadepema Salmode jara bairã:

‘Pĩ tede apida p'anada-e. Mapa ichita te tuma
bait'ee.’ (Sal 69.25)

mãik'aapa awara ãi ichiaba jara bairã:

‘Awaraapa pi mimia atait'ee.’ (Sal 109.8)

21 'Nama p'anida aji, eperãarã tachi ome nipap-atap'edaarã, Jesús tachi ome niparu weda.

22 Juan Bautistapa iru poro choodak'ãriipa it'aa wãrumaa mãgá nipapachida. Judas pari ãchidepema jiridaipia bi aba tachi ome auk'a Jesús unuda chok'ai p'irabaip'eda.

23 Mãpai madepema omé jirijida aba jirit'eradait'ee. Aba paji José. Mãgí ichiaba t'ijarapachida Barsabás, maa-e pirã Justo. Chi apema t'ijarapachida Matías.

24 Ma omé jiridap'eda, it'aa t'ijida:

—Tachi Waibia, pia jõmaarã t'ãri k'awa bida ajida. Maperã k'awapíji na omeedepema k'aita pia k'inia bi.

25 Mãgipa pi ùraa jarateenait'eeda aji, Judas pari, irua k'achia ooda k'aurepa ichi wãit'ee padamaa wãda perã.

26 Mãga it'aa t'idap'eda, suerte jemenejida jirit'eradait'ee. Mãpai Matiata uchijaji. Ma ewate weda apemaarã once Cristopa jirit'eradaarã ome mimiamaa beiji.

2

Tachi Ak'õre Jaure cheda

1 Jerusalén p'uurude Pentecostés fiesta ewate pak'ãri, jõmaweda Cristode ijãapataarã abaamaa see nĩbaji.

2 Mãga nide nãumia pururua jĩwaaparik'a ùrijida it'ariipa cheru ãchimaa.

3 Mãpai unujida t'ipitauk'a jẽrajẽraa cheru ãchi írĩ. Maap'eda ãchi chaachaa írĩ urua jẽrajẽraa nĩbeeji.

4 Jōmaweda Ak'ōre Jaure ome p'aneejida m̄aik'aapa Ak'ōre Jaurepa pedeeji ichia k'inia badak'a. Pedeechida āchia ai naaweda k'awada-e p'anadap'edaa pedeede.

5 Maapai Jerusalende p'anajida judiorā Tachi Ak'ōrede ijāpataarā fiesta-it'ee chedap'edaarā awara āiipa.

6 Āchia m̄āgí nāu pururua jīwaaparik'a ūridak'āri, jōmaweda seedachida ma ciento veinte ijāpataarā p'anadap'edaamāi. K'awadak'aa paji k'āata k'īsiadai, ūripachida perā āchi t'odap'edaa pedeede.

7 Mapa āchi ak'itrua para beejī m̄aik'aapa māgapachida:

—¿Jōmaweda na eperāarā pedee para bi Galilead-epemaarā-ek'ā?

8 ¿Sāgapi k'īra t'ādoō pedee para bima ajida, eperāarā nama para bi pedee chaa?

9 Nama eperāarā p'ani Partia, Media, Elam, Mesopotamia, Judea, Capadocia, Ponto m̄aik'aapa Ásia eujādepemaarā.

10 Ma awara chejida Frigiadepemaarā, Panfiliadepemaarā, Egiptodepemaarā, ichiaba Libiade-pemaarā Cirene p'uuru k'ait'a p'anapataarā. Ichiaba Roma p'uurudepemaarā ūk'uru chejida.

11 Judiorā ūk'uru māga t'odap'edaa perā m̄aik'aapa ūk'uru judiorā pak'oodaidaarā, judiorā ūraade ijādap'edaa perā. Ichiaba chejida Creta isladepemaarā m̄aik'aapa Arabia eujādepemaarā. Nāgīrā Galilea eujādepemaarā mīda, tachi chaachaa t'odap'edaa pedeede tachia ūri p'anida ajida. Āchia pedee para bida ajida, jaradait'ee Tachi Ak'ōrepa ne-inaa pia ooda.

12 Māgá āchi t'odap'edaa pedeede ūridap'edaa perā, jōmaarāta ak'itrua para beeji māik'aapa k'awadak'aa paji k'āata k'īsiadai. Āchi pitapai māgapachida:

—Na ¿k'āata jara k'inia bima? apachida.

13 Mamīda ūk'uru, chīara oo k'iniapa, māgapachida:

—¡Vinopata piu para bi! ¡Mapa pariatua pedee p'anida! apachida.

*Pedropa jarada Jerusalende
p'anadap'edaarāmaa*

14 Māpai Pedro, it'a ak'inī beep'eda chi k'ōp'āyoorā once ome, golpe pedeeji:

—Tachi auk'aarā māik'aapa jōmaweda nama Jerusalende p'anārā, mia jararu pia ūriti.

15 At'āri tap'eda nībairā tai vinopa piuda-e p'anida aji, parāpa k'īsia p'anik'a. Parāpa pia k'awa p'ani tai judiorā tap'eda weda todak'aa.

16 Parāpa nama unu p'ani chonaarāwedapema Ak'ōre pedee jarapari Joelpa nāga jaradak'a:

17 'Tachi Ak'ōrepa jara bi: Na ewari na eujā jōi naaweda, eperāarā chok'araarāmaa mi Jaure pēit'eeda aji. Parā warrarā māik'aapa parā k'aurāpa jaradait'ee mia jarapiruk'a. K'ūtrāarāpa k'āimok'araa pik'a bide mia ooru unudait'ee māik'aapa chonaarā k'āimok'araadait'ee mi ome.

18 Wāara, maapai mia oopi bik'a oopataarāmaa mi Jaure pēit'ee; imik'īraarāmaa, wēraarāmaa auk'a. Mia ooru ārapa jarapataadait'ee.

19 Pajāde māik'aapa eujāde ne-inaa eperāarāpa waide unudak'aa unupiit'ee: waa, t'ipitau māik'aapa nari jīrak'awaa nībi.

20 Ak'ōrejīru k'īidariit'ee māik'aapa atane k'īra p'oree waak'a padariit'ee. Māgá pait'ee Ak'ōre ewari waibia ewate, na eujā jōi naaweda.

21 Mamīda ai naaweda Tachi Ak'ōrepa ichimaa chupiria iidirutaarā k'aripa atait'eeda aji, atua-naadamerā. *(Jl 2.28-32)*

22 Māpai Pedropa māgaji:

—K'awa p'anida aji, Joelpa jaradak'a wāara uchiaru idi, Tachi Ak'ōrepa ichi Jaure taimaa pēida perā. Israel pidaarā, ūriti mia jararu. Tachi Ak'ōrepa Jesús Nazaretdepema pēiji tachi t'āide. Māga k'awa p'ani Tachi Ak'ōrepa irumaa oopipachi perā ne-inaa eperāarāpa p'oyaa oodak'aa.

23 Mamīda Tachi Ak'ōrepa k'īsia iru badak'a, parāpa iru jita atadachida, maap'eda ijāadak'aa beerāmaa peepijida. Māirāpa kurusode baijira bijida mama piumerā.

24 Mamīda Tachi Ak'ōrepa chok'ai p'irabai ataji. Māgá chok'ai p'irabai atada perā, waa piu-e; ichita chok'ai bait'ee.

25 Chonaarāweda Tachi Ak'ōrepa Jesús ome ooit'ee bada jaraji Rey David it'aideepa:

'Ichita mi Ak'ōre Waibia unupachida aji, mi k'īrapite. Ichi mi ome bairā, maarepida mi waawee-e.

26 Mapa mi t'āri o-īa nībi, māik'aapa k'ari k'inia bi, k'awa bairā Tachi Ak'ōrepa mi k'aripapari.

27 Ak'ōre, pia mi k'ap'ia beraupi-e pait'ee mi iarutamāi, mia oopari perā pia oopi bik'a.

28 Ak'õre eujãdee wãpari o mĩmaa ak'ipiji. Mapa mi o-ĩa bait'eeda aji, pi k'ĩrapite.' (Sal 16.8-11)

29 Maap'eda Pedropa mãgaji:

—Tachi auk'aarã nama see nĩbi, ũrĩti. Tachi chonaarãwedapema Rey David jai-idaaji mãik'aapa iajida. Iru k'ap'ia at'ãri jãirade bi tachi t'ãide.

30 K'awa p'ani David chok'ai bak'ãri, Ak'õre pedee jarapari paji. Mapa irua k'awa baji Tachi Ak'õrepa jarada irumaa, irudeepa rey uchiapiit'ee.

31 Mãgá, wãara Davidpa unu pik'aji mãik'aapa jaraji sãga Cristo p'irabaiit'ee iru iadap'edaamãiipa mãik'aapa iru k'ap'ia berau-e pait'ee.

32 K'awa p'ani na pedee Jesudeta jara bi, Tachi Ak'õrepa iru p'irabai atada perã mãik'aapa taipa unudap'edaa perã.

33 Tachi Ak'õrepa iru it'aa ateeji ichi juaraare ak'i banamerã. Maap'eda ichia jaradak'a ichi Jaure teeji Jesumaa, irua pëimerã irude ijãapataarãmaa. Mãgita parãpa et'ewa unujida mãik'aapa ũrijida.

34 Tachi Ak'õrepa Rey David k'ap'ia piuda chok'ai p'irabaipi-e paji it'aa ateeit'ee. Mamĩda Davidpa jaraji:

'Tachi Ak'õrepa jaraji Tachi Waibiaamaa: "Pi mi ome auk'a waibia bairã, su-ak'i beepáde aji, mi juaraare,

35 mia pi k'ĩra unuamaa iru p'anapataarã p'oyaaru misa." ' (Sal 110.1)

36 'Israel pidaarã, pia k'awáati mãgĩ Jesús parãpa kurusode peepidap'edaa Tachi Ak'õrepa Tachi Waibia papiji. Iruta Tachi Ak'õrepa pëijida aji, tachi rey pamerã.

37 Māga ũridak'āri, arii p'anadap'edaarā k'ĩsia p'uadachida. Mapa iidijida Pedromaa māik'aapa chi k'ōp'āyoorāmaa:

—¿K'āata oodayama ajida, taipa?

38 Pedropa p'anauji:

—P'ek'au k'achia oo amáati, Tachi Ak'ōrepa parā p'ek'au k'achia wēpapik'oomerā māik'aapa Jesu-cristo t'ide poro choopíti. Māga ooruta pirā, Ak'ōrepa ichi Jaure pēiit'ee parā ome bapariimerā.

39 Māgí jarada parā-it'ee aupai-eda aji; ichiaba pāchi warrarā-it'ee māik'aapa t'imí p'anīrā-it'ee; pia jarait'eera, Tachi Ak'ōre Waibiapa ichi odee atee k'inia biirā-it'ee.

40 Māgí pedee jōma jarap'eda, Pedropa ũraaji:

—P'ananáati Jesús peedap'edaarāk'a; jīp'a ijāati māik'aapa óoti Tachi Ak'ōrepa oopi bik'a.

41 Ma ewate weda Pedro pedee ijāadap'edaarāpa poro choopijida māik'aapa apemaarā Cristode ijāapataarā ome t'īujida. Ma ijāadap'edaarā Pedro k'aurepa eperāarā tres mil paji.

42 Mamāik'aapa āchia ũri k'inia p'anapachida Cristopa jirit'eradaarāpa jarateepata māik'aapa jedepachida āchia ne-inaa iru bee. Ichiaba jōmaweda cheepurupachida it'aa t'īdait'ee māik'aapa ne-inaa jedek'odait'ee, māgá k'irāpadait'ee Cristo piuda āchi pari.

Chi naa ijāadap'edaarā

43 Maapai eperāarā p'era pik'a para bapachi, Tachi Ak'ōrepa oopipachi perā Cristopa jirit'eradaarāmaa ne-inaa eperāarāpa p'oyaa oodak'aa.

44 Ma awara Cristode ijãapataarã chik'inia para bapachi mãik'aapa chi wêe beerãmaa ãchi ne-inaa jedepachida.

45 Pia jarait'eera, netopachida ãchi net'aa iru p'ani mãik'aapa ma p'arat'a t'oopachida teedait'ee chi wêe beerãmaa.

46 Ewari chaa cheepurupachida Ak'õre te waibiade it'aa t'ĩdait'ee mãik'aapa t'ãri o-ĩapa ne-inaa jedek'opachida ãchi tede.

47 Ak'õremaa it'aa t'ĩpachida jaradait'ee iru t'ãri pia bi. Jerusalén pidaarãpa pia pedeepachida ãra ãpíte. Maperã ewari chaa chok'araara o k'achiadeepa uchiapachida ãchi k'aurepa.

3

Pedropa eperã chiwa bi jipada

1 Ewari aba Pedro Juan ome wãjida Tachi Ak'õre te waibiadee a las tres, ma hora judiorã it'aa t'ĩpatap'edaa hora pada perã.

2 Mama Ak'õre te waibiade baji eperã chiwa bi, ichi t'oru weda. Ewari chaa eperãarãpa mãgí ateepachida mãik'aapa binapachida Ak'õre tede chi T'ĩupata Pi-ia apatamã, p'arat'a iidipariimerã chi mama t'ĩurutaarãmaa.

3 Mãgí eperãpa unuk'ãri Pedro mãik'aapa Juan Ak'õre tede t'ĩu wãda, p'arat'a iidiji.

4 Mãpai ãchia ak'ijida irumaa mãik'aapa Pedropa mãgaji:

—Taimaa ak'ipáde aji.

5 Mãgí eperãpa ak'iji, p'arat'a teedai jĩak'aapa.

6 Mamĩda Pedropa mãgaji:

—Mia wēe bida aji, p'arat'a, nēe jida. Mamīda mia pi k'aripait'ee. Jesucristo Nazaretdepemapa mimaa nāga oopi bairā, iru t'ide mia jararu: p'irabáiji māik'aapa wāji.

⁷ Māga jararuta, Pedropa juaraarepema juade jítap'eda, p'irabai ataji. Aramata ma chiwa bada bīiri pia beeji

⁸ māik'aapa p'inajiti baini beeji. Maap'eda p'irria beeji. Ma t'ēpai ichi bīiripa t'iuji Ak'ōre tede āchi ome. Jitijitia wāji māik'aapa o-īapa it'aa t'i wāji Ak'ōremaa.

⁹ Māga unudak'āri, jōmaweda arii p'anadap'edaarā

¹⁰ p'era pik'a para beeji. Māgá p'anajida ai naaweda āchia unupatap'edaa perā ma eperā suak'i bi p'arat'a iidimaa Ak'ōre tede, chi T'īupata Pi-ia apatamāi.

Pedropa jarada Tachi Ak'ōre tede p'anadap'edaarāmaa

¹¹ Māgí chiwa bada jipa beeda perā, Pedro māik'aapa Juan ik'aawaapa āyaa wāk'aa paji. Āchi p'anajida Ak'ōre te waibia āuk'idaa, Salomón Pórtico apatap'edaamāi. Āchimaa eperāarā jōmaweda p'era pik'a p'ira erreujida.

¹² Pedropa māga unuk'āri, māgaji:

—Israel pidaarā, ¿sāap'eda parā p'era para bima? aji. ¿Sāap'eda tai k'īra ak'i jōnima? ¿Parāpa k'īsia p'anik'ā taipa tachi juadoopa na eperā jipajida?

¹³ Tachi chonaarā Abraham, Isaac māik'aapa Jacob ijāadap'edaa Ak'ōre Waibiapa ichi Warra Jesús waibiara papiji jōmaarā k'āyaara, ichia oopi badak'a oopachi perā. Mamīda parāpa māgí

Jesús jita atadap'eda, charraarãmaa teenajida. Maap'eda Pilatopa uchía pëiit'ee pak'ãri, parãpa k'iniada-e paji.

14 Eperã t'ãri pia bi p'ek'au k'achia wëe k'ena pëidai k'ãyaara, chãara peeparita parãpa uchiapit'aajida.

15 Mãgá peepit'aajida Tachi Ak'õre o ak'ipipari. Mamída parãpa peepidap'eda, Tachi Ak'õrepa chok'ai p'irabai ataji. Taipa mãga unujida tachi taupa.

16 Nãgí eperã jipa beeji ichia ijãada perã Jesupa jipai. Maperãpi jipa beeji, parãpa unu p'anik'a. Jesús jõmaarã k'ãyaara waibiara bairã, k'ayaa beerã jipai.

17 Michi auk'aarã, mia k'awa bi pãchi poroorãpa mãik'aapa parãpa Jesús peepidak'ãri, k'awada-e paji iru Tachi Ak'õrepa pëida tachi k'aripamerã.

18 Mamída parãpa mãga oo p'anipa Tachi Ak'õrepa uchiapiji ichia jaradak'a, ichi pedee jarapataarã it'aideepa: ichia pëida piut'ee.

19 Mãpai Tachi Ak'õrepa k'ĩsia iru badade pia k'ĩsiadap'eda, k'achia oo amáati mãik'aapa irude ijãati, irua pãchi p'ek'au k'achia wëepapik'oomerã.

20 Mãga ooruta pirã, Ak'õrepa parã k'ãiwee p'anapiit'ee mãik'aapa pëiit'ee Jesucristo, ichia jirit'erada parã k'aripapariimerã.

21 Mamída Jesús at'ãri Ak'õre eujãde bait'ee, Ak'õrepa ne-inaa jõmaweda chiwidi pik'a ooru misa, chonaarãweda ichi pedee jarapataarã it'aideepa jaradap'edaak'a.

22 Maapai Moisepa tachi chonaarãmaa mãgaji: 'Ak'õrepa ichi pedee jarapari uchiapiit'ee parã

t'ãide mi jãak'a. Oopatáati irua jara bik'a.

²³ Mãgí Ak'õre pedee jaraparipa jara bi pedee ùri k'iniada-e p'anirã Ak'õre eperãarã p'animãiipa ãyaa jërek'ooit'ee mãik'aapa peek'ooit'ee.' (Dt 18.15-19)

²⁴ Ichiaba Samuel beedak'ãriipa jõma apemaarã Ak'õre pedee jarapataarãpa jarapachida tachia ñrá unu p'ani.

²⁵ Mapa parãpa k'awa p'ani Tachi Ak'õrepa jarada chonaarãweda ichi pedee jarapataarã it'aideepa parã ñrapemaarã-it'ee. Ichiaba ichia jarada Abrahammaa parã ñrapemaarã-it'ee. Mãgaji Abrahammaa:

'Mia na p'ek'au eujãdepemaarã jõmaweda k'aripait'eeda aji, pãideepa uchiadait'eerã k'ap'ia pari.' (Gn 22.18)

²⁶ Ichia jaradak'a Abrahammaa Tachi Ak'õrepa parã pia ooji, ichi Warra piup'eda chok'ai p'irabai atak'ãri parã t'ãide. Mãga ooji k'inia bada perã parãpa naapiara ijãadamerã mãik'aapa pãchia k'achia oopata oo amaadamerã.

4

Pedro Juan ome judiorã poroorã k'ñrapite

¹ At'ãri Pedro Juan ome pedeemaa p'ani misa, judiorã p'aareerã pachejida Ak'õre te waibia jãapataarã poro ome. Ichiaba ãchi ome chejida saduceorã.

² K'ñrau p'anajida Pedropa mãik'aapa Juanpa jaratee p'anadap'edaa perã eperãarã piudap'eda chok'ai p'irabaidai, Jesús p'irabaidak'a.

3 Mapa jita atadachida. K'ewara bada perã, carcelde t'it'aanajida, ai norema ma nepira ak'idait'ee.

4 Mãga oojida mĩda, eperãarã chok'araarãpa Cristode ijãajida, ãrapa jarateedap'edaa k'aurepa. Ijãapataarã jõmaweda imik'ĩraarã aupai cinco mil paji.

5 Ai norema Jerusalende abaamaa see nĩbaji judiorã poro waibiaarã, ãchi chonaarã mãik'aapa Moisepa p'ãda jarateepataarã.

6 Mama baji ichiaba Anás, judiorã p'aareerã poro waibia pada. Ichiaba baji p'aareerã poro waibia Caifás, Juan, Alejandro mãik'aapa Anás ãreerã awaraarã.

7 Pedro Juan ome atapijida mãik'aapa ãchi k'ĩrapite bainĩ beepidap'eda, iidijida:

—¿K'ai juapa parãpa jãgee net'aa oo p'anima? maa-e pirã ¿k'aipa jãgá oopi bima? ajida.

8 Ak'õre Jaure Pedro ome bada perã, pia p'anauji:

—Judiorã poro waibiaarã mãik'aapa chonaarã,

9 parãpa taimaa iidiruta, sãga nãgĩ k'ayaa bada k'aripajida mãik'aapa sãga jipa beeji. ¿Mãga-ek'ã? aji.

10 Pia bi. Taipa parã k'ĩrapite jaradait'ee, jõmaweda Israel pidaarãpa k'awaadamerã. Nãgĩ eperã parã jõmaarã k'ĩrapite bainĩ bi, jipa beeji Jesucristo Nazaretdepema juapa, parãpa kurusode peepidap'edaa mãik'aapa Tachi Ak'õrepa chok'ai p'irabai atada.

11 Tachi Ak'õre Ñraa p'ãdade jara bi:

‘Te oopataarãpa mãu k'iniada-e padap'edaa
pipiara padachi.’ *(Sal 118.22)*

12 Mapa Jesucristodepai ijãa p'ani pirã, it'aa wãdait'ee, maarepida awaraa eperã wẽ-e perã iruk'a na p'ek'au eujãde, tachi o k'achiadeepa k'aripa atait'ee.

13 Judiorã poroorã arii p'anadap'edaarãpa un-udak'ãri Pedro mãik'aapa Juan jĩp'a pedeemaa p'ani waaweeda-ee, mãik'aapa k'awaadak'ãri ãchi eperã jĩp'aarã, mak'iara k'art'a tau k'awada-ee, ak'itrua para beeji. K'awaajida Jesús ome nipap-atap'edaa perã, mãga pedeejida.

14 Ma awara chiwa bada ãchia jipadap'edaa arii baji. Mapa judiorã poroorãpa p'oyaa p'anaudak'aa paji.

15 Mãpai ãchia Juan, Pedro, ma chiwa bada ome taawaa uchiapijida. Maap'eda pedee para beeji ãchi pitapai:

16 —¿K'ãata oodait'eema ajida, jã eperãarã ome? Jõmaweda Jerusalendepemaarãpa k'awa p'ani ãrapa ne-inaa pia oodap'edaa, eperãarãpa p'oyaa oodak'aa ãchi juadoopa. Tachia p'oyaa merada-e.

17 Mamĩda írá jaradáma ajida, ma eperãarãmaa jarateenaadamerã Jesupa ne-inaa oopata, mãga-e pirã miapidai.

18 Mãpai waya t'ĩ p'e atajida mãik'aapa jarajida waa jarateenaadamerã Jesupa ne-inaa oopata.

19 Mamĩda Pedropa Juan ome p'anaujida:

—Pia k'ĩsíati parãpa. ¿K'ãare piata bayama ajida, Ak'õrepa jara bi ooda-e pait'ee, parã pedee ùri k'iniapa?

20 Taipa unudap'edaa m̄aik'aapa ũridap'edaa p'oyaa nepiri amaada-eda ajida.

21 Judiorã poroorã arii p'anadap'edaarãpa ãchi juade iru p'anajida m̄ida miapidait'ee, arajãgaa p̄ejida eperãarã waidoopa. Jõmaweda eperãarã o-ĩa it'aa t'ĩmaa p'anapachida Tachi Ak'õremaa,

22 Jesús Jaurepa ma eperã jip̄at'aada perã, cuarenta años audú iru bita.

Ijãapataarãpa Tachi Ak'õremaa k'aripa iididap'edaa

23 K'ena p̄eidap'eda, Pedro Juan ome chejida ãchi k'õp'ãyoorã p'anadap'edaamaa. Nepirijida judiorã p'aareerã poroorãpa m̄aik'aapa awaraa judiorã poro waibiarãpa ãchimaaja jaradap'edaa.

24 M̄agí pedee ũridap'eda, jõmaweda auk'a it'aa t'ĩjida:

—Tachi Waibia, pia pajã, na eujã, p'usa m̄aik'aapa ne-inaa jõmaweda aide n̄ibi ooji.

25 P̄i Jaurepa tachi chonaa Davidmaa nãga pedeeji irua p̄ide ijã bada perã:

‘¿K'ãare-it'ee awaraa eujãdepemaarã k'ĩrau p'anapatama? Michi eperãarã paara pariatua k'ĩsiapata.

26 Na p'ek'au eujãdepema reyrã m̄aik'aapa poro waibiarã audua p'anadairã, pedeeteepata k'achia oodait'ee. Pedee k'achia jarapata Tachi Ak'õre ãp̄ite m̄aik'aapa ichia rey p̄eida ãp̄ite.’ (Sal 2.1-2)

27 Tachi Waibia, pia jaradak'a David it'aideepa, m̄aga uchiaji. Rey Herodes, Poncio Pilato m̄aik'aapa awaraarã judio-eerã na p'uurude pedeeteejida Israel pidaarã ome k'achia oodait'ee Jesús, pia p̄eida oo chemerã pia oopi k'inia bi.

28 Māga oojida pia naaweda k'ĩsia iru badak'a.

29 Írá Tachi Waibia, ak'íji pi āpíte k'achia pedee p'anirā māik'aapa taimaa waapiara pi ūraa waawee-ee jarateepíji, taipa oo k'inia p'anadairā pia oopi bik'a.

30 Ichiaba tai k'aripáji k'ayaa beerā jipapataadamerā māik'aapa ne-inaa eperāarāpa p'oyaa oodak'aa āchi juadoopa oopataadamerā Jesús t'ide. Iruata pichia oopi bik'a ichita oopari.

31 It'aa t'ĩ aupadak'āri, āchi p'anadap'edaamāi wirriwirria nībeeji. Māpai jōmaweda Ak'ōre Jau-repa oopi bik'a oo k'inia p'aneejida māik'aapa Tachi Ak'ōrepa ooda Jesús piuda k'aurepa waawee-ee jarateepachida.

Ijāapataarāpa āchi net'aa jedepatap'edaa

32 Maapai ijāapataarā jōmaweda auk'a k'ĩsiapachida māik'aapa chik'aripa p'anapachida. Apidaapa āchi net'aa iru p'ani āchi-it'ee aupaida adak'aa paji. Jīp'a jōmaarā-it'ee paji.

33 Mapa Ak'ōrepa āchi pia oopachi. K'aripaji Cristopa jirit'eradaarāpa jarateedamerā Jesús chok'ai p'irabaida māik'aapa oodamerā ne-inaa eperāarāpa p'oyaa oodak'aa āchi juadoopa.

34 Āchi chupiria p'anadak'aa paji. Chi eujā iru beerāpa māik'aapa ne-inaa awaraa iru beerāpa netot'aapachida.

35 Māpai ma p'arat'a Cristopa jirit'eradaarāmaa teepachida, jedenadamerā wēe beerāmaa.

36 Māga ooji Leví ereerādepema Josepa. Māgí eperā Chipre isladepera paji. Māgímaa Cristopa

jirit'eradaarãpa pedida t'ĩ bijida Bernabé (jara k'inia bi "T'ãri O-ĩapipari").

³⁷ Māgí eperãpa eujã iru bada netot'aaji m̄aik'aapa ma p'arat'a Cristopa jirit'eradaarãmaa teeji.

5

Ananías chi wěra Safira ome ne-inaa k'achia ooda

¹ Mamĩda Bernabepa oodak'a ooda-e paji Ananías chi wěra Safira ome. Māgĩrãpa āchi eujã netot'aajida.

² Mamĩda m̄agí eperã chi wěra ome pedeetejida p'arat'a jōma teeda-e pait'ee Cristopa jirit'eradaarãmaa. Ananiapa m̄agí p'arat'a ũk'urupai teenak'ãri,

³ Pedropa m̄agaji:

—Ananías, ¿pi seewa cheruk'ã aji, Ak'õre Jauremaa, p'arat'a jōma tee che-ee? ¿Sãap'eda oojima Satanapa oopi bik'a?

⁴ ¿Jã eujã pichide paji-ek'ã netot'aai naaweda? ¿Ma p'arat'a pichide paji-ek'ã netot'aap'eda? ¿Sãap'eda nãga oo k'iniadachima? Pĩa eperãarãmaa seewa-e paji. Ak'õremaata seewajida aji.

⁵ Māga ũriruta, Ananías eujãde piu baainaji. Arii p'anadap'edaarãpa unudak'ãri, p'erak'oodachida.

⁶ Māpai k'ũtrãarã ũk'uruurãpa chi piuda beda atajida m̄aik'aapa ateejida iade.

⁷ Hora õpeemaa Ananías wěra t'ĩuji, chi imik'ĩra piuda k'awa-ee.

⁸ Māpai Pedropa irumaa iidiji:

—¿Wãara nãgí p'arat'a pari eujã netot'aajidak'ã? aji.

Ichia p'anauji:

—Netot'aajidapi.

⁹ Pedropa mãgaji:

—¿Sãap'eda parã pedeeteejida Ak'õre Jauremaa seewadait'ee? Ara cherutada aji, pi imik'ïra iadepea. Naade pi jida auk'a ateedait'eeda aji.

¹⁰ Aramata Safira piu baainaji Pedro bïri ik'aawa. K'ũtrãarã t'ïudak'ãri, unujida piu bi. Maap'eda ïanajida chi imik'ïra ik'aawa.

¹¹ Jõmaweda ijãapataarã mãik'aapa awaraarã mãga k'awadap'edaarã p'era para beeji.

Ak'õre Jaurepa k'aripap'eda, Cristopa jirit'eradaarãpa oopatap'edaa

¹² At'ãri Jerusalende p'anide Cristopa jirit'eradaarãpa oopachida ne-inaa eperãarãpa p'oyaa oodak'aa ãchi juadoopa. Maapai jõmaweda Cristode ijãapataarã cheepurupachida Salomón Pórtico apatap'edaamãi, Tachi Ak'õre te waibiã ãuk'idaa.

¹³ Apemaarã judiorã Tachi Ak'õre te waibiãde t'ïupataarã waaweepa araa p'anada-e paji ãchi ome. Mamïda pia pedeepachida ãchi ãpïte, ape-maarã Jerusalendepemaarã ome.

¹⁴ Mãirã mãgá t'ïuda-e paji mïda ãchi ome, Cristode ijãapataarã ïwajida, wëraarã mãik'aapa imik'ïraarã.

¹⁵ Cristopa jirit'eradaarãpa ne-inaa pia oo p'anadap'edaa perã, eperãarãpa ãchi k'ayaa beerã calle jã ik'aawa uchia atapachida joip'aruk'a bi

ĩri, Pedro wāyaa wāk'āri, chi jaurepa pida āra t'ōbaimerā māik'aapa jipamerā.

16 Ichiaba p'uuru k'ait'a beerāpa Jerusalendee k'ayaa beerā chok'ara aneepachida māik'aapa ichiaba eperā netuara merātia bee aneepachida. Tachi Ak'ōrepa jōmaweda jipak'oopachi Cristopa jirit'eradaarā juapa.

Cristopa jirit'eradaarā jiridap'edaa miapidait'ee

17 Unudak'āri jōmaweda Cristopa jirit'eradaarāpa oopata, judiorā p'aareerā poro waibia māik'aapa ũk'uru saduceorā iru ome nipapatap'edaarāpa Cristopa jirit'eradaarā k'īra unuamaa iru p'aneejida.

18 Mapa Tachi Ak'ōre te waibia jiapataarāmaa atapijida carcelde t'ik'oonadamerā.

19 Mamīda p'ārik'ua angelpa carcelde t'īupata ewat'aa cheji. Maap'eda āchi taawaa uchiapik'ooji. Māpai māgaji:

20 —Wāti Tachi Ak'ōre te waibiadee māik'aapa arii p'anirāmaa jaratēti Cristopa ooda eperāarā k'aripait'ee it'aa wādamerā.

21 Māgá ai norema tap'eweda t'īujida Ak'ōre tede māik'aapa jarateemaa p'aneejida.

Māimisa ma p'aareerā poro waibiapa māik'aapa ichi ome p'anadap'edaarāpa t'īpēijida Junta Supremadepemaarā jōmaweda. Ichiaba carceldepa Cristopa jirit'eradaarā atapijida.

22 Mamīda Ak'ōre te jiapataarāpa carcelde jirinadak'āri, unuda-e paji. Maperā nepiri chejida:

23 —Ununajidada ajida, carcel te pia jīa nībi, māik'aapa chi jiapataarā ai t'aide jīa p'ani. Mamīda ewa atadak'āri, apida unuda-e paji.

24 Māga ūridak'āri, ma p'aareerā poro waibia apemaarā p'aareerā poroorā ome māik'aapa Ak'ōre te jīapataarā poropa k'awada-e paji k'āata oodai.

25 Māga nide eperā pacheji māik'aapa māgaji:

—Parāpa carcelde t'ik'oodap'edaarā Ak'ōre te waibiade eperāarāmaa jarateemaa p'anida aji.

26 Aramata Ak'ōre te waibia jīapataarā poro apemaarā jīapataarā ome wājida jita p'e atade. Mamīda k'īra jīp'a p'e aneejida, eperāarāpa āchimaamaūpa bat'adai jīak'aapa.

27 Pachedak'āri, ak'inī p'aneepijida Junta Suprema k'īrapite. Māpai ma p'aareerā poro waibiapa māgaji:

28 —Taipa parāmaa jarajida waa jarateenaadamerā jā eperāpa oopata. Mamīda māga ooda-e p'ani. Waapiara jōmaweda Jerusalén pidaarāmaa jarateemaa p'ani. Ma awara tāipata jā eperā peet'aajidada a jōni.

29 Apemaarā pari Pedropa p'anauji:

—Taipa ichita Ak'ōrepa oopi bik'a oodait'eeda aji, eperāpa jara bik'a oodai k'āyaara.

30 Tachi chonaarāwedapema Ak'ōrēpata Jesús, parāpa kurusode peepidap'edaa, chok'ai p'irabaipiji.

31 Tachi Ak'ōrepa iru p'irabai atap'eda, su-ak'i biji ichi juaraare, jōmaarā k'āyaara waibiara bairā. Mama biji eperāarā ak'ipariimerā māik'aapa o k'achiadeepa k'aripa atamerā. K'inia baji Jesús piuda k'aurepa Israel pidaarāpa p'ek'au k'achia oopata oo amaadamerā. Māgá irua wēpapik'ooi ārapa p'ek'au k'achia oopata.

³² Tachi Ak'õre Jaurepa ma jõma k'awa bida aji. Taipa pida ichiaba mãga k'awa p'anida aji, Cristode ijãadak'ãri, Ak'õrepa ichi Jaure taimaa pëida perã.

³³ Judiorã poroorãpa mãga ùridak'ãri, Cristopa jirit'eradaarã peek'oo k'iniadachida.

³⁴ Mamida ãra t'ãide baji fariseo t'ijarapatap'edaa Gamaliel. Mãgí Gamalielpa Moisepa p'ãda pia k'awaa baji. Mapa eperãarãpa iru t'o p'anapachida. Mãgí baini beep'eda, Cristopa jirit'eradaarã arak'atia taawaa uchua atapiji.

³⁵ T'ëepai mægaji apemaarã judiorã poroorãmaa:
—Israel pidaarã, pia k'isiatu ne-inaa oodai naaweda jã eperãarãmaa.

³⁶ K'irãpãti mak'iaara taarã-e bi eperã Teudas apatap'edaapa k'isijaji ichita jõmaarã k'ãyaara waibiara pai. Mãgí eere cuatrocientos imik'iraarã p'anajida. Mamida mægí peet'aadak'ãri, iru ome nipapatap'edaarã jichoodachida. Mãgá ãchia k'isia iru p'anadap'edaa jõdachi.

³⁷ Ai t'ëepai, Romadepemaarãpa eperãarã t'í p'ãpimaa p'anadak'ãri, ichiaba Judas Galileadepemapa mãga k'isijaji. Eperãarã ùk'uruurãpa iru pedee ijãajida. Mamida ichiaba peet'aadak'ãri, iru ome nipapatap'edaarã ãyaa erreudachida.

³⁸ Mapa mia parãmaa ùraait'ee jã eperãarã k'achia oonaadamerã. ãchia jaratee p'ani pirã ãchi k'isiadeepa mãik'aapa ne-inaa oo p'ani pirã ãchi juadoopa, ãchia oopata jõdariyada aji.

³⁹ Mamida Tachi Ak'õrãpata ãchimaa mãga oopi bi pirã, parãpa p'oyaada-eda aji. K'irak'aupai, Tachi Ak'õre ome chõomaa p'anedai.

Ãchia Gamaliel ũraa ijãajida.

⁴⁰ Maap'eda Cristopa jirit'eradaarã t'ĩ p'e atajida mãik'aapa wik'oojida. Jarajida waa jarateenaadamerã Jesupa ooda. Maap'eda k'ena pëijida.

⁴¹ Mamïda Cristopa jirit'eradaarã judiorã poroorã k'ĩrapiteepa o-ĩa uchajida, Ak'õrepa ãchi ita-aria miapida perã Jesús k'aurepa.

⁴² Maap'eda ewari chaa jarateepachida Jesucristota Tachi Ak'õrepa pëida eperãarã k'aripamerã. Mãga jaratee wãpachida Tachi Ak'õre te waibiade mãik'aapa te bee chaa.

6

Ijãapataarã siete jirit'eradap'edaa Cristopa jirit'eradaarã k'aripadamerã

¹ Maapai ijãapataarã chok'arapiara ïwajida. Judiorã griego pedee pedeepataarãpa imiateejida judiorã hebreo pedee pedeepataarãmaa, ãchia griego pedee pedeepataarã p'ẽtrãarã pia ak'idak'aa pada perã ewari chaa ne-inaa jededak'ãri k'aripadait'ee.

² Maperã chi doce jirit'eradaarãpa t'ĩ pëijida jõmaweda Cristode ijãapataarã cheepurudamerã. See nĩbeek'ãri, mãgajida:

—K'õp'ãyoorã, tai jua araada-e ijãapataarã jõmaweda ak'idait'ee. Pia-e bida ajida, taipa waa jarateeda-e pait'ee Ak'õrepa jara pëida Jesucristo k'ap'ia pari, chi ne-inaa wëe beerã ak'i k'iniapa.

³ Mapa eperãarã siete jirit'erãti ma mimia oodamerã. Jiridaipia bi nãgee eperãarã: k'ĩsia

k'awaa beerã; t'ãri pia beerã mãik'aapa Ak'õre Jaurepa oopi bik'a oo k'inia beerã.

⁴ Tai jõdee it'aa t'ĩmaa p'anadait'ee mãik'aapa Ak'õrepa jara pëida jarateedait'eeda ajida.

⁵ Mãpai ãchia p'anaujida:

—Pia bida ajida.

Maap'eda jirit'erajida Esteban. Ma eperã Cristode pia ijãaji mãik'aapa Ak'õre Jaurepa oopi bik'a oopachi. Ichiaba jirit'erajida Felipe, Prócoro, Nicanor, Timón, Pármenas mãik'aapa Nicolás Antioquiadepema. Naaweda mǎgí Nicolás Tachi Ak'õrede ijãak'aa bap'eda, judiorãpa ijãapatade ijãa baji.

⁶ Ma t'ëepai ateejida Cristopa jirit'eradaarã p'anadap'edaamaa. Mǎgĩrã it'aa t'ĩjida ãchi pari mãik'aapa jua bijida ãchi ãri. Mǎga oojida ak'ipidait'ee ma mimia ãchima teeruta.

⁷ Ma t'ëepai, Ak'õrepa ooda Cristo piuda k'aurepa waapiara jarateepachida mãik'aapa ijãapataarã waapiara ãwapachida Jerusalende. Judiorã ùk'uru, p'aareerã jida ichiaba Cristode ijãajida.

Judiorã poroorãpa Esteban jita atadap'edaa

⁸ Maapai Jerusalendepemaarã t'ãide Estebanpa oopachi ne-inaa eperãarãpa p'oyaa oodak'aa ãchi juadoopa. Mǎga oopachi Tachi Ak'õrepa iru k'aripa bada perã.

⁹ Mamãda ewari aba pachejida judiorã Tachi Ak'õre Ûraa jarateepata tedepema. Ma te t'ĩjarapachida Esclavoorã P'anadap'eda Uchiadap'edaa. Mǎĩrãpa nepira jiri chejida Estebanmaa. ãchi ome chejida auk'a

Cirene p'uurudepemaarã, Alejandría
p'uurudepemaarã, Cilicia eujãdepemaarã
mãik'aapa Ásia eujãdepemaarã.

10 Mamída aupedeedak'ãri, Esteban p'oyaa
k'ĩup'eepidak'aa paji, Ak'õre Jaurepa iru k'ĩsia
k'awaapida perã ãchia iidida p'anaut'ee.

11 Mapa awaraarãmaa p'aajida seewa
jaradamerã ichia pedee k'achia pedeemaa bi
Moisés ãpitemãik'aapa Tachi Ak'õre ãpitemã.

12 Mãgá p'uuru pidaarã, judiorã poro
waibiarã mãik'aapa Moisepa p'ãda jarateepataarã
k'ĩraupik'oojida Esteban ome. Mãirãpa Esteban jita
atadap'eda, atadachida Junta Suprema k'ĩrapite
Tachi Ak'õre te waibiade.

13 Mãpai ma p'aadap'edaarã aneejida seewa
jaradamerã. Mãirãpa mãgajida:

—Nãgí eperãpa ik'achia pedeparida ajida, Tachi
Ak'õre te ãpitemãik'aapa Moisepa p'ãda ãpitemã.

14 Jara bi Jesús Nazaretdepemapa nãgí te
t'eet'aait'ee mãik'aapa tachimaa waa oopi-e pait'ee
Moisepa p'ãdade jaradak'a, tachia oodamerã.

15 Judiorã poroorãpa mãik'aapa arii
p'anadap'edaarãpa Esteban ak'idak'ãri, chi k'ĩra
ángel k'ĩrak'a unujida.

7

Estebanpa p'aare poro waibia k'ĩrapite p'anaua

1 Mãpai p'aareerã poro waibiapa iidiji Esteban-
maa:

—¿Wãarak'ã aji, na eperãarãpa jara p'ani?

2 Irua p'anauji:

—Michi auk'aarã mãik'aapa chonaarã, ùrítì. Tachi Ak'õre k'íra wãree bîpa ichi unupijida aji, tachi ak'õchona Abrahammaa Mesopotamia eujãde bak'ãri, Harande banai naaweda.

³ Ak'õrepa jaraji:

'Atabëipáde aji, pî eujã pî ëreerã ome mãik'aapa wãpáde aji, mia ak'îpiit'ee eujãmaa.' (Gn 12.1)

⁴ Mãpai Abraham uchijaji Caldea eujãdeepa mãik'aapa banaji Harande. T'ëepai chi ak'õre piuk'ãri, Tachi Ak'õrepa Abraham aneeji na eujãdee tachi írá p'anímãi.

⁵ Mamída na eujã maarepida waide tee-e paji irumaa; bîri aba t'iait'ee pida. Jîp'a jaraji teeit'ee irudeepa uchiadait'eerãmaa iru piuda t'ëepai, Abraham waide warra wêe baji mída.

⁶ Ma awara Ak'õrepa jaraji:

'Pideepa uchiadait'eerã p'anapataadait'eeda aji, awaraa eujãde mimiamaa chîara-it'ee. Mama esclavoorã p'anadait'ee mãik'aapa jâpemaarãpa ãra miapi iru p'anadait'ee cuatrocientos años.' (Gn 15.13)

⁷ Mamída Ak'õrepa ichiaba jaraji:

'Mia k'achia ooit'eeda aji, ãra esclavoorã papirutaarã. T'ëepai ãra mamãik'aapa uchiadait'ee mãik'aapa mimaa it'aa t'îdait'eeda aji, na eujãde.' (Gn 5.14)

⁸ Mãgá pedee nîbide Abraham ome, Ak'õrepa jaraji Abrahampa tauchaa bîmerã ichi warra k'ap'iade. Tachi Ak'õrepa k'inia baji mãga oodamerã ichi eperãarãpa ak'îpidait'ee ichide ijãa p'ani. Mapa Abraham warra Isaac t'ok'ãri, k'ãima ocho parumaa iru k'ap'iade tauchaa bîji. Isaacpa mãga ooji

ichi warra Jacob ome. Ichiaba Jacobpa mǎga ooji chi warrarǎ doce ome. Mǎirǎdeepa Israel pidaarǎ ěreerǎ doce uchiajida.

⁹ 'Mǎgí Jacob warrarǎ pada, tachi chonaarǎpa, āchi ĩpema José k'ĩra unuamaa iru p'anapachida. Maperǎ netot'aajida esclavok'a Egiptodee wāyaa wǎdap'edaarǎmaa. Mamĩda Tachi Ak'õre José ome baji.

¹⁰ Maperǎ k'aripa ataji jõmaweda ne-inaa k'achiadeepa. Ma awara k'ĩsia k'awaapiji mǎik'aapa k'inia iru bapiji rey Egiptodepema Faraonmaa. Mǎgipa José Egiptodepemaarǎ poro waibia papiji ichi palaciode.

¹¹ 'Ma t'ĕepai jarra oojida Egipto eujǎde mǎik'aapa Canaán eujǎde. Maperǎ mak'ĩara nek'odait'ee wĕe paji.

¹² Mamĩda Jacobpa k'awaak'ǎri Egiptode ne-inaa k'oit'ee paraa, jǎmaa pĕiji ichi warrarǎ, ne-inaa netode. Mǎgí paji tachi chonaarǎ naapiara wǎdap'edaa.

¹³ Ai t'ĕepai wǎdak'ǎri, Josepa ichi ĩpemaarǎmaa k'awaapiji. Madeepa Faraónpa José ěreerǎ k'awaji.

¹⁴ T'ĕepai, Josepa jara pĕiji chi ak'õre Jacob mǎik'aapa chi ěreerǎ jõmaweda chedamerǎ Egiptodee. Āchi setenta y cinco paji.

¹⁵ Mǎgapi Jacob banaji Egiptode. Mama jai-idaaji. Ichiaba mama tachi chonaarǎ jai-idaajida.

¹⁶ Jacob bĩri mǎik'aapa chi warrarǎ bĩri ateejida Siquem p'uurudee mǎik'aapa mama iajida Abrahampa Hamor ěreerǎ juak'aawa netoda jǎirade.

¹⁷ 'Ewari k'ait'a pak'ǎri Tachi Ak'õrepa uchiapiit'ee Abrahamdeepa uchiadap'edaarǎ

Egiptodeepa ichia jaradak'a, ãchi chok'ara p'anajida, ïwa p'anadap'edaa perã.

18 Maapai Egiptodepema reypa José k'awa-e pada Faraón paji.

19 Mãgí reypa tachi chonaarã k'üraji waa ïwanaadamerã. ãchi chupiria ooji. Jaraji ãchi warrarã ewaa t'o k'edeerã ita-aria piupidamerã.

20 Maapai t'oji Moisés. Tachi Ak'õrepa mãgí warra chai pia ak'iji. Mapa chi ak'õreerãpa atane õpee warimaa iru p'anajida ãchi tede.

21 Mamïda p'oyaa waa merada-e paji. Mapa ituaba atabëidak'ãri, Faraón k'aupa unu ataji mãik'aapa wari ataji ichi warrak'a.

22 Mãgapi Moisés wariji Egipto pidaarã t'ãide mãik'aapa k'awaa wãji ne-inaa k'ïra t'ãdoo Egiptodepemaarãpa k'awa p'anadap'edaak'a. Mãpai jõmaarãpa iru k'awajida, irua pedeeda k'aurepa mãik'aapa ooda k'aurepa.

23 "Cuarenta años iru bak'ãri, k'ïsiaji wãit'ee Israel pidaarã ak'ide, ichi auk'aarã pada perã.

24 Mamïda unuk'ãri Egiptodepemapaji ichi auk'aa sïmaa bi, Moisepa k'aripanaji mãik'aapa ma Egipto pida pee atapëiji.' *(Ex 2.11-12)*

25 Moisepa k'ïsiaji ichi auk'aarãpa ijãadai Tachi Ak'õrepa ichi pëida ãchi k'aripamerã. Mamïda ãchia mãga ooda-e paji.

26 'Ai norema unuji Israel pidaarã omé chõomaa p'ani. Mãgá chõonaadamerã mãgaji: "¿Pãchi auk'aarã-ek'ã aji, jãgá chõo jõnadait'ee?"

27 Mãpai chi k'õp'ãyo sïmaa badapa Moisés sïat'aaji mãik'aapa mãgaji: "¿K'aipa pi tai porok'a bijima aji, taipaa oopata ak'imerã?"

28 ¿Mi peet'aa k'inia bik'ã aji, nuweda Egipto pida peet'aadak'a?"' (Ex 2.13-14)

29 Māga ũrik'āri, Moisés mirudachi. Maap'eda t'imí wāji Madián eujādee. Mama banaji k'īra tewaraak'a. Ariipema wēra atap'eda, warrarā omé paraaji.

30 'Cuarenta años wāyaap'eda, ewari aba Moisés baji eujā pania wēe bīmāi Sinaí ee k'ait'a. Mama bide unuji pak'uru jep'eda t'ipitauk'a urua nībi, angelpa aide ichi unupi bada perā.

31 Māgá urua unuk'āri, Moisés k'ait'aara wāji pi- iara ak'iit'ee k'āata māga bi. Māga nīde ũriji Tachi Ak'ōrepa māgaru:

32 'Mi pi chonaarā Ak'ōre Waibia; Abraham, Isaac, Jacob ijāadap'edaa Ak'ōre Waibia.' (Ex 3.6)

Māga ũrik'āri, Moisés bīri wēre nībeeji p'era nībipa māik'aapa p'oyaa ak'ik'aa paji ma pak'urumaa.

33 Māpai Tachi Ak'ōrepa māgaji:

'Pichi chancla ērat'aapáde aji, nama pi mi k'īrapite bainī bairā.

34 Mia k'awa bi mi eperāarā chupīria chitooni Egiptode. Ũri bi āchi bia chitooni. Mapa cheji k'aripait'ee. Pia auk'a k'aripanāji. Mia pi Egiptodee pēiit'eeda aji.' (Ex 3.5-10)

35 'Ai naaweda āchia Moisés pedee ũri k'iniada-e paji nāga p'anauda perā:

'¿K'aipa pi tai porok'a bijima ajida, taipa oopata ak'imerā?' (Ex 2.14)

Māgá yiaraa pik'a iru p'anajida mīda, Tachi Ak'ōrepa ichi ángel pak'uru ũri-idaade unupida k'ap'ia pari Moisés pēiji āchi porok'a. Tachi

Ak'õrepa k'inia baji Moisepa ãchi uchua atamerã Egiptodeepa pidaarã juadeepa.

³⁶ Māgá Moisepa tachi chonaarã uchua p'e ataji Egiptodeepa. Ichia ne-inaa ooji eperãarãpa p'oyaa oodak'aa ãchi juadoopa māgí eujãde, Mar Rojode māik'aapa cuarenta años wāyaaruta misa eujã pania wēe bide.

³⁷ Māgí Moisepa jaraji Israel pidaarãmaa:
 'Parãdeepa Ak'õrepa uchiapiit'ee ichi pedee jara-
 pari mi jīak'a.' *(Dt*
18.15)

³⁸ P'anadak'ãri eujã pania wēe bide, Israel pidaarã pari Moisepa pedeeji ángel ome Sinaí eede. Ichiata Ak'õrepa jarada naapiara p'ãji, tachi chonaarãpa māik'aapa tachia māgí ũraa ijãadap'eda, ichita p'anapataadamerã.

³⁹ 'Mamīda tachi chonaarãpa iru pedee ijãa k'iniada-e paji. Ma k'ãyaara waya Egiptodee wã k'iniadachida.

⁴⁰ Mapa Moisés wē-e pak'ãri, ichi ipema Aaron-
 maa māgajida:

'Tachi-it'ee ak'õre waibiarã oopáde ajida, tachi naa
 o jaratee wādamerã, k'awada-e p'anadairã
 sāgataji jā Moisés ome, Egiptodeepa tai āyaa
 aneeda.' *(Ex 32.1)*

⁴¹ Māpai oojida p'ak'a chak'ek'a ai k'īrapite it'aa t'īdait'ee. Ne-animalaarã peejida ai k'īrapite paadait'ee māik'aapa fiesta oojida o-īapa, ma p'ak'a chak'ek'a ooda-it'ee.

⁴² Maperãpi Tachi Ak'õre ãchi ik'aawaapa āyaa wāji. Mapa pajãde nībi ne-inaamaa it'aa t'īpachida, Tachi Ak'õremaa it'aa t'īdai k'ãyaara. Oojida Ak'õre pedee jarapataarãpa p'ãdap'edaade jara bik'a:

'Israel pidaarã, parã cuarenta años eujã pania wêe bide p'anadak'ãri, ¿mi-it'ee ne-animalaarã peedap'eda, paapachidak'ã, mide ijãa p'anadap'edaa perã?

⁴³ Ma k'ãyaara parãpa it'aa t'ipachida Canaan-depemaarã ak'õre waibia Molocmaa mãik'aapa Egiptodepemaarã ak'õre waibia Refanmaa. Mia mãga k'awa bi ne-inaa pãchi juapa oodap'edaa atee p'anadap'edaa perã pãchi wãrutamaa. Mapa mia parã ãyaa jërek'ooit'eeda aji, Babilónia p'uuru k'ãyaara t'imiaara.' *(Am 5.25-27)*

⁴⁴ Tachi chonaarã eujã pania wêe bide p'anadak'ãri, atee pachida Tachi Ak'õre te ne-edeo ooda, k'irãpadait'ee Tachi Ak'õre arii bi ãchi ome. Mãgí te oojida Tachi Ak'õrepa Moisemaa ak'ipidak'a. Oojida aide it'aa t'ipataadait'ee Tachi Ak'õremaa.

⁴⁵ Ma t'ëepai tachi chonaarã mãgí tede it'aa t'ipachida ãchi chonaarãpa oodap'edaak'a. Mapa Tachi Ak'õrepa awaraa p'uuru ome jura chõo p'oyaapik'ãri, Josué ome chedap'edaarãpa ãchi ome aneejida mãgí te ne-edeo ooda. Mãgá iru p'anapachida David rey parumaa.

⁴⁶ Tachi Ak'õrepa Rey David k'inia iru bapachi. Mapa Davidpa iidiji Tachi Ak'õremaa te waibia oo teet'ee, te pia oo k'inia bada perã Jacobpa ijãadap'edaa Ak'õre-it'ee.

⁴⁷ Mamída David warra Salomonpa Tachi Ak'õre te waibia ooji.

⁴⁸ Salomonpa mãgí te ooji mída, k'awa p'ani Tachi Ak'õre Waibia bak'aa te eperãarã juapa oodade. Mãga k'awa p'ani Ak'õre pedee jaraparipa

jarada perã:

⁴⁹ 'Mi, Jõmaarã Rey, it'arita baparida aji, mãik'aapa eujã mi jua ek'ari bi. ¿Te k'ãaredeeta mimaa oo teedait'eema? ¿Sãmata mi ñinait'eema?

⁵⁰ ¿Michi juadoopa jõmaweda ooji-ek'ã? aji.' (Is 66.1-2)

⁵¹ Mãpai Estebanpa mãgaji:

—Parãpa Tachi Ak'õrede ijãa p'anida apata mĩda, t'ãri k'achia-idaa p'anapatada aji, ijãadak'aa beerãk'a. Ma awara k'ĩri k'isua p'anapata, oo k'iniadak'aa perã Ak'õre Jaurepa oopi bik'a. Pãchi chonaarãk'apĩ p'ani.

⁵² Parã chonaarãpa ichita Tachi Ak'õre pedee jarapataarã jirijida peedait'ee. Peejida chi p'ek'au k'achia wẽe bi cheit'ee bida apatap'edaarã. Maap'eda chi p'ek'au k'achia wẽe bi chek'ãri Tachi Ak'õrepa oopi bik'a ooit'ee, iru ichiaba jita atapidap'eda, peepijida parãpa.

⁵³ Parãpata Ak'õre Ûraa iru p'anapata angeleerã k'aurepa. Mamĩda at'ãri ooda-e p'anida aji, mãgĩ ùraa jara bik'a.

Esteban peedap'edaa

⁵⁴ Mãga ùridak'ãri, t'ãri k'achiapa Esteban peet'aa k'inia p'aneejida.

⁵⁵ Mamĩda Ak'õre Jaure ichi ome bada perã, it'aa ak'iji mãik'aapa unuji Ak'õre k'ĩra wãree mãik'aapa Ak'õre juaraare Jesús bainĩ bi.

⁵⁶ Mãpai mãgaji:

—Ak'idapáde aji. Mia unu bi pajã ewa nĩbi mãik'aapa unu bi Eperã Ak'õre Truadepema Ak'õre Waibia juaraare.

⁵⁷ Mamĩda āchi k'ĩiri t'ap'ak'oodachida mĩik'aapa golpe biadap'eda, jōmaweda iru ĩri wājida.

⁵⁸ Jerusalén p'uurudeepa uchia atadap'eda, māupa bat'amaa p'aneejida iru peet'aadait'ee. Auk'a k'aripajida Esteban imiateedap'edaarāpa. Āchi ĩripema p'aru jĩpatap'edaa ata bijida eperā Saulo apatap'edaa bĩiri ik'aawa irua ak'imerā, āchia māu bat'aruta misa.

⁵⁹ Māupa bat'amaa p'anide Esteban it'aa t'ĩji:

—Tachi Waibia Jesús, mi jaure pichimaa atéeji.

⁶⁰ T'ēpai bedabaiji mĩik'aapa golpe it'aa t'ĩji:

—Tachi Waibia, āchi chupiria k'awáaji, mi nāgá k'achia oo p'ani mĩda.

Māga jarap'eda, piuji.

8

Saulopa ijāapataarā miapiit'ee jirida

¹⁻² Esteban peedak'āri, Saulo mama baji ak'it'ee, ichi judiorā poroorā eere bada perā. Esteban piup'eda, ũk'uru Tachi Ak'ōrede ijāapataarāpa iajida; ichiaba audú jēejida iru-it'ee.

Ma ewatedeepa Jerusalende Cristode ijāadak'aa beerāpa irude ijāapataarā jirijida peedait'ee. Mapa jōmaweda miruk'oodachida Judea eujādee mĩik'aapa Samaria eujādee. Cristopa jirit'eradaarā aupai miruda-e paji.

³ Māgá jiri p'ani misa, Saulopa Cristode ijāapataarā auk'a jiripachi. Te chaa t'iu wāpachi wēraarā imik'īraarā ome jita p'eit'ee. Maap'eda carcelde t'ipik'oopachi.

Samariade jarateedap'edaa Cristopa ooda eperāarā k'aripait'ee

⁴ Saulopa māga oo baji mīda, chi Jerusalendeepa mirudap'edaarāpa jaratee wāpachida Cristopa ooda eperāarā k'aripait'ee āchi wārutamaa.

⁵ Felipe wāji Samaria eujādee māik'aapa Cristopa ooda jarateepachi.

⁶ Arii p'anadap'edaarāpa māga ūridak'āri māik'aapa unudak'āri irua ooda eperāarāpa p'oyaa oodak'aa āchi juadoopa, waapiara k'awa k'inia p'anajida.

⁷ Mama Felipepa uchiapik'oopachi netuaraarā merātia bee eperāarā chok'ara k'ap'iadeepa. Māgí netuaraarā āra k'ap'iadeepa bia uchua wāpachida. Ma awara Felipepa jipak'oopachi eperāarā chok'ara chiwa beerā māik'aapa p'oyaa āchi būriipa pia nipadak'aarā.

⁸ Maperā ma p'uurudepemaarā o-īa p'anapachida.

⁹ Mamīda mama bapachi eperā t'ījarapatap'edaa Simón. Māgipa petau tau k'awaa baji māik'aapa ma eujādepemaarā k'ūra p'e iru bapachi ichia oo bi k'aurepa. Mapa āchi t'āide eperā waibiak'a bapachi.

¹⁰ Waibiara beerā, ek'ariara beerāpa paara iru pedee ūri k'inia p'anapachida māik'aapa māgapachida:

—Tachi Ak'ōrépata irumaa nāga oopi bi.

¹¹ Irua jararu ijāapachida, ichi petau taupa k'ūrap'e iru bada perā. Taarāji ma k'ap'ite bi.

¹² Mama bide Felipepa jarateeki: Jesucristo Tachi Ak'ōrepa pēida māik'aapa iru k'aurepa Tachi Ak'ōrepa eperāarā p'ek'au k'achia wēpapik'oopari.

Māga ijāadak'āri, māpema imik'īraarā māik'aapa wēraarā poro choopijida.

13 Simonpa pida ijāaji. Maap'eda poro choopiji māik'aapa nipaji Felipe ome. Unuk'āri Felipepa ne-inaa oo bi eperāarāpa p'oyaa oodak'aa āchi juadoopa, ichia k'awa-e bapachi sāga k'īsiai.

14 Cristopa jirit'eradaarā Jerusalende p'anadap'edaarāpa ūridak'āri Samaria pidaarāpa ijāaruta Ak'ōrepa ooda Cristo piuda k'aurepa, mamaa pēijida Pedro Juan ome.

15 Arii panadak'āri, it'aa t'ijida Samaria pidaarā Cristode ijāapataarā pari, Tachi Ak'ōre Jaure āra ome ba chemerā,

16 waide Ak'ōre Jaure āra k'ap'iade ba che-e bada perā. Jīp'a poro choopijida Tachi Waibia Jesús t'ide, ak'ipidait'ee irude ijāadap'edaa.

17 Māpai Pedropa māik'aapa Juanpa jua bidak'āri āra īri, māgá Ak'ōre Jaure ba cheji āra ome.

18 Simonpa unuk'āri Ak'ōre Jaure che bi Cristopa jirit'eradaarāpa jua birutade eperāarā īri, p'arat'a teeit'ee paji, ichia auk'a māga ooit'ee.

19 Māgaji:

—Mimaa k'awaapidapáde aji, ichiaba mia jua bik'āri eperā īri, Ak'ōre Jaure iru ome ba chemerā.

20 Māpai Pedropa p'anauji:

—jīchi p'arat'a ome atua baileepáde aji, k'īsia bairā neto atai Tachi Ak'ōrepa oopipari ichi jirit'eradaarāmaal

21 Pīa na mimia p'oyaa oo-e, Ak'ōre k'īrapite k'īra jīp'a k'īsia-e bairā.

22 Māgá k'ĩsia amáaji māik'aapa Tachi Ak'õremaa chupiria iidíji. Māga oorura, Tachi Ak'õrepa perdonaapi pia k'achia oo k'inia bi.

23 Mia māga jara bi k'awa bairã pi t'ãride tai ome k'ĩrau bi, waibiara paruta perã pi k'ãyaara nãpemaarã k'ĩrapite. Wãara pi at'ãri p'ek'au k'achia jua ek'ari bi.

24 Māpai Simonpa p'anauji:

—Parãpa Ak'õremaa chupiria iididapáde aji mi pari, mi baainaamerã parãpa mimaa jaradap'edaade.

25 Maap'eda Pedropa Juan ome ma p'uurudepemaarãmaa jarajida áchia unudap'edaa Jesús ome nipadak'ãri. Ichiaba Tachi Ak'õrepa jara pëida jarateejida. Ma t'ëepai chejida Jerusalendee. Mamãda ode Samariade p'uuru bee chaa jaratee che wãpachida Tachi Ak'õrepa pedee pia jara pëida Cristode.

Felipe Etiopía eujãdepema poro ome unuda

26 Ma t'ëepai, Tachi Ak'õrepa ichi ángel pëiji Felipemaa jamerã:

—Wãji barree, Jerusalendee pa chonaarãwedapema Gaza p'uurudee wãpari ode. Māgí o wãyaapari eujã pania wëe bide.

27 Māpai Felipe wãji māik'aapa ode unuji eperã Etiopía eujãdepema. Māgí Etiopiadepemaarã poro waibiara paji. Áchi reina p'arat'a jãpari paji. Ichi wã baji Jerusalendee Tachi Ak'õremaa it'aa t'ide.

28 Mata waya che wãji ichi eujãdee. Su-ak'i baji ichi caballopa jidiupata carrode māik'aapa lee wãji chonaarãwedapema Ak'õre pedee jarapari Isáipa p'ãda.

29 Māgá wāde, Ak'õre Jaurepa māgaji Felipemaa:
—Wāji jā carro k'ait'a.

30 Felipe ma carro ik'aawa pak'āri, ũriji Etiopi-
adepemapa Isaíapa p'āda leemaa bi. Māpai iidiji:

—¿K'awa bik'ā aji, k'āata jara k'inia bi pia leemaa
bi?

31 Etiopiadepemapa p'anauji:

—¿Sāga mia k'awaayama aji, apidaapa mīmaa
jarateeda-eeta?

Māpai Felipemaa chupiria iidiji bataumerā
māik'aapa ichi ik'aawa su-ak'i beemerā.

32 Isaíapa p'ādadepema ichia leemaa badade nāga
p'ā baji:

'Iru ateejida oveja atepatak'a chi peepatamaa.

Ara oveja k'ĩup'ee baparik'a chi k'ara t'ĩmaa
p'anadak'āri, māga pik'a iru k'ĩup'ee baji.

33 Iru k'ĩra nejasiapijida māik'aapa maarepida
chupiria k'awada-e paji. Āchi audú t'āri k'achia-
idaa p'anadap'edaa perā, pee atapēijida. Maperā
irudeepa warra apida uchiada-e paji. Māgá iru
peedak'āri, uchiapijida na p'ek'au eujādeepa.' (Is
53.7-8)

34 Māpai Etiopiadepemapa Felipemaa iidiji:

—Mi chupiria k'awáaji. ¿K'aideta pedeemaa bima
aji, na Ak'õre pedee jaraparipa; ichide wa awaraa
eperāde?

35 Māpai Felipepa ma Etiopiadepemamaa
māgaji:

—Pia leemaa bi Tachi Ak'õre Warrade; Jesús
p'asada.

Māpai Felipepa jarateemaa beeji jōma Jesupa
ooda eperāarā k'aripait'ee.

³⁶ Maap'eda waawipai ode wāyaadak'āri pania paraamāi, māgí eperāpa māgaji:

—Nama pania paraa. ¿Sāap'eda mi poro choo-ema? aji.

³⁷ [Felipepa p'anauji:

—Pia wāara Jesucristode ijāa bi pirā, pia bida aji.

Ma eperāpa māgaji:

—Mia ijāa bida aji, Jesucristo Tachi Ak'ōre Warra.]

³⁸ Ma carro t'ibaipip'eda, āchi omeē weda irabajida māik'aapa wājida pania paraamaa. Mama Felipepa poro chooji.

³⁹ Paniadeepa uchiadak'āri, Felipe wēpadachi Tachi Ak'ōre Jaurepa ateeda perā. Ma Etiopiadepemapa waa unu-e paji. Mamīda ichi o-īa wāji ichi eujādee.

⁴⁰ Māimisa Ak'ōre Jaurepa Felipe uchiapiji Azoto p'uurude. Mamāik'aapa p'uuru bee chaa Cristopa ooda eperāarā k'aripait'ee jaratee wāpachi Cesarea p'uurude panarumaa.

9

Saulopa Cristode ijāada

(Hch 22.6-16; 26.12-18)

¹ Felipepa māga oo bi misa, Saulopa Cristode ijāapataarā peek'ooit'eeda apachi. Mapa wāji judiorā p'aareerā poro waibiamaa

² māik'aapa iidiji k'art'a p'ā teedamerā. K'īsia iru baji wāit'ee Damasco p'uurudee Tachi Ak'ōre Ode P'anirāda apata jiride, imik'īraarā wēraarā ome, māgūrā jita p'e ateeit'ee Jerusalendee. Ma k'art'a p'ādap'edaade jaraji Saulopa oo k'inia bi, judiorā

poroorãpa Tachi Ak'õre Ûraa jarateepata te bee
 chaa k'awaadamerã mãik'aapa k'aripadamerã.

³ Ma k'art'a p'ãdap'edaa atap'eda, Saulo wãji.
 Damasco k'ait'a pa wãk'ãri, it'ariipa ichi ñri ïdaa
 jëra t'ïudachi.

⁴ Mãga unuk'ãri, Saulo eujãde baainaji.
 Maap'eda pedee ùriji:

—Saulo, Saulo ¿sãap'eda miçhideerã jiri nima?
 aji.

⁵ Saulopa iidiji:

—¿Pi, k'aima? aji.

Chi pedee badapa p'anauji:

—Mi Jesupi, pia jiri ni eperãarã poro waibia.

⁶ P'irabãiji mãik'aapa wãji p'uurudee. Mama
 jaradai pia k'ãata ooit'ee.

⁷ Saulo ome wã nipadap'edaarã pedee wëe ak'inĩ
 p'aneejida p'era jõnipa, ãrapa pedee ùridap'edaa
 perã. Mamïda unuda-e paji k'aipata pedee bi.

⁸ Ma t'ëepai Saulo p'irabaidachi. Mamïda tau
 ëek'ãri, maarepida unuk'aa paji. Mãgã juade ji-
 tadap'eda, ateejida Damascodde.

⁹ K'ãima õpee mama baji tau p'ãriu; maarepida
 ne-inaa to-ee mãik'aapa nek'o-ee.

¹⁰ Ma p'uurude bapachi eperã Cristode ijãapari,
 t'ïjarapatap'edaa Ananías. Saulo mãga bi misa,
 Ak'õrepa k'ãimok'araa pik'a bide Ananías t'ïjaraji.
 Ichia p'anauji:

—Tachi Waibia, mi nama bida aji.

¹¹ Ak'õrepa mãgaji:

—Wãji calle t'ïjarapata Derechamaa mãik'aapa
 Judas tede iidiji Tarso pida, t'ïjarapata Saulo.
 Mãgipa mĩmaa it'aa t'ĩmaa bida aji.

¹² Māgimaa k'āimok'araa pik'a bide mia unupijida aji, eperā t'ijarapata Ananías wāru irumaa māik'aapa jua biru iru ĩri, waya pia unumerā.

¹³ Māga ũrik'āri, Ananiapa māgaji:

—Tachi Waibia, mia ũridooda aji, jā eperāpa pide ijāapataarā miapida Jerusalende.

¹⁴ ĩrá nama che bi p'aareerā poroorāpa k'aripa k'inia p'anadairā. Maperā pëijidada aji, pide ijāapataarā jita p'e atade.

¹⁵ Mamīda Ak'õrepa p'anauji:

—Wāpāde aji, mia iru jirit'erada perā mi ũraa jarateenamerā awaraa eujādepemaarāmaa māik'aapa āchi reyrāmaa, ichiaba Israel pidaarāmaa.

¹⁶ Mia irumaa k'awapiit'eeda aji, sāgapi iru mia iru p'anapataadait'ee, mia ooda jaratee k'inia bi k'aurepa.

¹⁷ Maap'eda Ananías wāji Saulo badamaa. Teeda panap'eda, jua bijji iru ĩri māik'aapa māgaji:

—K'õp'āyo Saulo, pia unuda ode che wāk'āri, Tachi Waibia Jesupata mi pëijida aji, pia waya unumerā māik'aapa Tachi Ak'õre Jaure ome beemerā.

¹⁸ Aramata Saulo taudeepa chik'o escamak'a baaijida māik'aapa waya pia unu beeji. Maap'eda poro choopiji Ananiamaa.

¹⁹ T'ēepai nek'oji waya juatau paraait'ee. Ewari chok'ara-ee beeji Damascodemaarā Cristode ijāapataarā ome.

Saulopa Damasco p'uurude jarateeda

²⁰ Saulopa jarateenapachi Ak'õre ũraa jarateepata tede. Jarapachi Jesuta Tachi Ak'õre Warra.

21 Māga ūridak'āri, jōmaarāpa ak'itrua para beep-achi māik'aapa māgapachida:

—¿Nāgí paji-ek'ā ajida, Jerusalende jiri nipap-ata peeit'ee jōmaweda Jesude ijāapataarā? ¿Ichiaba nama cheji-ek'ā ajida, ijāapataarā jita p'e ateede p'aareerā poroorāmaa?

22 Māga jarapachida mīda, Saulopa ewari chaa waapiara jarateepachi Jesuta Tachi Ak'ōrepa pēida eperāarā k'aripamerā. Mapa judiorā Damascode p'anapatap'edaarāpa k'awadak'aa paji k'āata k'īsiadai.

Saulo judiorā juadeepa uchiada

23 Ma t'ēpai taarā pak'āri, judiorāpa pedeeteejida Saulo peet'aadait'ee.

24 Mamīda ichia k'awaa ataji. Āstaawa māik'aapa p'ārik'ua p'uuru t'īupata chaa ot'ewa p'anapachida uchiak'āri jita atadait'ee.

25 Mamīda ijāapataarāpa k'oraa choma bide t'ī atajida māik'aapa chi p'uuru ik'aawa t'iak'au jēra bi ĩrīpa irabai pēijida. Māgá mirudachi.

Saulo Jerusalende

26 Mamāik'aapa Saulo Jerusalendee wāji. Mama ijāapataarā ome k'ōp'āyo meraa k'inia baji. Mamīda jōmaarāpa iru waawee p'anapachida. Ijāadak'aa paji wāara irua Cristode ijāa bi.

27 Awaraa ijāapataarā māga p'anajida mīda, Bernabepa ateeji Cristopa jir'it'eradaarāmaa. Nepiriji Saulopa Tachi Waibia unuda Damasco ode māik'aapa Jesupa irumaa pedeeda. Maap'eda nepiriji Saulo Damascode bak'āri, waawee-ee jarateemaa bada Jesupa ooda.

28 Māgá Saulo beeji Jerusalende māik'aapa nipapachi Cristode ijāapataarã ome. Mama bide Cristopa ooda waawee-ee jarateepachi judiorāmaa.

29 Ichiaba aupedeepachi judiorã griego pedee pedeepataarã ome. Mapa ārapa iru peet'aa k'inia p'anapachida.

30 Cristode ijāapataarāpa māga k'awaadak'āri, ateejida Cesarea p'uurudee. Mamāik'aapa pëijida Tarso p'uurudee.

31 Maapai ijāapataarã Judeadepemaarã, Galileadepemaarã māik'aapa Samariadepemaarã k'āiwee p'anapachida. Ak'õre Jaurepa āchi k'aripapachi perã, waapiara oo k'awaa wāpachida Tachi Ak'õrepa oopi k'inia bi māik'aapa chok'araara İwa wāpachida.

Pedropa eperã t'ijarapatap'edaa Eneas jipada

32 Maapai Pedropa Cristode ijāapataarāmaa p'asia nipak'āri, panaji Lida p'uurude.

33 Mama ununaji eperã t'ijarapatap'edaa Eneas. Māgí ocho años iru baji chiwa bi.

34 Ma eperã unuk'āri, Pedropa irumaa māgaji:

—Eneas, Jesucristopa pi jiparupi. P'irabaipáde aji, māik'aapa pichi p'aru bedáji.

Aramata Eneas p'irabaidachi.

35 Chok'ara Lida p'uurude p'anapatap'edaarāpa māik'aapa Sarón eujāde p'anapatap'edaarāpa Eneas jipa bi unudak'āri, Jesucristode ijāajida.

Dorcias piup'eda, chok'ai p'irabaida

36 Maapai Jope p'uurude baji wēra Cristode ijāapari, t'ijarapachida Tabita; griego pedeede Dorcas apata. Māgí wērapa awaraarā k'aripapachi māik'aapa chupiria beerāmaa ne-inaa teepachi.

37 Ma wēra k'ayaadachi māik'aapa jai-idaaji. Judiorāpa oopatap'edaak'a iru k'ap'ia k'uit'aadap'eda, te it'ipema pisode binajida.

38 Maapai Pedro Lida p'uurude baji. Lida Jope p'uuru k'ait'a bada perā, ijāapataarāpa eperāarā omé pēijida irumaa. Māganajida:

—Isapai chepáde ajida, Jopedee.

39 Pedro wāji āchi ome māik'aapa panadak'āri, ateejida piuda bīmaa. Jōmaweda p'ētrāarā jēe para baji iru ik'aawa māik'aapa Pedromaa ak'ipijida Dorcapa p'aru k'aat'ida chok'ai bak'āri.

40 Pedropa jōmaweda taawaa uchiapik'ooji. Māpai bedabaip'eda, it'aa t'iji. T'ēepai jai-idaa badamaa ak'iji māik'aapa māgaji:

—¡Tabita, p'irabáiji!

Iru tau ēeji māik'aapa Pedro unuk'āri, su-ak'i beeji.

41 Pedropa juadeepa p'irabai ataji māik'aapa t'iji p'eji chi p'ētrāarā māik'aapa awaraa ijāapataarā, āchimaa ak'ipiit'ee chok'ai bi.

42 Jopedepemaarāpa māga k'awaadak'āri, chok'ara Cristode ijāajida.

43 Maperā Pedro k'āima chok'ara beeji ma p'uurude, ne-e p'oopari t'ijarapatap'edaa Simón tede.

10

Corneliopa Pedro t'ijipēida

¹ Pedro Jope p'uurude bi misa, Cesarea p'uurude baji eperã t'ĩjarapatap'edaa Cornelio. Mãgí Romadepema soldaorã batallondepema poro paji. Ma batallón t'ĩjarapachida Italiadepema.

² Mãgí eperã t'ãri pia bapachi. Ichi tedepemaarã ome Tachi Ak'õrede ijãapachida. Ichiaba p'arat'a teepachi judiorã k'aripait'ee mãik'aapa Tachi Ak'õremaa it'aa t'ĩpachi.

³ Ewari aba a las tres, k'ãimok'araa pik'a bide taawapemak'a unuji it'aripema ángel ichimã t'ĩuru mãik'aapa jararu:

—¡Cornelio!

⁴ Corneliopa waaweede mãgí ángel k'ĩra ak'i nĩbeep'eda, iidiji:

—¿K'ãata k'inia bima? aji.

P'anauji:

—Tachi Ak'õrepa ũrijida aji, pia it'aa iidida mãik'aapa unu bi pia p'arat'a teepari chupiria beerãmaa. Pia pia oo bi iru k'ĩrapite.

⁵ Eperã pëiji Jope p'uurudee aneemerã Simón Pedro apata.

⁶ Irua pĩmaa Ak'õre net'aa jarateeit'ee. Awaraa Simón, ne-e p'oopari tede bi. Mãgí p'usa ide baparida aji.

⁷ Ma ángel ichi ome pedeemaa bada wãk'ãri, Corneliopa t'ĩ pëiji ichi mimiapataarã omé mãik'aapa Romadepema soldao aba Ak'õrede ijãa bada.

⁸ Ichia k'ãimok'araa pik'a bide unuda nepirip'eda, ãchi pëiji Jopedee.

⁹ Ai norema imat'ipa ãchi Jope p'uuru k'ait'a wãrutade, Pedro wãji terrazade it'aa t'ĩide.

10 Mama bide jarrapisia nĩbeeji. Nejoomaa p'ani misa, ichia k'ãimok'araa pik'a bide

11 unuji pajã ewadaru. Madeepa it'ariipa che wãji lienzok'a bi. Ma k'ĩ chaa jĩ beeji.

12 Mãgí p'arude ne-animalaarã k'ĩra t'ãdoo p'anajida: biiripa nĩuteepata, bipa nĩuteepata mãik'aapa wãabaipata.

13 Pedropa mãga ak'i bide pedee ũriji:

—Pedro, p'irabáiji. Péeeji mãik'aapa k'opáde aji.

14 Pedropa p'anauji:

—Tachi Waibia, k'o-eda aji, miichi t'oru weda waide k'ok'aa perã jãgee ne-animalaarã, pia k'oik'araa bida ada.

15 Waya pedee ũriji:

—Ak'õrepa k'oipia papida k'oik'araa bida anaapáde aji.

16 Jarada õpee mãga jarap'eda, mãgí lienzok'a bi waya it'aa wãji.

17 Pedropa k'ĩsia beeji k'ãata jara k'inia baji ichia unuda mãgí k'ãimok'araa pik'a badade. Mãga nide Simón te iidi wãdapa Cornelio mimiapataarã pachejida te t'ĩupata t'aide.

18 Arii panadak'ãri, iidijida:

—¿Nama bik'ã ajida, eperã t'ĩjarapata Simón Pedro?

19 At'ãri Pedro k'ĩsiamaa bide ichi k'ãimok'araa pik'a badade, Ak'õre Jaurepa mãgaji irumaa:

—Eperã õpeerãpa pi jiri nidada aji.

20 P'irabáiji mãik'aapa irabáiji. Wãji ãra ome k'ĩsia-ee, miata ãra pèida perã.

21 Pedro irabaip'eda, mãgaji ma eperãarãmaa:

—Mida aji, parāpa jiri p'ani. ¿K'āata oo che p'anima? aji.

²² P'anaujida:

—Tai chejida Cornelio, Romadepema soldaorā poropa pēida perā. Iru Tachi Ak'ōrede ijāapari māik'aapa t'āri pia bapari. Mapa jōmaweda Cesareadepema judiorāpa iru k'inia iru p'anapata. It'aripema angelpa jaraji irumaa tai pēimerā pi atade, pi iru temaa wāmerā jarateede.

²³ Māpai Pedropa teeda t'īupip'eda, nek'opiji māik'aapa p'aru teeji k'āidamerā. Ai norema, Pedro wāji āchi ome. Jopedepema ijāapataarā ūk'uruurāpa iru k'ōp'āyanajida.

²⁴ Ai norema panajida Cesareade, Corneliopa nīmaa badamāi, ichi te pidaarā ome māik'aapa ichia t'ī pēida k'ōp'āyoorā k'iniarā ome.

²⁵ Pedro ai temaa panak'āri, Cornelio taawaa cheji māik'aapa Pedro k'īrapite bedabaidachi, irumaa it'aa t'īt'ee.

²⁶ Mamīda Pedropa p'irabaipiji, māik'aapa māgaji:

—Mi jida pik'a, eperā jīp'aada aji.

²⁷ Maap'eda pedee wādapa teeda t'īujida eperāarā see nībadamāi.

²⁸ Māpai Pedropa māgaji:

—Parāpa k'awa p'anida aji, tai judiorā t'īudaik'araa bi judio-eerā tede māik'aapa k'ōp'āyo meraadaik'araa bi parā ome. Mamīda Tachi Ak'ōrepa mīmaa k'awapijida aji, jōmaarā ome k'ōp'āyo meraaipia bi.

²⁹ Maperā jararutata mi cheji, k'īsia-ee. frā k'awa k'inia bida aji, ¿k'āare-it'eeta mi t'ī pēiji?

³⁰ Corneliopa p'anauji:

—K'ãima k'ĩmari paruda aji, na horak'a k'ewara, mi it'aa t'ĩmaa bi misa, eperã p'aru uchiterree jĩ bi mi k'ĩrapite bainĩ ba cheji.

³¹ Jaraji ma eperãpa: “Cornelio, Ak'õrepa ùrijida aji, pia it'aa iidida mãik'aapa unu bida aji, pia p'arat'a teepari chupiria beerãmaa. Pia pia oo bi iru k'ĩrapite.

³² Eperã pëipáde aji, Jope p'uurudee eperã t'ĩjarapata Simón Pedro atade. Iru baparida aji, awaraa Simón ne-e p'oopari tede p'usa ide.”

³³ Maperã mia isapai pëiji pi jiride mãik'aapa pi t'ãri pia bairã, cheji. Írá nama jõmaweda p'anì misa Ak'õre k'ĩrapite, taipa ùri k'inia p'anida aji, jõma Tachi Ak'õrepa pìmaa jarapiru.

Pedropa Cornelio tede jarada

³⁴ Mãpai Pedro pedeemaa beeji:

—Írá wãara mia k'awaaruda aji, Tachi Ak'õrepa mi auk'aarã apemaarã k'ãyaara pipiara ak'i-e bi.

³⁵ Awaraa eujãdepemaarã jida k'inia iru bapari ichide ijãadak'ãri mãik'aapa ne-inaa pia oodak'ãri.

³⁶ Tachi Ak'õrepa k'awapiji Israeldeepa uchi-adap'edaarãmaa ichia ãchi k'ãiwee p'anapiit'ee Jesucristo k'aurepa, iru jõmaarã Waibia perã.

³⁷ Parãpa pia k'awa p'anì Tachi Ak'õrepa ooda Galilea eujãde mãik'aapa Judea eujãde, Juanpa poro choopia bida a nipada t'ëepai.

³⁸ Ichiaba k'awa p'anì Tachi Ak'õrepa Jesús Nazaretdepema pëida ichia oopi bik'a oomerã, ichi Jaurepa k'aripap'eda. Mãgí Jesupa ne-inaa eperãarãpa p'oyaa oodak'aa ãchi juadoopa oo nipaji mãik'aapa jipapachi eperãarã netuara merãtia

beerã. Mãga oopachi Tachi Ak'õre iru ome bada perã.

³⁹ Tai iru ome nipapatap'edaarãpa unujida jõmaweda irua ooda Judea eujãde mãik'aapa Jerusalén p'uurude. Ichiaba p'anajida iru kurusode peedak'ãri.

⁴⁰ Mamïda Tachi Ak'õrepa iru chok'ai p'irabai ataji k'ãima õpeemaa, maap'eda taimaa unupiji.

⁴¹ Judiorã jõmaarãmaa unupi-e paji. Jïp'a taimaa-paita unupiji, Tachi Ak'õrepa ai naaweda tai jirit'erada perã iru unudamerã. Chok'ai p'irabaida t'ẽepai iru tai ome nek'oji ak'ipiit'ee wãara chok'ai bi.

⁴² Ai t'ẽepai irua tai pëiji judiorãmaa jaranadamerã taipa unudap'edaa mãik'aapa jarateenadamerã iruta Tachi Ak'õrepa bida jõmaarã Waibia. Ak'õre ewari waibia ewate chok'ai p'anirãpa oopata mãik'aapa piudap'edaarãpa oopatap'edaa ak'iit'ee.

⁴³ Jõmaweda Ak'õre pedee jarapataarãpa irua ooit'ee bada k'awa p'anajida mãik'aapa jarapachida Tachi Ak'õrepa iru k'aurepa wëpapariit'ee irude ijãarutaarãpa p'ek'au k'achia oopata.

Tachi Ak'õre Jaure judio-eerãmaa cheda

⁴⁴ At'ãri Pedro pedeemaa bide, Ak'õre Jaure cheji chi ùrimaa p'anadap'edaarãmaa.

⁴⁵ Judiorã ijãapataarã Pedro ome chedap'edaarã ak'itrua para beeji, Tachi Ak'õrepa ichi Jaure ba chepida perã judio-eerã k'ap'iade.

⁴⁶ Ûripachida pedee para bi ãchia k'awada-e p'ani pedeede mãik'aapa Ak'õremaa it'aa iidi para bi.

⁴⁷ Māpai Pedropa māgaji:

—Tachi Ak'õrepa na eperãarãmaa ichi Jaure pëiru taimaa pëidak'a. Māga bita, ¿k'aipa poro choonaapáde adayama? aji.

⁴⁸ Māpai Pedropa jaraji Jesucristo t'ide poro choopidamerã. Maap'eda Corneliopa chupiria iidiji Pedromaa ãchi ome taarã beemerã.

11

Pedropa nepirida ijãapataarã Jerusalende p'anadap'edaarãmaa

¹ Cristopa jirit'eradaarã māik'aapa apemaarã ijãapataarã Judea eujãde p'anirãpa ũrijida judio-eerãpa Tachi Ak'õrepa jara pëida ũridap'eda, ichiaba Cristode ijãadap'edaa.

² Mapa Pedro waya chek'ãri Jerusalendee, ũk'uru judiorã Cristode ijãa p'anadap'edaarã k'ĩrau p'anajida irua ooda k'aurepa judio-eerã t'ãide.

³ Iidijida:

—¿Sãap'eda judio-eerã ak'inajima? ajida.
¿Sãap'eda ãra ome nek'ojima? ajida.

⁴ Māpai Pedropa nepirimaa beeji jõmaweda Tachi Ak'õrepa ichimaa k'awapida:

⁵ —Mi bajida aji, Jope p'uurude. It'aa t'ĩmaa bide k'ãimok'araa pik'a bide unuji lienzok'a bi it'ariipa mimaa che wã. Ma k'ĩ chaa jĩ beeji.

⁶ Pi-ia ak'iji k'awaait'ee k'ãata edajãde paraaji. Unuji ne-animalaarã k'ĩra t'ãdoo, biripa nĩuteepata, k'achia beepata, bipa nĩuteepata māik'aapa wãabaipata.

⁷ Maap'eda pedee ũriji: “Pedro, p'irabáiji. Peep'eda, k'óji.”

8 Māpai mia p'anauji: “Waide jāgee ne-animalaarã pia k'oik'araa bida adadepema k'ok'aada” aji.

9 Māpai it'ariipa waya pedeeji: “Ak'õrepa k'oipia papida k'oik'araa bida anáaji.”

10 Jarada õpee mǎga jaraji. Maap'eda ma lien-zok'a bi waya it'aa jidiu ataji.

11 Aramata eperǎarã õpee pëidap'edaa Cesaread-eepa mi jiri chejida mi te badamãi.

12 Tachi Ak'õre Jaurepa mĩmaa jaraji wǎmerã āra ome, k'ĩsia-ee. Na k'õp'ǎyoorã seis wǎjida ichiaba mi ome. Jõmaweda t'ĩujida ma eperã ichi mimiap-ataarã pëi bada temãi.

13 Ma eperãpa taimaa nepiriji ichia ángel un-uda mǎik'aapa ma angelpa jarada: “Eperã pëipáde aji, Jope p'uurudee eperã t'ĩjarapata Simón Pedro atanadamerã.

14 Irua jarayada aji, sǎga Ak'õrepa pi o k'achiadeepa k'aripa atai pichi te pidaarã ome.”

15 'Mi pachep'eda, pedeemaa beek'ãri, Ak'õre Jaure āramaa cheji, naaweda tachi judiorãmaa chedak'a.

16 Mǎga pak'ãri, mia k'irǎpaji Tachi Waibiapa jarada: “Wǎara Juan Bautistapa poro choopachi paniapa. Mamĩda Tachi Ak'õrepa ichi Jaure ba chepiit'ee parã k'ap'iade.”

17 Mǎgá mia k'awaaji Tachi Ak'õrepa ichi Jaure ba chepi k'inia bi āra ome tachi ome ba chepidak'a, auk'a ijǎapata perã Tachi Waibia Jesucristode. Mǎga bita ¿sǎga mia Tachi Ak'õrepa ooda k'achia bida ayama? aji.

18 Jerusalendepema ijǎapataarãpa mǎga ũridak'ãri, k'ĩup'ee para beeji. Maap'eda it'aa t'ĩjida

Tachi Ak'õremaa. Mågajida:

—¡Mågara Tachi Ak'õrepa ichi Jaure judio-eerã k'ap'iaide ichiaba ba chepiit'ee, k'achia oodaamaa p'aneedak'ãri mãik'aapa Jesucristode ijãadak'ãri! ¡Mågá ichita iru ome chok'ai p'anapataadait'ee!

Ijãapataarã Antioquía p'uurude chip'epatap'edaa

¹⁹ Esteban piuda t'ëepai, Jesucristode ijãapataarã jirĩmaa p'anadak'ãri peedait'ee, ùk'uru miruk'oodachida Fenicia eujãdee, Chipre isladee mãik'aapa Antioquía p'uurudee. Æchi wãdap'edaa chaa Cristopa ooda eperãarã k'aripait'ee jarateepachida judiorãmaa aupai.

²⁰ Mamĩda Cristode ijãapataarãpa Chiprede-pemaarã mãik'aapa Cirene p'uurudepemaarã chedap'eda Antioquía p'uurude, Jesupa ooda eperãarã k'aripait'ee jarateepachida judio-eerãmaa.

²¹ Tachi Ak'õrepa ãra k'aripaji. Mapa judio-eerã chok'ara Jesucristode ijãa p'aneejida.

²² Ijãapataarã Jerusalendepemaarãpa mãga ùridak'ãri, Bernabé pëijida Antioquiadee.

²³ Panak'ãri, Bernabepa unuji Tachi Ak'õrepa ãra k'aripada. Mapa o-ĩadachi. Ûraaji t'ãripa Cristode ijãadamerã mãik'aapa irua oopi bik'a oodamerã.

²⁴ Bernabé eperã t'ãri pia bapachi. Cristode pia ijãapachi mãik'aapa oopachi Tachi Ak'õre Jaurepa oopi bik'a. Maperã eperãarã chok'ara Cristode ijãajida iru k'aurepa.

²⁵ Ma t'ëepai Bernabé wãji Tarso p'uurudee Saulo jiride.

²⁶ Unu atak'ãri, ateeji Antioquiadee. Mama p'aneejida año aba ijãapataarã ome jarateemaa

Cristopa ooda eperãarã k'aripait'ee. Eperãarã chok'araarãpa ãchia jarateeda ũripachida. Antioquía p'uurude naapiara Cristode ijãapataarã t'ĩ bijida Cristodeerã.

²⁷ Maapai Ak'õre pedee jarapataarã ũk'uru wãjida Jerusalendeepa Antioquiadee.

²⁸ Mama p'anide mãirãdepema aba t'ĩjarapatap'edaa Agabo, ijãapataarã k'ĩrapite bainĩ beep'eda, Tachi Ak'õre Jaurepa jarapiji jarra oodait'ee jõmaweda Roma jua ek'ari p'anirã eujãde. Wãara, ai t'ẽepai mãgipa jaradak'a p'asaji César Claudio Romadepema reyrã poro waibia bak'ãri.

²⁹ Antioquiadepema Cristode ijãapataarãpa mãga ũridak'ãri, pedeeteejida Judeadepema ijãapataarã k'aripadait'ee, ãchia p'arat'a teedai pitapai.

³⁰ Mãgí p'arat'a p'edap'eda, Judeadepema ijãapataarã ak'ipataarãmaa tee peijida Bernabé ome mãik'aapa Saulo ome.

12

Santiago peedap'edaa mãik'aapa Pedro carcelde t'ĩ nĩbidap'edaa

¹ Bernabé Saulo ome Antioquía p'uurude at'ãri p'ani misa, Rey Herodepa Cristode ijãapataarã ũk'uru jirĩmaa beeji miapiit'ee.

² Jaraji Juan ïpema, Santiago espadapa peet'aadamerã.

³ Herodepa k'awaak'ãri judiorã o-ĩa p'ani ichia oo bi unudap'eda, ichiaba Pedro jita atapiji. Mãga ooji judiorãpa fiesta pan levadura wẽe k'opata oo p'anide.

4 Pedro jita atadap'eda, Herodepa carcelde t'i nĩbĩpiji. Mama Romadepema soldaorã dieciséis p'epachida k'ĩmarik'ĩmarii carcel jĩadamerã. Herodepa k'ĩsia iru baji Pedro imiateeit'ee eperãarã taide Pascua fiesta t'ẽepai.

5 Māgá Pedro baji carcelde jĩapari paraa. Mamĩda awaraa Cristode ijãapataarãpa ewari chaa it'aa t'ĩpachida iru pari.

Tachi Ak'õrepa Pedro uchiapida carceldeepa

6 Herodepa Pedro imiateeit'ee pada ewate ai noreweda p'ãrik'ua, Pedro jua cadenapa soldao jua k'ĩraichaa jĩp'eda, k'ãi baji ãchi esajĩak'a. Mãmisa apemaarã soldaorã taawa jĩamaa p'anapachida chi t'ĩupatamãi.

7 Māga nide Pedromãi ĩdaadachi mãik'aapa it'aripema ángel bainĩ ba cheji. Māgipa Pedro orromãi t'õbaiji mãik'aapa māgaji:

—ĩsapai p'irabáiji!

Māga jararuta, cadena baaik'oodachida Pedro juadeepa.

8 Māpai ma angelpa māgaji:

—P'aru jĩ beep'eda, pichi chancla jĩ béeji.

Māga ooji Pedropa. Maap'eda māgaji angelpa:

—Pichi ĩripema p'aru jĩ beep'eda, mi ome chéji.

9 Pedro uchiaji iru t'ẽe, k'awa-ee wãara wa seewa angelpa oo bi. Ichi k'ĩsia-it'ee k'ãimok'araa pik'a baji.

10 Mamĩda wãyaajida chi jĩapari naapema, maap'eda araarepema ichiaba. Carcel puerta hierrodee ooda badamãi pachedak'ãri calle jãdee uchiadait'ee, ma puerta ichi itu ewadachi.

Uchiadap'eda, calle jãde wãjida mãik'aapa ma angelpa ituaba atabëji.

11 Mãpai Pedropa k'awaaji k'ãimok'araa-e bi. Mapa mågaji:

—Írá mia k'awa bida aji, wãara Tachi Ak'õrepa ichi ángel pëiji mi k'aripait'ee Herodes juadeepa mãik'aapa judiorã poroorã k'achia oodait'ee padadeepa.

12 Mãga k'awaak'ãri, Pedro wãji María temaa. Mãgí Juan nawe paji. Ma Juan ichiaba t'ijarapachida Marcos. Arii ijãapataarã chok'ara it'aa t'ímaa p'anajida Pedro pari.

13 Ma te t'íupata taawaik'a eereepa Pedropa t'íji. Mãpai te ak'ipari awëra Rode apatap'edaapa ak'i cheji k'awaait'ee k'aita mãga ni.

14 Pedro otau k'awaak'ãri, o-ĩadachi. O-ĩapa puerta ewa-ee, edaa p'iradachi jarade Pedro taawa bi.

15 Mãga ũridak'ãri, mågajida:

—¿K'íra k'awa-ee nĩbik'ã? ajida.

Mamĩda ichia wãarada ak'ãri, ãchia mågapachida:

—Iru-epi, Tachi Ak'õre angelpi; iru ome nipa-parida ajida.

16 Mãimisa Pedropa taawaik'a eereepa t'ímaa bapachi. Mãpai puerta ewadap'eda, unudak'ãri, p'eradachida.

17 Mamĩda ichi juapa jaraji k'íup'ee p'aneedamerã mãik'aapa nepiriji sãga Tachi Ak'õrepa ichi carceldeepa uchua atada. Maap'eda mågaji:

—Nepiride wãti Santiagomaa mãik'aapa ape-maarã Cristode ijãapataarãmaa.

T'ēepai Pedro wāji awara āyaa.

¹⁸ Ewarik'āri, carcelde k'īraupik'a para beeji, k'awada-e pada perā sāmaa wāji Pedro.

¹⁹ Herodepa k'awaa atak'āri, jaraji jirīnadamerā. Mamīda p'oyaa unuda-e pada perā, chi soldaorā jīa p'anadap'edaarāmaa iidip'eda, jita p'e atapiji māik'aapa peepik'ooji. Ma t'ēepai Herodes uchiaji Judeadeepa māik'aapa Cesarea p'uurude banaji.

Herodes piuda

²⁰ Maapai Herodes k'īrau baji Tiro p'uurudepemaarā ome māik'aapa Sidón p'uurudepemaarā ome. Mapa āchi wājida iru ome pedeede. Mamīda panadak'āri, p'aaajida Herodes mimiapataarā poro aba, Blastomaa, irua naapiara chupiria iidinamerā āchi pari, chōoda-e pait'ee. Māga oojida āchia ne-inaa k'odait'ee netonapachida perā Herodes jua ek'ari p'anadap'edaarā eujāde.

²¹ Ma eperāpa iidinak'āri, Herodepa jaraji ichia jararu ewate chedamerā. Ma ewate pak'āri, ichi p'aru pia jī beep'eda, rey su-ak'i beeparide su-ak'i banaji māik'aapa pedeemaa beeji.

²² Ichi pedeemaa ūridak'āri, eperāarā biuk'a nībeeji māik'aapa māgapachida:

—Nāgí eperā nama pedeemaa bi eperā-eda ajida. Ak'ōre waibiak'ata bida apachida.

²³ Aramata, angelpa Herodes k'ayaapit'aaji, irua itria-e pada perā māga jaradak'āri. Mapa mok'it'a k'ida p'uapa piuji.

²⁴ Maapai ijāapataarã chok'araara ïwa wāpachida. T'imipiara jaratee wāpachida Tachi Ak'õrepa ooda Cristo piuda k'aurepa.

²⁵ Bernabé Saulo ome Jerusalendepema ijāapataarāmaa tee chejida ma p'arat'a ijāapataarāpa teedap'edaa Antioquiade. Maap'eda waya wājida Antioquiadee. Ñchi ome ateejida Juan. Māgí ichiaba t'ïjarapachida Marcos.

13

Tachi Ak'õre Jaurepa Bernabé Saulo ome awara bida

¹ Antioquiadepema Cristode ijāapataarã t'ãide paraaji Ak'õre pedee jarapataarã māk'aapa jarateepataarã. Māgírã paji Bernabé, Simón (ichiaba t'ïjarapata Nerro), Lucio Cirene p'uurudepema, Menahem (auk'a warida Galilea pidaarã poro Herodes ome) māk'aapa Saulo.

² Ewari aba mairã it'aa t'ïmaa p'anide nek'oda-ee, Ak'õre Jaurepa māgaji:

—Awara bidadapé aji, Bernabé māk'aapa Saulo, mia ãra jirit'erada perã oodamerã mimia mia k'ïsia iru bi ãchi-it'ee.

³ It'aa t'ïdap'eda nek'oda-ee, māgírã ïri jua bijida, maap'eda pëjida.

Saulo Bernabé ome Chipre islade

⁴ Tachi Ak'õre Jaurepa māgá pëida perã, Bernabé Saulo ome wājida Seleucia p'uurudee. Mama barcode bataudap'eda, Chipre isladee wājida.

⁵ Salamina p'uurude panadak'ãri, Tachi Ak'õrepa ooda Cristo piuda k'aurepa judiorāmaa jarateemaa p'aneejida, Tachi Ak'õre Ûraa

jarateepata tede. Ichiaba Juan Marcos mama nipaji āchi ome k'aripait'ee.

⁶ Chipre isla jōmaweda b̄ir̄ipa wāyaa wādapa, jaratee wājida Pafos p'uurude panarutamaa. Mama ununajida judío t'ijarapatap'edaa Barjesús. Māgipa petau tau k'awaa baji. Seewa-idaa bapachi, ichia Tachi Ak'ōre pedee jaraparida apachi perā.

⁷ Māgí Romadepema poro Sergio Paulo k'ōp'āyo paji. Sergio Paulo k'īsia k'awaa baji. Mapa t'ī pēiji Bernabé māik'aapa Saulo, ūri k'inia bada perā āchia jarateepata Tachi Ak'ōrepa ooda Cristo piuda k'aurepa.

⁸ Mamīda āchia jarateemaa p'ani misa, māgí petau tau k'awaa b̄ipa, (griego pedeede Elimas apatap'edaa) jarapachi Romadepema poromaa irua ijāanaamerā āchia jaratee p'ani.

⁹ Māpai Saulo, ichiaba Pablo apatap'edaapa, Ak'ōre Jaure iru ome bapachi perā, māgí petau tau k'awaa bi k'īra pia ak'iji māik'aapa māgaji:

¹⁰ —iSeewa-idaa, netuara warra! iK'achia ooyaa bi! ¿Chīara k'ūra k'inia bi-ek'ā seewa jara b̄ipa? ¿Sāap'eda Ak'ōrepa jarateepida pia seewada aparima?

¹¹ Iraweda Ak'ōrepa pi k'achia ooit'ee. Pi tau p'āriu baibeeit'ee. Taarā māgá nipait'eeda aji, ak'ōrejīru unu-ee.

Aramata Elimas tau p'āriudachi māik'aapa pariatua j̄iri nipapachi ichi juadeepa jidibai ateedamerā.

¹² Romadepema poropa māga unuk'āri māik'aapa āchia jaratee p'ani ūrik'āri, k'awaaji

wäärata pedee p'ani. Mapa Cristode ijãaji.

Pablo Bernabé ome Antioquía p'uurude

¹³ Pablo mãik'aapa ichi ome nipapatap'edaarã Pafos p'uurudeepa barcode wãjida Perge p'uurudee. Mãgí p'uuru Panfilia eujãde bi. Mama p'anide Juan Marcopa ãchi atabëiji mãik'aapa ãpítee wãji Jerusalendee.

¹⁴ Mamãda ãchi Pergedeeepa wãjida Antioquía p'uurudee. Mãgí p'uuru Pisidia eujãde bi. Mama p'anide ñipata ewate t'ñujida judiorã Tachi Ak'õre Ũraa jarateepata tede mãik'aapa su-ak'i p'aneejida.

¹⁵ Mãgí tedepema judiorã poroorãpa Moisepa p'ãda mãik'aapa Ak'õre pedee jarapataarãpa p'ãdap'edaa pedeedap'eda, jara pëijida Pablomaa mãik'aapa Bernabemaa:

—Tachi auk'aarã, parãpa eperãarãmaa pedee pia jara k'inia p'ani p'irã, ñraweda jaradapãde aji.

¹⁶ Mãpai Pablo it'a ak'iní beep'eda mãik'aapa juapa jarap'eda k'ñup'ee p'aneedamerã, mãgaji:

—Ũrítí Israel pidaarã mãik'aapa parã awaraa eujãdepemaarã, Tachi Ak'õrede ijãa p'anirã.

¹⁷ Tai Israel pidaarãpa ijãa p'anida aji, chonaarãweda Tachi Ak'õrepa tai chonaarã jirít'eraji ichi-it'ee. ãchi ñwapiji Egiptode, at'ãri awaraa eujãdepemaarãk'a p'anajida mïda. Ichi juapa ãchi mamãik'aapa uchiapiji, ichi jõmaarã k'ãyaara waibiara bairã.

¹⁸ Ma awara ãchi ak'ipachi cuarenta años eujã pania wëe bide wãyaadak'ãri.

19 Canaán eujãde panadak'ãri, ichia Canaandepema awara-awaraa to pidaarã siete k'iniipiji, ãra eujã tai judiorã chonaarãpa atadamerã.

20 Ak'õrepa tai judiorã jirít'eradak'ãriipa mǎgí eujã Canaãnde atarutamaa cuatrocientos cincuenta años paji.

'Ma t'ẽepai Tachi Ak'õrepa eperãarã charraarãk'a bijí aba-abaa, ãchi ak'ipataadamerã, ichi pedee jarapari Samuel ãchi poro waibia parumaa.

21 Mǎpai ãchia iidijida Samuelmaa rey bimerã ãchi ak'ipari. Mapa Tachi Ak'õrepa Saúl ãchi rey papiji cuarenta años. Mǎgí Quis warra paji, Benjamín ãreerãdepema.

22 Ai t'ẽepai Saúl uchiapip'eda, Tachi Ak'õrepa Rey David bijí iru pari. Mǎgaji:

'Mia Jesé warra David unujida aji, mia k'inia bik'a. Ichiaba mia k'awa bida aji, irua ooit'ee mia oopi k'inia bik'a.' (1 S 13.14)

23 'Rey David ãreerãdeepa uchijai Tachi K'aripapari. Mǎgí Jesús, Tachi Ak'õrepa pãida Israel pidaarã k'aripamerã, ichia naaweda jaradak'a ichi pedee jarapataarã it'aideepa.

24 Mǎgí Jesús chei naaweda, Juan Bautistapa jarateepachi jõmaweda Israel pidaarãmaa ãchi p'ek'au k'achia oo amaadamerã mǎik'aapa poro choopidamerã.

25 Mǎpai Juanpa, ichi mimia aupa wãk'ãri, mǎgaji:

'Mi parã poro waibia-e, parãpa k'ĩsia p'anik'a. Mamãda mi t'ẽepai cheit'eeda aji, eperãarã poro waibara bi. Mia iru chancla jida

ẽraik'araa bida aji, iru mi k'ãyaara waibiara bairã.' (Mr 1.7)

26 'Michi auk'aarã, Abrahamdeepa uchiadap'edaarã, ichiaba parã judio-eerã, jüriti! Tachi Ak'õrepa tachi jõmaarãmaa jara pëi bi sãga ichia tachi o k'achiadeepa k'aripa ata k'inia bi.

27 Eperãarã Jerusalende p'anapatap'edaarãpa mãik'aapa ãchi poroorãpa k'awada-e p'anajida Jesús Tachi Ak'õrepa pëida eperãarã k'aripamerã. Ichiaba k'awadak'aa paji Tachi Ak'õrepa jara k'inia bada chonaarãwedapema Ak'õre pedee jarapataarãpa p'ãdap'edaade, ñipata ewari chaa judiorãpa mãgí leepata mĩda Ak'õre Ûraa jarateepata tede. Maperã ãchiata oojida ma ùraade jaradap'edaak'a Jesús peepidak'ãri.

28 Irua maarepida k'achia oo-e paji. Mamĩda ãchia iru pee k'inia p'anajida. Mapa Pilatoma iidinajida peepit'aamerã.

29 Maap'eda jõma oodap'eda iru ome Tachi Ak'õre Ûraa p'ãdade jara badak'a, awaraarãpa kurusodeepa irabai atadap'eda, ñanajida.

30 Mamĩda Tachi Ak'õrépata chok'ai p'irabaipiji.

31 Ai t'ẽepai iru ome chedap'edaarãpa Galileadeepa Jerusalendee unuda chok'ara unupachida, mãik'aapa ñrá tai auk'aarãmaa ãchia unudap'edaa jara p'ani.

32 Mapa taipa parãmaa nãgí pedee pia jara k'inia p'ani. Tai judiorã chonaarãmaa Tachi Ak'õrepa jaraji

33 aba pëiit'ee eperãarã k'aripade. Mamĩda ichia mãgí pëi-e paji tai chonaarã chok'ai p'ani weda. Jĩp'a pëiji ãhideepa uchiadap'edaarã,

tachi ñrapemaarã chok'ai p'anide. Mãgí pëida paji ichi Warra Jesús, ichia chok'ai p'irabaipida. K'awa p'ani ichi Warra pëiji ichi ñraa p'ãdadepema Salmode jara bairã:

'Mia idi jõmaarãmaa jara bi pi mi Warra.' (Sal 2.7)

³⁴ Tachi Ak'õrepa jaraji ichi Warra chok'ai p'irabaipiit'ee, waa piu-e pait'ee ichi ñraa p'ãdade jara bik'a:

'Rey Davidmaa jaradak'a mia ooit'ee, mia wãarata jarapari perã.' (Is 55.3)

³⁵ Ichiaba jara bi awaraa Salmo p'ãdade:

'Pia mi k'ap'ia beraupi-e pait'ee, mia oopari perã pia mĩmaa oopi bik'a.' (Sal 16.10)

³⁶ 'Wãara na eujãde bak'ãri, Rey Davidpa ooji Tachi Ak'õrepa k'ĩsia iru badak'a. Maap'eda jai-idaaji. Iajida chi ak'õreerã ik'aawa mãik'aapa ichi k'ap'ia beraudachi.

³⁷ Mamĩda Tachi Ak'õrepa Jesús chok'ai p'irabaipida k'ap'ia berau-e paji.

³⁸ Maperãpi, tachi auk'aarã, k'awaadaipia bi Tachi Ak'õrepa tachia p'ek'au k'achia oopata wẽpapipari Jesús piuda k'aurepa.

³⁹ Ma k'aurepa ichide ijãapataarã p'ek'au k'achia wẽe p'ani Tachi Ak'õre k'ĩrapite. Moisepa p'ãdak'a oodap'edaa k'aurepa p'ek'au k'achia wẽpak'aa paji mĩda, Tachi Ak'õrepa Jesude ijãapataarã p'ek'au k'achia wẽpapipari, Jesupa ooda k'aurepa.

⁴⁰ K'ĩrak'aupai p'anadaí Tachi Ak'õre pedee jarap-ataarãpa p'ãdap'edaade jara bik'a:

⁴¹ 'Ūrítĩ parã chi oo iru p'anapataarãpa Tachi Ak'õrepa jara bi. Ak'ítĩ mãik'aapa ak'itrua para báti. Parã at'ãri chok'ai p'anide

mia ooit'ee ne-inaa parāpa ijāada-e pai,
ai naaweda abaapa parāmaa māga jararu
pijida.' *(Hab 1.5)*

⁴² Pablo Bernabé ome judiorā Ak'ōre Ūraa jara-
teepata tedeepa uchiadak'āri, chi waa k'awa k'inia
p'anadap'edaarāpa chupiria iidijida ñipata ewate
pak'āri waya jaratee chedamerā.

⁴³ Judiorā māik'aapa judio-eerā Tachi Ak'ōrede
ijāapataarā uchiadap'eda, chok'ara wājida Pablo
māik'aapa Bernabé t'ēe. Maperā āchia ma Ak'ōrede
ijāapatap'edaarāmaa ūraajida k'irāpadamerā Tachi
Ak'ōrepa āchi k'aripada Cristo piuda k'aurepa.

⁴⁴ Apema tomiade ñipata ewate, perá jōmaweda
p'uuru pidaarā cheepurujida Ak'ōrepa jarapida
ūride.

⁴⁵ Mamīda judiorāpa unudak'āri eperāarā
chok'ara see nībi, k'īraudachida māik'aapa
Pablomaa ik'achia jaramaa p'aneejida, Cristo
āpite paara.

⁴⁶ Māpai Pablopa Bernabé ome waawee-ee
p'anaujida:

—Tachi Ak'ōrepa tai naapiara pēijida ajida,
parā judiorāmaa ichia jara pēida Cristode
jarateedamerā. Mamīda parāpa ūri k'iniada-e
p'anadairā, pāchi k'īradoopa atuadait'ee. Māga
p'anadairā, tai wādait'ee judio-eerāmaa jarateede.

⁴⁷ Māga oodait'ee Tachi Ak'ōre Ūraa p'ādade jara
bairā:

'K'ōp'āyoorā ome lámpara pēipatak'a ĩdaamerā
ode p'ārik'ua nipadak'āri, māga pik'a
mia pi pēiru mi o ak'ipimerā na p'ek'au
eujādepemaarāmaa. Mīa māgá pēiru k'inia

bairã pia chi t'imiara beerã paara o k'achiadeepa k'aripa atamerã.' (Is 49.6)

48 Judio-eerãpa mãga ũridak'ãri, o-ia para beeji mãik'aapa Tachi Ak'õrepa jara pëida pia bida apachida. Mãpai Cristode ijãajida chi Tachi Ak'õrepa k'ĩsia iru bada ichita chok'ai p'anapataadamerã.

49 Mãgiiirãpa Tachi Ak'õrepa ooda jaratee wãpachida ãchi wãrutamaa. Cristo piuda k'aurepa irua tachi o k'achiadeepa k'aripa ataji.

50 Mamida judiorãpa pedeejida wëraarã ãchik'a Tachi Ak'õre waaweeepataarã ome. Pablo Bernabé ome ãpíte ik'achia pedeejida. Maperã ma p'arat'ara beerãpa mãik'aapa imik'ĩraarã chi p'uuru pidaarã poroorãpa Pablo Bernabé ome ma eujãdeepa jëret'aajida.

51 Mãirãpa mãga oodak'ãri, Pablo Bernabé ome ãchi bĩri p'ora nëep'ejida ak'ipidait'ee waa jarateeda-e pait'ee ma judiorãmaa, Cristode ijãadak'aa p'anadap'edaa perã. Maap'eda wãjida Iconio p'uurudee.

52 Pablo Bernabé ome mãgá jërek'oojida mĩda, chi Cristode ijãapataarã ma eujãde o-ia p'anajida, Tachi Ak'õre Jaure ãchi ome bada perã.

14

Pablo Bernabé ome Iconio p'uurude

1 Iconiode panadak'ãri, oojida Antioquiade oodap'edaak'a. T'ũjida judiorã Ak'õre Ũraa jarateepata tede mãik'aapa jarajida Tachi Ak'õre Jaurepa jarapidak'a. Mapa judiorã chok'ara Cristode ijãajida, judio-eerã jida ichiaba.

2 Mamĩda judiorã Cristode ijãa k'iniada-ee p'anadap'edaarãpa pedee k'achia jaramaa p'aneejida Pablo mãik'aapa Bernabé ãpĩte. Mapa judio-eerã k'ĩraudachida ãra ome.

3 Mãga p'anajida mĩda, ãchi omé arii taarãjida mãik'aapa waawee-ee jarateepachida Tachi Ak'õrepa jarapidak'a, Cristopa ãchi k'aripa bapachi perã. Jarateepachida Tachi Ak'õrepa eperãarã pia ooda Cristo piuda k'aurepa. Maperã Ak'õrepa ãchimaa oopiji ne-inaa eperãarãpa p'oyaa oodak'aa ãchi juadoopa.

4 Mamĩda, mãga oo p'anajida mĩda, ma p'uuru pidaarã k'ĩsia awara-awaraa p'anajida. Ûk'uru judiorã eere p'anajida, jõdee chi apemaarã Cristopa jirit'eradaarã eere.

5 Maapai ùk'uru judiorã mãik'aapa judio-eerã pedeetejida ãchi poroorã ome miapidait'ee; mãupa bat'a peedait'ee.

6 Mamĩda Pablopa Bernabé ome k'awaadak'ãri, mirudachida Licaonia eujãdee, Listra p'uurude mãik'aapa Derbe p'uurude, ichiaba ma p'uuru ik'aawa.

7 Mama ichiaba Jesupa ooda eperãarã k'aripait'ee jarateepachida.

Listrade Pablomaa mãupa bat'adap'edaa

8 Listra p'uurude p'anide unujida eperã p'oyaa t'iak'aa bi, ichi t'oru weda chiwa bada perã. Ma eperã su-ak'i baji

9 ùrimaa Pablopa jarateemaa bi. Pablopa irumaa ak'ik'ãri mãik'aapa unuk'ãri wãara ijãa bi, k'awaji jipaipia bi.

10 Mapa ma eperãmaa golpe pedeeji:

—P'irabáiji m̄aik'aapa j̄ip'a bainĩ béeji.

Aramata ma eperã p'inajĩti bainĩ beeji m̄aik'aapa p'irria beeji.

11 Pablopa ooda unudak'ãri, arii p'anadap'edaarã biuk'a n̄ibeeji Licaonia pidaarã pedeede. Mamĩda Pablopa Bernabé ome ãrapa jara p'ani k'awada-e paji. Árapa m̄agajida:

—jNãgiĩrã ak'õre waibiarã, it'ariipa edaa che p'ani tachi t'ãide eperãarãk'a!

12 M̄apai Bernabé t'ĩ bijida Greciadepemaarã ak'õre waibia Zeus. Jõdee Pablo t'ĩ bijida Hermes, ichiata pedee bapachi perã.

13 Ma p'uuru t'ĩupata k'ait'a Zeumaa it'aa t'ĩpata te iru p'anajida. Maperã atapijida Zeus p'aaremaa aneemerã p'ak'a imik'ĩra, paadait'ee Pablo m̄aik'aapa Bernabé k'ĩrapite; ma awara nep'ono aneemerã teedait'ee Pablomaa m̄aik'aapa Bernabemaa, ãchi ak'õre waibiarã j̄iak'aapa.

14 Mamĩda Bernabé Pablo ome k'awaadak'ãri m̄agá oo p'ani it'aa t'ĩdait'ee ãchi k'ĩrapite, ãchi p'aru j̄et'aajida t'ãri p'uapa. Maap'eda nãga bia t'ĩudachida eperãarã t'ãide:

15 —Eperãarã, ¿sãap'eda nãga oorutama? ajida. Tai ichiaba eperãarãpi parãk'a. Ma-it'eepi tai che p'ani jaradait'ee nãgee net'aa vale-ee baibide ijãa amaadamerã; ma k'ãyaara Tachi Ak'õrede ijãadamerã, iru ichita bapari perã. Tachi Ak'õrepa ooji pajã, na eujã, p'usa m̄aik'aapa ne-inaa j̄omaweda aide n̄ibi.

16 Naaweda Tachi Ak'õrepa na p'ek'au eujãdepemaarãmaa ita-aria ãchia oo k'iniata oopiji.

17 Mamída ichia ãra ak'i baji. Mãga oo bïpa ak'ipiji ichi Tachi Ak'õre. Ichiata parã-it'ee k'oi chepipari ne-uu pia chaumerã. Mãgá iru p'ani nek'odait'ee mãik'aapa o-ïa p'anadait'ee.

18 Pablopa Bernabé ome ma jõma jarajida mïda, perá p'oyaada-e paji eperãarã p'ak'a imik'ïra peenaadamerã mãik'aapa it'aa t'ïnaadamerã ãchi k'ïrapite.

19 Ai t'ëepai pachejida judiorã Antioquía p'uurudeepa mãik'aapa Iconio p'uurudeepa. Eperãarã ãchi eere pa atadap'eda, Pablomaa mãupa bat'ajida peet'aadait'ee. Piu bi jïak'aapa, p'uuru k'idaa jidiu baibinajida.

20 Mamída Cristode ijãapataarã Pablomãi seedaidak'ãri, waya p'irabaiji. Maap'eda waya wãji p'uurudee mãik'aapa ai norema wãji Bernabé ome Derbe p'uurudee.

21 Cristopa ooda eperãarã k'aripait'ee jarateedak'ãri Derbede, eperãarã chok'ara ijãajida. Mama bap'eda, ãpïtee chejida Listradee, Iconiodee mãik'aapa Antioquiadee.

22 Ma nipadap'edaa chaa ùraajida Cristode ijãapataarã waapiara ijãa p'aneedamerã mãik'aapa mãgajida:

—It'aa wãdai naaweda, tachi ichita miadait'eeda ajida, Cristode ijãapata perã.

23 Ichiaba ijãapataarã para bee chaa ùk'uru jirit'erajida ijãapataarã ak'i p'anapataadamerã. Mãpai it'aa t'ïdap'eda nek'oda-ee, ijãapataarã jõmaweda Ak'õre juade bijida.

Pablo Bernabé ome Antioquía p'uurudee wãdap'edaa

24 Maap'eda Pisidia eujãde wãyaajida Panfilia eujãde panarutamaa.

25 Mama bide Ak'õrepa jarapidak'a jarateejida Perge p'uurude. Mamãik'aapa wãjida Atalía p'uurudee.

26 Mama barcode bataudap'eda, wãjida Antioquia p'uurudee, chi ijãapataarãpa Ak'õre juade bidap'edaamãi, irua ãchi pia ak'i bapariimerã. Mãgá irua k'aripapachi perã, ãchia oojida jõma irua k'inia badak'a oodamerã ma wãdade.

27 Pachedak'ãri Antioquiade, Cristode ijãapataarã t'ĩ p'ejida mãik'aapa nepirijida Tachi Ak'õrepa ãchi pari ooda. Ichiaba nepirijida Ak'õrepa judio-eerãmaa ijãapida.

28 Maap'eda Pablo Bernabé ome mama taarã p'aneejida Cristode ijãapataarã ome.

15

Ijãapataarã Jerusalende chip'edaidap'edaa

1 Maapai eperãarã Judeadeepa chejida Antioquiadee. Mãgãrãpa Jesude ijãapataarãmaa jarateemaa p'aneejida. Mãgajida:

—Pãchi imik'ĩraarã k'ap'iade tauchaa bida-e pirã Moisepa p'ãdade jara bik'a, it'aa wãda-e pait'eeda ajida.

2 Mãpai Pablo Bernabé ome ijãati pedeejida ãchi ome. Maap'eda Jesude ijãapataarãpa Pablo, Bernabé mãik'aapa awaraarã pëijida Jerusalendee mãgí jarateeda iidinadamerã Cristopa jirit'eradaarãmaa mãik'aapa Jerusalendepema ijãapataarã ak'ipataarãmaa.

³ Antioquiadepema ijāapataarāpa āchi pēidap'eda, Fenicia eujāde māik'aapa Samaria eujāde wāyaajida. Nepirijida judio-eerāpa Cristode ijāa p'anadap'edaa. Māga ūridak'āri, māpema Cristode ijāapataarā o-īadachida.

⁴ Pablo Bernabé ome Jerusalende pachedak'āri, awaraa ijāapataarāpa āra auteebaijida Cristopa jirit'eradaarā ijāapataarā ak'ipataarā ome. Chip'edaidap'eda āra ome, Pablo māik'aapa Bernabé nepirijida jōma Tachi Ak'ōrepa ooda āchi pari.

⁵ Mamīda ūk'uru fariseorā Cristode ijāapataarā, p'irabaijida māik'aapa māgajida:

—Judio-eerā ijāa p'anīrāmaa tauchaa bipidaipia bi āchi imik'īraarā k'ap'iade māik'aapa oopidaipia bida ajida, Moisepa p'ādade jara bik'a.

⁶ Māpai seedachida Cristopa jirit'eradaarā māik'aapa ijāapataarā ak'ipataarā k'īsiadait'ee ma pedee jaradade.

⁷ Taarā aupedee jōnide, Pedro p'irabaiji māik'aapa māgaji:

—Ipemaarā Cristo k'aurepa, parāpa k'awa p'anida aji, taarāru Tachi Ak'ōrepa mi jirit'eraji Jesucristopa ooda eperāarā k'aripait'ee jaranamerā judio-eerāmaa, āchia auk'a Jesude ijāadamerā.

⁸ Tachi Ak'ōrepa āchi t'āride iru p'anadap'edaa k'awa bada perā, ak'ipiji ichia āchi jida k'inia iru bi, tachi k'inia iru bik'a. Māga ak'ipiji āchimaā pēik'āri ichi Jaure, tachimaā pēidak'a.

⁹ Tachi Ak'ōrepa āchi auk'a ak'ipari tachik'a. Māga k'awa p'ani āchia p'ek'au k'achia oopata

auk'a wēpapak'ooda perã Cristode ijãadak'ãri, tachi ome oodak'a.

¹⁰ Irã, ¿tachia sãga oodaima? ¿Oodaipia bik'ã Tachi Ak'õrepa jara-e padata? ¿Jõma ijãapataarãmaa oop-idaik'ã mãgee ne-inaa chaaree Moisepa p'ãdade jara bik'a? Tachia mãik'aapa tachi chonaarãpa mãgee ne-inaa jõmaweda p'oyaa ooda-e paji.

¹¹ Maperã mãga oodaik'araa bi. Tachia ijãa p'ani Tachi Waibia Jesucristo tachi ome t'ãri pia bairã, tachi o k'achiadeepa k'aripa atait'ee it'aa wãdamerã. Æchia auk'a mãga ijãa p'anida aji.

¹² Maap'eda jõma k'ĩup'ee para beeji Bernabé Pablo ome nepirĩmaa p'aneedak'ãri Tachi Ak'õrepa oopida ãchimaa judio-eerã t'ãide, eperãarãpa p'oyaa oodak'aa ãchi juadoopa.

¹³ Pedee aupadak'ãri, Santiagopa mägaji:

—ƒpemaarã, mi pedee ũrĩti.

¹⁴ Simón Pedropa et'ewa nepirĩjida aji, Tachi Ak'õrepa judio-eerã k'aripada. Tachi Ak'õrepa ãchi jida jiripari ichideerã p'aneedamerã.

¹⁵ Mãga bi iru pedee jarapataarãpa p'ãdap'edaade jara bik'a:

¹⁶ 'Nãga bap'eda, mia Rey David trua waya papiit'ee irudeepa uchiada jua ek'ari. Mia ooit'ee Israel pidaarã t'ãidepema te k'arawapataarãpa oopatak'a. Te t'eedaik'ãri, ãrapa t'eedeechoo jëra bada araa p'epata te chiwidik'a bainĩ bidait'ee.

¹⁷ Mãga pik'a Rey Daviddeepa uchiadap'edaarã mide ijãa p'ani mia araa p'eit'ee apemaarã mide ijãa p'anirã ome. Maap'eda ma jõmaweda michideerã papiit'ee mi Warra k'aurepa. Mãga

ooit'ee chi mīde ijāa p'anīrā, Daviddeepa uchiada-e paji mīda.

¹⁸ Chonaarāweda mia k'awapidak'a eperāarāmaa, māga ooit'ee. Mi, Tachi Ak'ōre Waibiapa māga jara bi.' *(Am 9.11-12)*

¹⁹ Māpai Santiagopa māgaji:

—Tachi Ak'ōrepa māga jara bairā, mia nāga k'īsia bīda aji. Tachia Moisepa p'ādade jara bik'a oopidaik'araa bi judio-eerāmaa, māgīrā Tachi Ak'ōrede ijāadak'āri.

²⁰ Ma k'āyaara k'art'a p'ā pēidāma jaradait'ee k'onaadamerā nechiara ata bīdap'edaa ne-inaa juapa ooda k'īrapite, ai k'īrapite it'aa t'īpata; wēra apai ome p'anadamerā; ne-animal īyapa jīa pi-uda chiara k'onaadamerā, aide waa paraa perā māik'aapa ne-animal waa k'onaadamerā.

²¹ Māgī ūraa aupai pēidaipia bi. Awaraa ūraa k'awa k'inia p'ani pīrā, īipata ewari chaa ūridai Tachi Ak'ōre Ūraa jarateepata tede. Chonaarāweda Moisepa p'āda jarateepachidada aji, māgee tede māik'aapa īrā at'āri māga oopata.

Judio-eerāmaa k'art'a p'ādap'edaa

²² Māpai Cristopa jirit'eradaarā, ijāapataarā ak'ipataarā māik'aapa jōmaweda Jerusalendepema ijāapataarāpa pedeetejida ūk'uru jirit'eradait'ee māik'aapa pēidait'ee Antioquiadee Pablo ome māik'aapa Bernabé ome. Nāgī eperāarā jirit'erajida: Judas, ichiaba t'īpatap'edaa Barsabás māik'aapa Silas. Apemaarā ijāapataarāpa māgī omé pia ak'i p'anapachida āchi poroorāk'a.

²³ K'art'a p'ādap'edaade nāga jara pēijida:

Tai, Cristopa jirit'eradaarāpa, ijāpataarā ak'ipataarā ome na k'art'ade salude pëiruta parā judio-eerāmaa Cristode ijāa p'anirā Antioquia p'uurudepema, Siria eujādepema māik'aapa Cilicia eujādepemaarā-it'ee.

²⁴ Taipa ūrijida nāpemaarā ūk'uru parāmaa wādap'edaa, mamīda taipa pëida-eeta. Māgiirāpa pariatua āchi k'īradoopa jaratee nipajida. Maperā parāpa k'awada-e paji ijāadait'ee Moisepa p'ādade wa Pablopa jarateedade.

²⁵ Mapa taipa pedeetejida taidepemaarā ūk'uru jirit'eradait'ee māik'aapa pëidait'ee parāmaa tai k'ōp'āyoorā k'iniarā Bernabé Pablo ome.

²⁶ Taipa k'awa p'ani Pablo Bernabé ome waaweedak'aa piudait'ee Tachi Waibia Jesucristode ijāa p'ani k'aurepa.

²⁷ Mapa āchi ome parāmaa pëiruta Judas Silas ome. Āchia parāmaa jōma taipa k'īsiadap'edaa na p'ādade jara bik'a nepiridait'ee.

²⁸ Tachi Ak'ōre Jaurepa tai k'aripaji parāmaa ne-inaa audú chaaree oopinaadamerā. Nāgapai jara k'inia p'ani parāpa oodamerā.

²⁹ K'onáati nechiarā ata bidap'edaa ne-inaa juapa ooda k'īrapite, ai k'īrapite it'aa t'īpata. Ne-animal īyapa jāa piuda chiara k'onáati māik'aapa ne-animal waa k'onáati. Ma awara p'ek'au oonáati. Taipa jara p'anik'a ooruta pirā, pia oodait'ee.

Māgapai paji.

³⁰ Māpai ma k'art'a p'ādap'eda, pëijida Antioquiadee wādap'edaarā ome. Mama panadap'eda, ijāpataarā jōmaweda t'ī p'ejida māik'aapa ma k'art'a

ãchimaá teejida.

³¹ Ijãapataarãpa ma k'art'a leedak'ãri, o-ĩadachida, ãchi-it'ee ũraa pia bada perã.

³² Judas Silas ome Tachi Ak'õre Jaurepa jarapiru jarapataarã pada perã, ichiaba ma ijãapataarãmaa ũraajida t'ãri o-ĩa p'aneedamerã.

³³ Mama p'anadap'eda, ijãapataarãpa ãchi despediijida k'ãiwee wãdamerã.

³⁴ [Mamĩda Silas arii beeji.]

³⁵ Pablo Bernabé ome ichiaba p'aneejida awaraa ijãapataarã ome Antioquiade, Tachi Ak'õrepa pedee pia jara pëida Cristode jarateedait'ee.

Pablo waya wãda ichi naaweda wãda ode

³⁶ Mãga p'anadap'eda, ewari aba Pablopa mãgaji Bernabemaá:

—Waya wãdáma aji, ijãapataarã ak'ide, Tachi Ak'õrepa jara pëida Cristode jaratee nipadap'edaa p'uuru chaa. Ak'idait'eeda aji, at'ãri ijãa p'ani wa mãga-e.

³⁷ Bernabepa ichiaba atee k'inia baji Juan; mãgí Juan ichiaba t'ijarapatap'edaa Marcos.

³⁸ Mamĩda Pablopa atee k'inia-e paji, ãchi ik'aawaapa uchiada perã Panfilia eujãde, ãchi mimia at'ãri aupada-eeta.

³⁹ Ijãati pedeedap'eda, ãchi o chaachaa jitak'oodachida. Bernabé wãji Chipre isladee Marcos ome.

⁴⁰ Jõdee Pablopa jirit'eraji Silas ichi k'õp'ãyo pamerã. Ijãapataarãpa ãchi omé Ak'õre juade bijida irua ãchi pia ak'i bapariimerã. Mãpai Pablo ichi k'õp'ãyo ome wãji.

41 Wãyaajida Siria eujãde mãik'aapa Cilicia eujãde. Ijãapataarã ũraa wãjida ãchi para bee chaa.

16

Timoteopa Pablo Silas ome k'õp'ãyaada

1 Mamãik'aapa Pablo Silas ome panajida Derbe p'uurude mãik'aapa Listra p'uurude. Mama unujida ijãapari t'ijarapatap'edaa Timoteo. Chi nawe judío wëra Cristode ijãapari paji. Jõdee chi ak'õre Greciadepema paji.

2 Ijãapataarã Listradepemaarã mãik'aapa Iconiodepemaarãpa Timoteo pia t'o p'anadap'edaa perã,

3 Pablopa ichi ome ateeji mamãik'aapa. Mamãida uchiadai naaweda, iru k'ap'iade tauchaa biji mãpemaarã judiorã k'aurepa. Ma eujãdepema jõmaarãpa k'awajida Timoteo ak'õre Greciadepema paji mãik'aapa ãrapa tauchaa bidak'aa paji ãchi warrarã k'ap'iade.

4 P'uuru bee chaa wãyaa wãdak'ãri, jara bëi wãpachida Cristopa jirit'eradaarãpa mãik'aapa ijãapataarã ak'ipataarãpa jara pëidap'edaa Jerusalandeepa.

5 Mãgá ijãapataarãpa pipiara k'awaajida Cristopa oopi k'inia bi ãchimaã mãik'aapa waapiara ijãajida irude. Ma awara ewari chaa ijãapataarã chok'araara ïwa wãjida.

Pablo k'ãimok'araa pik'a bada Troas p'uurude

6 Ma wãrutade wãyaajida Frigia eujãde mãik'aapa Galacia eujãde, Tachi Ak'õre Jaurepa jarateepi-e pada perã Ásia eujãde.

7 Misia eujãde panadak'ãri, wãdait'ee paji Bitinia eujãdee. Mamãda Jesús Jaurepa wãpi-e paji.

8 Mapa Misia eujãde wãyaajida Troas p'uurude parutamaa.

9 Panadap'edaa ewate p'ãrik'ua, Pablo k'ãimok'araa pik'a bide unuji Macedonia eujãdepema imik'ïra bainĩ bi. Mãgipa chupiria iidiji Pablo wãmerã ichi eujãdee. Mãgaji:

—Chéji Macedoniadee tai k'aripade.

10 Pablo mãgá k'ãimok'araa pik'a bap'eda, aramata net'aa p'e atajida wãdait'ee Macedoniadee, k'ïsia p'anadap'edaa perã Tachi Ak'õrepa jarateepi k'inia bi Cristopa ooda eperãarã k'aripait'ee ma eujãde. Ma wãdap'edaade mi jida auk'a wãji.

Pablo Silas ome Filipos p'uurude

11 Troas p'uurudeepa tai barcode bataujida. Mata Samotracia islade panajida. Mamãik'aapa ai norema Neápolis p'uurude panajida.

12 Neapolideepa wãjida Filipodee. Mãgí p'uuru waibia Macedonia eujãde bi. Ma p'uurude Romadepemaarã chok'ara p'anapachida. Mama k'ãima chok'ara-ee p'anajida.

13 Ìpata ewate tai wãjida p'uurudeepa to idee, ma p'uurudepema judiorã it'aa t'ïpatamãi unudai jïak'aapa. Unu atadak'ãri, su-ak'i p'aneejida mãik'aapa jarateemaa p'aneejida wëraarã cheepurudap'edaarãmaa.

14 Ma wëraarã t'ãide baji aba t'ïjarapatap'edaa Lidia. Ma wëra Tiatira p'uurudepema paji. Mãgipa netopachi p'aru pia t'ida p'up'uchia. Mãgí wërapa Tachi Ak'õremaa it'aa t'ïpachi. Maperã

Ak'õrepa irumaa ùripiji Pablopa jaratee bi. Pia ùrik'ãri, Cristode ijãa beeji.

¹⁵ Iru poro choopip'eda ichi te pidaarã ome, taimaa mågaji:

—Parãpa unu p'ani pirã mi wãara ijãa bi Jesucristode, mi tede p'ana chéti.

Mãga jara bïpa wãjida ichi temaa.

Filipos p'uurude carcelde p'anadap'edaa

¹⁶ Ewari aba tai waya it'aa t'ide wãdak'ãri it'aa t'ïpatap'edaamaa, unujida awëra. Mãgí awëra esclava paji. Mãgipa ne-inaa p'asait'ee bi jara-pachi, ichi k'ap'iade netuara merãtia bada perã. Mapa ma awëra chiparipa p'arat'ara jitapachi ichi k'aurepa.

¹⁷ Mãgí awëra tai t'ëe bia wãpachi:

—Nãgí eperãarã Tachi Ak'õre Waibiapa pëida jarateedamerã sãga eperãarã it'aa wãdai.

¹⁸ Ewari chok'ara mãga oopachi tai wãrutamaa. Mata ewari aba Pablopa ùriamaadaik'ãri, ãpítee ak'iji mãik'aapa mågaji ma netuara k'ap'iade merãtia badamaa:

—Jesucristo jõmaarã poro waibia perã, ichi t'ide mia pïmaa jara bi uchiadamerã jã wëra k'ap'iadeepa.

Aramata ma netuara uchiadachi.

¹⁹ Ma awëra chipariirãpa mãga unudak'ãri, k'awaajida ãchi p'arat'a waa p'oyaa jitada-e iru k'ap'ia. Mapa Pablo Silas ome jita atadap'eda, ateejida ãchi p'uurudepema poroorãmaa, mãgírã chip'edaipatap'edaamãi.

²⁰ Ma Romadepema poroorãmaa ateedap'eda, mågajida:

—Na judiorãpa tachi p'uuru pidaarã k'ĩraupirutada ajida,

21 mãik'aapa ne-inaa jarateemaa p'ani tachi Romadepemaarãpa oopata awara. Taipa mãga ũri k'iniada-e p'anida ajida.

22 Mãpai p'uuru pidaarã chok'ara seedachida. Ñchi poroorãpa Pablo Silas ome p'aru ěrapijida mãik'aapa wipijida pak'urupa.

23 Pia wipit'aadap'eda, carcelde t'it'aajida mãik'aapa carceldepema jĩaparimaa jarajida pia jĩamerã, carceldeepa uchiapiamaapa.

24 Chi jĩaparipa mãga ũrik'ãri, calabozo edupiarã badade t'ĩnĩbiji mãik'aapa ãchi biiri t'ik'ooji cepode.

25 Mãgá iru p'anajida mĩda, Pablo Silas ome it'aa t'ĩmaa mãik'aapa k'arimaa p'anajida Tachi Ak'õremaa. Jõdee chi apemaarã carcel pidaarãpa ũrii p'anajida.

26 Esapite pak'ãri, awẽrachai golpe wẽre nĩbeeji. Ma carcel perã t'eedachi. Aramata chi puerta jõmaweda ewak'oodachida. Presoorã juade nĩbada cadena mãik'aapa cepo ichiaba jõma ět'ak'oodachida.

27 Ma carceldepema jĩaparipa unuk'ãri chi puerta jõma ewa jẽra bi, ichi espada ět'a ataji ichi juadoopa piudariit'ee, carcel pidaarã jõma uchiadai p'ani jĩak'aapa.

28 Mamĩda Pablopã biaji ichi badamãiipa mãgĩ jĩaparimaa:

—jJãgã oonãaji! jTai jõma nama p'anipi!

29 Mãpai carceldepema jĩaparipa lámpara aneepip'eda, t'ĩudachi Pablo mãik'aapa Silas

p'anadap'edaamãi. Æchi k'ĩrapite wirriwirria bedabai nĩbanaji p'era nĩbipa.

³⁰ Uchia p'e atap'eda calabozo edupĩara bideepa, mǎgaji:

—Jarateepataarǎ, ¿k'ǎata ooipia bĩma aji, mi it'aa wǎit'ee?

³¹ Mǎpai p'anaujida:

—Jesucristode ijǎaji. Mǎgara pi, pichi tedepemaarǎ ome it'aa wǎdayada ajida.

³² Mǎpai Tachi Ak'õrepa jara pẽida Cristode jarateejida ma jĩaparimaa mǎik'aapa ichi tede p'anadap'edaarǎmaa.

³³ Aramata ma carceldepema jĩaparipa Pablo Silas ome ateeji sũk'ooit'ee Æchi k'ap'ĩade t'udak'a jẽra bada. Maap'eda iru ichi tedepemaarǎ ome poro choopijida.

³⁴ Mǎpai teedaa p'e atEEP'eda, nek'opiji. Ma carcel jĩapari ichi tedepemaarǎ ome o-ĩa p'anajida Tachi Ak'õrede ijǎadap'edaa perǎ.

³⁵ Ai norema tap'eda Romadepema poroorǎpa Æchi jĩapataarǎ pẽijida ma carceldepema jĩaparimaa, Pablo Silas ome uchua pẽimerǎ.

³⁶ Maperǎ carceldepema jĩaparipa mǎgaji Pablo-maa:

—Mi poroorǎpa jara pẽi p'anida aji, parǎ uchua pẽimerǎ. Mapa k'ǎiwee wǎti namǎik'aapa.

³⁷ Mamĩda Pablopa mǎgaji Romadepema poroorǎpa pẽidap'edaarǎmaa:

—Tai auk'a Romadepemaarǎ p'anita, wijidada aji, jõmaarǎ k'ĩrapite, charramaa ateeda-ee. Maap'eda carcelde t'ipijida. Írǎ jõdee, ¿merǎ uchiapi k'inia p'anĩ-ek'ǎ? ¡Mǎga-epi! Namǎik'aapa

wāda-eda aji, āchia uchia pēi cheda-emāi āchi k'īradoopa.

³⁸ Pablopa jarada āchi poroorāmaa jaranadak'āri māik'aapa jā eperāarā auk'a Romadepemaarāda adak'āri, māirā poroorā p'eradachida, āchia wipidap'edaa perā māik'aapa carcelde t'i nībidap'edaa perā.

³⁹ Mapa chedap'eda, chupiria iidijida Pablomaa Silas ome perdonaadamerā āchia oodap'edaa. Māpai uchiapijida carceldeepa māik'aapa p'uurudeepa.

⁴⁰ Pablo Silas ome ma carceldeepa uchiadap'eda, wājida Lidia temaa. Mama ijāapataarā jōmaarāmaa ūraajida t'āri o-īa p'aneedamerā. Maap'eda wājida ma p'uurudeepa.

17

Tesalónica p'uuru pidaarā k'īrauk'oodaidap'edaa Pablo Silas ome

¹ Mamāik'aapa āchi wādade Pablo Silas ome wāyaajida Anfípolis p'uurude māik'aapa Apolonia p'uurude. Maap'eda Tesalónica p'uurude panajida. Māgí p'uurude baji Tachi Ak'ōre Ūraa jara-teepata te.

² Maperā Pablo ichia oopatak'a p'uurude panak'āri, jāmaa wāji. Mama beeji tomia ōpee māik'aapa ĩpata ewari chaa aupedejeji arii p'anadap'edaarā ome.

³ Ak'ōre Ūraa p'ādade ak'īpipachi sāga Cristo chupiria nībait'ee māik'aapa piup'eda, p'irabaiit'ee. Jarapachi:

—Nāgí Jesús parāmaa mia jaratee bi Cristota, Tachi Ak'õrepa pēida eperāarā k'aripamerā.

⁴ Māga ũridak'āri, judiorā ũk'uru Cristode ijāajida māik'aapa araa nipapachida Pablo māik'aapa Silas ome. Ichiaba ijāajida judio-eerā; Tachi Ak'õrede ijāa p'anadap'edaarā chok'ara māik'aapa wēraarā p'arat'ara beerā.

⁵ Judiorā Cristode ijāada-ee p'anadap'edaarāpa māga unudak'āri, k'īraudachida. Mapa jirijida eperāarā mimiadak'aa p'anadap'edaarā, p'uuru pidaarā k'īraupit'aadamerā Pablo māik'aapa Silas ome, pedee jōnipa āra āpite. Māgá p'uuru pidaarā jōma k'īraupit'aadap'eda, Jasón tede t'īudachida, Pablo Silas ome uchua atadap'eda, p'uuru pidaarāmaa teedait'ee.

⁶ Mamīda māgí tede āra unuda-e pak'āri, uchua atajida Jasonta māik'aapa awaraa ijāapataarā. Maap'eda āchi p'uurudepema poroorāmaa ateejida. Mama panadak'āri, biapachida:

—jīrá eperāarā Roma jua ek'ari p'anīrā k'īsia awarapipataarā nama che p'anīda! ajida.

⁷ Ma awara māgīrā Jasonpa ichi tede auteebaiji. Māirāpa oodak'aa Cesarpa oopi bik'a. Jīp'a jara p'ani ichi k'āyaara rey aba waibiara bīda ajida, t'ījarapata Jesús.

⁸ Māga ũridak'āri, ma p'uuru pidaarā māik'aapa āchi poroorā k'īraupik'a para beeji.

⁹ Mamīda Jasonpa apemaarā ijāapataarā ome p'aajida āchi uchua pēidamerā. Māpai k'ena pēijida.

Pablo Silas ome Berea p'uurude

10 Ma p'ãrik'ua weda ijãapataarãpa Pablo Silas ome Berea p'uurudee pëijida. Mama panadak'ãri, t'ũjida judiorã Ak'õre Ũraa jarateepata temãi.

11 Mãpema judiorã Tesalonicadepema k'ãyaara k'ĩsia k'awaara p'anajida. Mapa Pablopa jaratee bi ũri k'inia p'anajida. Mãga ũridap'eda, ewari chaa Tachi Ak'õre Ũraa p'ãda ak'ipachida k'awaadait'ee wãara jara bi Pablopa jara bik'a maa-e pirã awara jara bi.

12 K'awaadak'ãri wãarata jara bi, mãgidepemaarã judiorã chok'ara ijãajida. Ichiaba judio-eerã wëraarã p'arat'ara beerã chok'ara ijãajida, imik'ĩraarã jida ichiaba.

13 Mamãda Tesalonicadepema judiorãpa ũridak'ãri Pablopa Tachi Ak'õrepa jara pëida jarateemaa bi Bereade, wãjida ma p'uuru pidaarã k'ĩraupit'aade.

14 Aramata mãpema ijãapataarãpa Pablo pëijida k'õp'ãyoorã ũk'uru ome p'usa idee. Jõdee Silas Timoteo ome Bereade p'aneejida.

15 Chi Pablo ome wãdap'edaarãpa iru ateejida Atenas p'uurudee. Waya ãpítee uchiadait'ee pak'ãri, Pablopa jara pëiji Silamaa Timoteo ome taarã-ee chedamerã ichimaa.

Pablo Atenas p'uurude

16 Atenas p'uurude Pablopa Silas mãik'aapa Timoteo nĩmaa beeji. Mama bide unuk'ãri chok'ara ne-inaa iru p'ani eperã juapa ooda ai k'ĩrapite it'aa t'ĩpata, t'ãri ãriidachi.

17 Mapa aupedeepachi judiorã ome mãik'aapa judio-eerã Tachi Ak'õre waaweepataarã ome Ak'õre Ũraa jarateepata temãi. Ichiaba mãga

oopachi ewari chaa chi unuru ome ma p'uurude net'aa netopatamãi.

18 Mama ũk'uru poro wẽsaa beerã t'ijarapatap'edaa Epicúreo eerepemaarã mãik'aapa Estoico eerepemaarã aupedee p'aneejida Pablo ome. Mãirã ũk'uruurãpa mãgapachida:

—¿K'ãata jara k'inia bima apachida, na pedee-idaa bipa?

Awaraarãpa mãgapachida:

—Awaraa eujãdepemaarã ak'õre waibiapa ooda jaratee bida apachida.

Mãga jarapachida Pablopa jarateemaa bada perã Tachi Ak'õrepa ooda Jesús piuda k'aurepa mãik'aapa jarateepachi perã tachi piuda t'ẽepai waya chok'ai p'irabaidait'ee.

19 Mãpai ãchia Pablo ateejida Areopagomaa, ãchi poro wẽsaa beerã cheepurupatamaa ũraa ũride. Mama iidijida:

—¿Taipa pia jaratee bi k'awaadaik'ã? ajida.

20 Taipa waide ũrida-e p'anida ajida, pedee pia jaratee bik'a. Mapa k'awa k'inia p'anida ajida.

21 Ma Atenas pidaarã mãik'aapa awaraarã arii p'anadap'edaarã mimiada-e p'anadak'ãri, p'anapachida ne-inaa chiwidi pedeemaa mãik'aapa ũrimaa.

22 Mãpai Pablo bainĩ beeji ãchi k'ĩrapite Areopagode mãik'aapa mãgaji:

—Atenas p'uuru pidaarã, mia unu bi parãpa ak'õre waibia k'ĩra t'ãdoo waawepata.

23 Mi wãyaak'ãri parã it'aa t'ĩpatamãi, unuji net'aa chok'ara iru p'ani ai k'ĩrapite it'aa t'ĩpata. Mama bide unuji parã altar bide p'ã bi: *Tachi*

Ak'õre Waibia k'awada-e p'ani-it'ee. Parãpa k'awada-eda a p'ani Ak'õrepa ooda mia jaratee bi.

24 'Nãgí Ak'õrépata ooji na eujã mãik'aapa jõma aide nĩbi. Nãgita, Tachi Ak'õre, jõmaarã Waibia na p'ek'au eujãde mãik'aapa pajãde. Nãgí Ak'õre eperãarãpa te oodade bak'aa,

25 ichi-it'ee p'ua-e bairã ne-inaa eperãarãpa oopata ichi-it'ee. Ichiata eperãarã chok'ai p'anapipari, ÿyapaapipari mãik'aapa tachimaa ne-inaa jõmaata teepari pia p'anapataadamerã.

26 'Eperã abaadeepa eperãarã k'ĩra t'ãdoo uchiapiji, na p'ek'au eujã jõmaade p'anapataadamerã. Ai naaweda k'ĩsia iru baji sãapai uchiapiit'ee mãik'aapa sãmaata p'anapiit'ee.

27 Tachi Ak'õrepa mãga ooji eperãarãpa iru jiridamerã. Tachi taupa nãgí Ak'õre unuda-e p'ani mĩda, iru k'awadai, wãara tachimãiipa t'imia-ee bairã.

28 Iru k'aurepa tachi chok'ai p'ani; p'irriapata mãik'aapa na eujãde p'anapata. Pãchi k'arik'a p'ãpataarãpa jaradap'edaak'a mãga bi: "Tachi, Tachi Ak'õre Waibia ooda".

29 Maperã k'ĩsiadaik'araa bi Tachi Ak'õre santok'a bi, eperãarãpa k'ĩsiadap'eda oopatak'a nēedee, p'arat'adee maa-e pirã mãudee.

30 Naaweda Tachi Ak'õrepa miapi-e paji mãgee k'ĩrapite it'aa t'ĩpatap'edaarã, iru waide k'awada-e p'anadap'edaa perã. Mamĩda ãrã jõmaarãmaa jara bi p'ek'au k'achia oo amaadamerã mãik'aapa ichide ijãadamerã.

31 Ichia mãga jara bi na ewari na p'ek'au

eujãdepemaarãpa oopata jõmaweda ak'it'ee perã, k'awaa'it'ee pia wa k'achia. Mãga ooit'ee ichia pëida Jesucristopa. Cristopa eperãarãpa oopata mãgá ak'ii, ichia k'achia ook'aa pada perã na eujãde nipak'ãri. Tachia k'awa p'anida aji, Ak'õrepa iru jirit'eraji, iru piup'eda, chok'ai p'irabaipida perã.

³² Arii p'anadap'edaarãpa ũridak'ãri eperã piup'eda chok'ai p'irabaida, ũk'uru ëi para beeji mãik'aapa ũk'uruurãpa mãgajida:

—Na ewari waya ũridayada ajida, pi pedee.

³³ Mãpai Pablo uchiasi mamãik'aapa.

³⁴ Mamãda ũk'uruurãpa ijãajida Pablopa jarada mãik'aapa Cristode ijãa p'aneejida. Ma ijãadap'edaarã t'ãide baji imik'ĩra t'ijarapatap'edaa Dionisio. Mãgí Areópago poro wësaa beerã cheepurupatadepema paji. Ichiaba baji wëra t'ijarapatap'edaa Dámaris mãik'aapa awaraarã.

18

Pablo Corinto p'uurude

¹ Ma t'ëepai Pablo wãji Atenas p'uurudeepa Corinto p'uurudee.

² Mama ununaji judío t'ijarapatap'edaa Áquila. Mãgí Ponto eujãdepema paji. Ewaa pache baji chi wëra Priscila ome Italia eujãdeepa, César Claudiopa judiorã jõmaweda jërek'ooda perã Roma p'uurudeepa.

³ Pablo p'asiade wãk'ãri ma judío badamaa, k'awaa ataji ichi jãak'a Aquilapa carpa oopari. Mapa Pablo ãra ome beeji ma mimia oomaa.

4 Mama bide ñipata ewari chaa wãpachi Ak'õre Ñraa jarateepata temaa jarateede judiorãmaa mãik'aapa judio-eerãmaa Cristode ijãadamerã.

5 Silas Timoteo ome pachedak'ãri Macedo-niadeepa, Pablopa ewari chaa Tachi Ak'õrepa jara pëida Cristode jarateemaa bapachi, judiorãpa ijãadamerã Jesuta Cristo, Tachi Ak'õrepa pëida.

6 Mamãda judiorã, ichi pedee ijãa k'iniada-ee p'anadap'edaarãpa ik'achia jaramaa p'aneejida. Mapa Pablopa ichi p'aru jĩ bada jãap'ejì ak'ipiit'ee ãchimaa waa jaratee-e. Maap'eda mägaji:

—Pãchi k'ĩradoopa atuadait'eeda aji, piudak'ãri. Idideepa mi wãit'eeda aji, judio-eerãmaa Tachi Ak'õrepa jarapi bi jarateede.

7 Mãga jarap'eda, Pablo wãji Ticio Justo apatap'edaa temaa jarateede. Mãgí eperãpa Tachi Ak'õremaa it'aa t'ĩpachi. Ichi te bajì Tachi Ak'õre Ñraa jarateepata te ik'aawa.

8 Pablopa mama jarateemaa bide, Cristode ijãaji ma Ak'õre Ñraa jarateepata tedepema poro, t'ijarapatap'edaa Crispo. Chi te pidaarã jida auk'a ijãajida mãik'aapa apemaarã Corinto pidaarã chok'ara Pablopa jarateeda ùridap'edaarã ichiaba ijãajida. Mapa mãirã jõma poro choopijida.

9 At'ãri Corinto p'uurude p'anide ewari aba p'ãrik'ua k'ãimok'araa pik'a bide Tachi Ak'õrepa mägaji Pablomaa:

—Waawee-ee jaratéeji na p'uurude

10 michideerã nama chok'ara nĩbairã. Mi pi ome bairã, apidaapa pi k'achia ooda-e.

¹¹ Tachi Ak'õrepa mǎga jarada perǎ, Pablo mama beeji año aba ap'eda esa-auk'a, Tachi Ak'õrepa jara pǐida Cristode jarateemaa.

¹² Mamǐda, mama bide, Romadepema Galión ap-atap'edaa Acaya eujǎdepema poro waibia bak'ãri, judiorǎ chok'ara pedeetejida mǎik'aapa Pablo jita ateejida iru k'ĩrapite.

¹³ Mama mǎgajida:

—Na eperǎpa jaratee bi Tachi Ak'õrede ijǎadamerǎ mǎik'aapa irumaa it'aa t'ĩpataadamerǎ. Mamǐda jaratee-eda ajida, Moisepa p'ǎdade jara bik'a oodamerǎ.

¹⁴ Mǎpai Pablo pedeeit'ee arude, Galionpa mǎgaji ma judiorǎmaa:

—Na eperǎpa ne-inaa k'achia oo bada paara maa-e pirǎ chĩara pee bada paara, mia ak'ik'ajida aji.

¹⁵ Mamǐda jara p'anadairǎ chĩara t'ĩ mǎik'aapa parǎpa ũraa p'ǎdade, pǎchi pitapai ma nepira ak'idapáde aji. Mia parǎ nepira ak'i k'inia-eda aji.

¹⁶ Aramata jǐrek'ooji ichimǎiipa.

¹⁷ Mǎpai arii ak'i p'anadap'edaarǎpa Tachi Ak'õre ũraa jarateepata tedepema poro Sóstenes jita atadap'eda, wĩjida Galión k'ĩrapite. Mamǐda iru-it'ee maarepida p'ua-e paji.

Pablo waya Antioquía p'uurudee wǎda

¹⁸ Ai t'ěepai Pablo taarǎ beeji Corinto p'uurude. Mǎpai ijǎapataarǎmaa despediip'eda, Siria eujǎdee wǎji Priscila mǎik'aapa Áquila ome. Cencrea p'uurude barcode batau naaweda, Pablopa ichi poro bi-si wět'aaji. Mǎga ooji ak'ĩpiit'ee ichia Tachi Ak'õremaa ooit'eda ada ooda.

19 Ma wārutade Éfeso p'uurude panadak'āri, Pablo t'īunaji Tachi Ak'ōre Ūraa jarateepata tede judiorā ome pedeeit'ee.

20 Ichia jarateeda ūridak'āri, chupiría iidijida āchi ome taarā beemerā. Mamīda Pablopa k'inia-e paji.

21 Māgaji:

—Írá wāit'eeda aji. Mamīda waya cheit'eeda aji, Tachi Ak'ōrepa k'inia bi pirā.

Māpai Pablo batauji māik'aapa wāji. Jōdee Priscila Áquila ome mama p'aneejida.

22 Pablo Cesarea p'uurude panak'āri, mamāik'aapa wāji Jerusalendee ijāapataarā ak'ide. Maap'eda wāji Antioquía p'uurudee. Māgí p'uuru Siria eujāde bi.

23 Antioquiade bap'eda, wāji ijāapataarā para bee chaa āchi ak'ide māik'aapa ūraade. Māga oo wāji Galacia eujāde māik'aapa Frigia eujāde.

Apolopa Éfeso p'uurude jarateeda

24 Maapai judío t'ījarapatap'edaa Apolo pacheji. Māgí Alejandría p'uurudepema paji. Māgí p'uuru Egipto eujāde bi. Māgí judiopa Tachi Ak'ōre Ūraa p'āda pia k'awa baji. Ma awara pia jarateepachi.

25 Māgipa o-ī-īa jarateepachi Juan Bautistapa jarateedak'a, eperāarāpa āchia p'ek'au k'achia oopata oo amaadamerā māik'aapa poro choopidamerā ak'ipidait'ee Tachi Ak'ōrede ijāa p'ani. Ichiaba jarateepachi Jesucristo Tachi Ak'ōrepa pēida.

26 Apolo Éfeso p'uurude pachek'āri, waawee-ee jarateemaa beeji judiorā Ak'ōre Ūraa jarateepata temāi. Māga ūridak'āri, Priscila Áquila ome āchi

temaa ateejida. Māpai Apolomaa jarateejida jōma āchia k'awadap'edaa, Tachi Ak'ōrepa ooda Jesu-cristo k'aurepa.

²⁷ Maap'eda, Apolo Acaya eujādee wā k'inia bak'āri, Efesodepema ijāapataarāpa k'art'a p'ājida jāpemaarāmaa iru auteebaidamerā. Māgá mama panak'āri, irua k'aripai Cristode ijāapataarā waapiara ijāadamerā. Tachi Ak'ōre t'āri pia bapari perā, āchimaā Cristode ijāapiji, Apolo mamaa wāi naaweda.

²⁸ Apolo mama bide jōmaarā taide Tachi Ak'ōre Ũraa p'āda ak'ipachi māik'aapa jarateepachi Jesu-cristo Tachi Ak'ōrepa pēida eperāarā k'aripamerā. Mapa judiorāpa maarepida p'oyaa p'anauda-e paji.

19

Pablo Éfeso p'uurude

¹ Apolo Corinto p'uurude bi misa, Pablo wāyaaji Galacia māik'aapa Frigia eujāde Éfeso p'uurude parumaa. Mama Cristode ijāapataarā ununaji.

² Māpai Pablopa iidiji:

—Parāpa Cristode ijāadak'āri, ¿Tachi Ak'ōre Jaure parā k'ap'iade ba chejik'ā? aji.

P'anaujida:

—Taipa k'awada-eda ajida, Tachi Ak'ōre Jaure ba chepari ijāapataarā k'ap'iade.

³ Māpai Pablopa iidiji:

—Parāpa poro choopidak'āri, ¿k'āare-it'ee poro choopijidama? aji.

P'anaujida:

—Juanpa jaradak'a poro choopijida ak'ipidait'ee p'ek'au k'achia oo amaa k'inia p'ani.

⁴ Māpai Pablopa māgaji:

—Juanpa wāara poro choojida aji, waa p'ek'au k'achia oo k'iniada-e p'anadap'edaarā. Mamīda Juanpa ichiaba jarapachi ijāadamerā ichi t'ēe cheru eperāde. Māgí eperā Jesucristo.

⁵ Ma eperāarāpa māga ūridak'āri, aramata āchi poro choopijida Tachi Waibia Jesús t'ide ak'ipidait'ee irude ijāa p'ani.

⁶ Maap'eda Pablopa jua biji ma poro choodap'edaarā ĩri. Māgá bik'āri, Tachi Ak'ōrepa ichi Jaure āra k'ap'iade ba chepiji. Māgipa āramaa pedeeipachi k'awada-e p'ani pedeede. Māgá jarajida Tachi Ak'ōrepa jarapidak'a.

⁷ Chi māgá poro choodap'edaa eperāarā doce paji.

⁸ Maap'eda Pablo wāji Tachi Ak'ōre Ūraa jarateepata tedee. Mama ĩpata ewari chaa atane ōpee Tachi Ak'ōre Ūraa waawee-ee jarateeji. Jaraji Tachi Ak'ōrepa pia ooda Jesucristo p'ek'āri, judiorāpa irude ijāadamerā.

⁹ Mamīda ūk'uruurāpa ijāa k'iniada-e paji Pablopa jaratee bada māik'aapa waapiara pedee k'achia jarajida Tachi Ak'ōre Ode P'anirā āpite. Maperā Pablo mamāik'aapa āyaa wāji ijāapataarā ome. Jaratee banaji eperā t'ijarapatap'edaa Tirano escuelade. Mama ewari chaa jarateepachi.

¹⁰ Irua Tachi Ak'ōre Ūraa jarateeji año omé. Māgá judiorā māik'aapa judio-eerā Ásia eujāde p'anapatap'edaarāpa ūrijida Tachi Ak'ōrepa jara p'aida Jesude.

11 Ichiaba Tachi Ak'õrepa Pablomaa oopipachi ne-inaa eperãarãpa p'oyaa oodak'aa ãchi juadoopa.

12 Pablo k'ap'iade p'aru t'õbaidapapai, k'ayaa beerã jipapachida. Ichiaba netuara eperãarã k'ap'iade merãtia bee uchiapachida.

Netuarapa Esceva warrarãmaa ooda

13-14 Mãpema judiorã ùk'uru Cristode ijãada-e p'anadap'edaarãpa netuara merãtia bee eperãarã k'ap'iadeepa uchiapik'oopachida. Mãga oo nipa-jida judiorã p'aareerã poro Esceva warrarã. Æra si-ete paji. Mãirãpa k'awaadak'ãri netuaraarã uchia p'ani Pablo k'aurepa ichia Tachi Waibia Jesús t'ĩ jarak'ãri, auk'a oo k'inia p'aneejida. Mapa jarajida netuara merãtia bĩmaa:

—jPablopa jara bi Jesús t'ĩde uchiãti!

15 Mamĩda mãga oodak'ãri, ma netuara eperã k'ap'iade merãtia badapa mãgaji:

—Mia k'awa bĩda aji, Jesús. Ichiaba k'awa bi k'aita Pablo. Mamĩda parã ¿k'airãma? aji.

16 Mãpai ma netuara k'ap'iade merãtia bada eperãpa ãchi ñri cheji mãik'aapa ãchi jõmaweda s'ĩk'ooji. Mãgá p'u oop'eda, chi netuara uchiapi chedap'edaarã mamãik'aapa ãk'adaa p'ira uchiak'oodachida.

17 Èfeso p'uurude p'anapataarã, judiorã mãik'aapa judio-eerãpa mãga ùridak'ãri, jõmaarãta p'erajida mãik'aapa Tachi Waibia Jesús t'ĩ pia t'o p'anajida.

18 Mãpemaarã ùk'uru Cristode ijãa p'aneejida. Maap'eda Pablomaa jara chepachida ãchia k'achia

oopatap'edaa, ai naaweda ijãa p'anadap'edaa perã petau tau k'awaa beerãpa oo p'anadap'edaade.

19 Ichiaba ùk'uru petau tau k'awaa beerãpa aneepachida ãchi libro jõmaarã taide paak'oodait'ee. Mãgí libro valor p'arat'ade juasiadak'ãri, uchiaji p'arat'a tau cincuenta mil.

20 Ma jõma oo p'anadap'edaa k'aurepa ma eujãdepemaarãpa waapiara ijãapachida Tachi Ak'õrepa jarapidade.

21 Ma t'ëepai, Tachi Ak'õre Jaurepa Pablomaa k'ĩsiapiji wãit'ee Jerusalendee, wãyaap'eda Macedonia eujãde mãik'aapa Acaya eujãde. Ichiaba Jerusalendee pa Pablo wã k'inia baji Romadee.

22 Mãga k'ĩsiap'eda, Pablo pa chi k'õp'ãyoorã Timoteo Erasto ome naa pëiji Macedonia eujãdee. Jõdee ichi Ásia eujãde jarateemaa beeji. Maap'eda wãji ãra t'ëe.

Éfeso p'uurudepemaarã k'ĩraudaidap'edaa

23 Maapai Tachi Ak'õre Ode P'aniirã k'aurepa, Éfeso p'uurudepemaarã jõma k'ĩraupik'a para baji

24 ne-inaa p'arat'adee oopari Demetrio apatap'edaapa ãra ãpíte pedee k'achia jarada perã. Mãgí eperãpa ne-inaa ma-ãri santok'a p'arat'adee oopachi, ãchi it'aa t'ipata nawe Artemisa te waibia k'irãpapataadamerã. Mãga oo bipa ichia mãik'aapa apemaarã ne-inaa oo k'awaa beerãpa p'arat'a waibia jitapachida.

25 Maperãpi Demetriopa mãgürã mãik'aapa awaraa ne-inaa oo k'awaa beerã t'ĩ p'e atap'eda, mãgaji:

—K'õp'ãyoorã, parãpa k'awa p'anida aji, nãgí mimia oo p'anipa tachi p'arat'a jitapata.

²⁶ Ma awara parãpa unu p'ani mãik'aapa ùri p'ani Pablopa jaratee bi, ne-inaa ooda eperãarãpa ai k'ĩrapite it'aa t'ĩpata ak'õre waibiarã-e. Mãga jara bipa eperãarã chok'ara ichi eere ùraa p'e iru bi. Mãga jara-e bi nama Éfeso p'uurudepai. Ichiaba mãga jara bi jõma Ásia eujãde.

²⁷ Iru pedee ijãaruta pirã, tachia ooda neto amaadai mãik'aapa tachia p'arat'a waa jitada-e pai. Ma awara tachi nawe Artemisade ijãada-e pai mãik'aapa ichiaba waa iru ïgrete ak'ida-e pai. Mãgí tede na Ásia eujãdepemaarã mãik'aapa jõmaweda Roma jua ek'ari p'anirã irumaa it'aa t'ĩpata. ¿Wãara-ek'ã aji, mia jara bi?

²⁸ Arii p'anadap'edaarãpa mãga ùridak'ãri, k'ĩraudachida mãik'aapa biuk'a nĩbeeji:

—¡Artemisa Waibia; tachi Éfeso pidaarã nawe!

²⁹ Mãpai eperãarã waapiara cheepuru nĩbeeji mãik'aapa p'uuru pidaarã jõma k'ĩraupik'a para beeji. Mãpai Gayo, Aristarco ome jita atajida mãik'aapa atadachida ãchi chip'edaipatamaa. Ma eperãarã omé Macedonia eujãdepemaarã paji. Ichiaba Pablo ome nipapachida.

³⁰ Pablo wãit'ee paji ma p'uuru pidaarã k'ĩrapite pedeede. Mamida ijãapataarãpa wãpida-e paji.

³¹ Ichiaba Asiadepema poroorã ùk'uru Pablo ome k'õp'ãyo meraadap'edaa perã, jara pëijida wãnaamerã ma eperãarã k'ĩraupik'a para bimaa.

³² Mãimisa, chi cheepurudap'edaarã waapiara k'ĩraupik'a para beeji. Ùk'uruurãpa ne-inaa jara-

pachida; awaraarãpa biapachida. Mapa biuk'a nĩbaji. Ũk'uruurãpa k'awada-e p'anajida sãap'eda cheepurudap'edaa.

33 Judiorã arii p'anadap'edaarãpa Alejandro-maa nepiridap'eda, jõmaarã taide ateejida. Mãpai Alejandro-pa juapa jaraji k'ĩup'ee p'aneedamerã, ãchi k'ap'ia pedeeit'ee perã.

34 Mamĩda eperãarã k'ĩraupik'a para badaarãpa ichi judío k'awaadak'ãri, perã hora omé waapiara biuk'a nĩbeeji. Mãgapachida:

—¡Artemisa Waibia; tachi Éfeso pidaarã nawe!

35 Mãpai ai p'uurudepema secretariopa eperãarã k'ĩup'ee p'anapiji mãik'aapa mãgaji:

—Éfeso pidaarã, jõmaarãpa k'awa p'anida aji, na p'uuru pidaarãpata tachi nawe Artemisa jĩak'a it'ariipa baaida ichi ãgrestede jĩapata.

36 Apidaapa nãgí p'oyaa merada-e perã, k'ĩra jĩp'a p'anéeti, ne-inaa k'achia pariatua ooda-ee.

37 Na eperãarã parãpa anee p'ani tachi ãgrestedepema net'aa maarepida chiada-e p'ani mãik'aapa tachi nawe ãpĩte pedee k'achia jarada-e p'ani.

38 Demetrio wa chi k'õp'ãyoorã nepira iru p'ani pirã awaraa ome, Romadepema charraarãmaa wãti. Ārapa ak'idaipi, ma-it'ee p'anadairã.

39 Mamĩda jõmaarãpa awaraa nepira iru p'ani pirã, k'ĩra jĩp'a cheepurudak'ãri, ma nepira jõ pëidai.

40 Idipema oodap'edaa k'aurepa Romadepemaarãpa k'ĩsiadait'ee tachi chõoyaa p'ani. Nãga bide ãchia iidi p'ani pirã sãap'eda idi nãga oojida, ¿sãga p'anaudayama? aji.

41 Māga jarap'eda, eperāarā jōmaweda āchi te chaa pëik'ooji.

20

Pablo Macedonia eujādee māik'aapa Grecia eujādee wāda

¹ Eperāarā āchi te chaa wādap'edaa t'ēpai, Pablopa ijāapataarā t'ĩ p'eji ũraait'ee. Maap'eda wāji Macedonia eujādee.

² Mama ijāapataarā ũraa nipap'eda, panaji Grecia eujāde.

³ Atane ōpee mama beeji. Mamāik'aapa barcode wāit'ee bide Siria eujādee, k'awaaji judiorāpa ichi peedait'ee ot'ewa p'ani. Mapa waya āpítee p'irrabaidachi. Mata wāyaaji Macedonia eujāde.

⁴ Ma wādade iru k'ōp'āyaajida nāgí ijāapataarāpa: Pirro warra Sópatro, Berea p'uurudepema; Aristarco māik'aapa Segundo, Tesalónica p'uurudepema; Gayo, Derbe p'uurudepema; Timoteo, Tíquico māik'aapa Trófimo, Ásia eujādepema.

⁵ Māirā tai naa wājida māik'aapa ninajida Troas p'uurude.

⁶ Ma t'ēpai tai wājida Filipos p'uurudeepa, fiesta pan levadura wēe k'opata wāyaap'eda. Barcode wā nipadap'edaa perā, k'āima joisomaamaa panajida Troas p'uurude. K'irachuunadap'eda apemaarā ome, mama k'āima siete p'aneejida.

Pablopa ooda Troas p'uurude

⁷ Tomia ewate tai chip'ejida apemaarā ijāapataarā ome nek'odait'ee māik'aapa Cristo piuda k'irāpadait'ee. Pablopa ijāapataarāmaa

jarateemaa baji esapite parumaa, ichi ai norema wãit'ee pada perã.

8 Te piso it'ipema cuartode chip'e p'anajida mãik'aapa lamparara ïdaa nĩbaji.

9 Pablo jarateemaa bi misa, k'ũtrãa Eutico apatap'edaa su-ak'i baji ventanade ũrimaa. Mamĩda Pablopa taarã jarateeda perã, ma k'ũtrãa k'ãidaip'eda, tudú padachi piso õpeedeepa. Aramata piu jira atanajida.

10 Mãpai Pablo irabaip'eda, ma k'ũtrãa k'ap'ia wëre ataji mãik'aapa mǎgaji chi k'õp'ãyoorã arii p'anadap'edaarãmaa:

—¡P'eranáati! ¡Iru chok'ai bipi!

11 Mãpai Pablo waya teedaa wãk'ãri, nek'ojida mãik'aapa Cristo piuda k'irãpajida. Mata waya ichi jarateemaa beeji ewarirumaa. Ewarik'ãri, wãji ichi ode.

12 Ma k'ũtrãa piu bada chok'ai atedap'edaa perã ichi temaa, ijãapataarã o-ĩa p'aneejida.

Troas p'uurudeepa Mileto p'uurudee wãda

13 Pablo ode wã k'inia baji. Mapa tai naa wãjida barcode Aso p'uurudee. Mama nijida iru bateau atadait'ee.

14 Aso p'uurude unudak'ãri, bateauji tai ome mãik'aapa wãjida Mitilene p'uurudee.

15 Mamãik'aapa uchiadap'eda, ai norema Quío isla k'ĩrapite wãyaajida. Ma norema Samos p'uurude panajida. Mamãik'aapa panajida Mileto p'uurude.

16 Mǎgá oojida Pablo waa wã k'inia-e bada perã Ásia eujãdee. Ma awara Éfeso p'uurude wiibai

k'inia-e paji, Jerusalende isapai pana k'inia bada perã, Pentecostés fiesta ewate pai naaweda.

Pablopa jarada Éfeso p'uurudepema ijãapataarã ak'ipataarãmaa

17 Mãgã Éfeso p'uurude wiibai k'inia-e paji taarãi jãak'aapa. Mamãda Mileto p'uurude pachedak'ãri, Pablopa t'ĩ pëiji Efesodepema ijãapataarã ak'ipataarã.

18 Æchi pachedak'ãri, ichia mãgaji:

—Parãpa k'awa p'anida aji, sãgata mi nipapari parã t'ãide, na Ásia eujãde ewaa pachedak'ãriipa.

19 Taarãru parã ome Tachi Ak'õrepa oopi bik'a oomaa bi, chupiria nĩbide mãik'aapa nepirade nĩbide judiorã juapa.

20 Mamãda jõmaarã taide waawee-ee jarateeki, parã te chaa paara. Mãga ooji parã ũrait'ee mãik'aapa k'aripait'ee.

21 Auk'a jarateeki judiorãmaa mãik'aapa judio-eerãmaa, ãchia p'ek'au k'achia oopata oodaamaa p'aneedamerã mãik'aapa Tachi Waibia Jesucristode ijãadamerã.

22 Írá wãru Jerusalendee, Tachi Ak'õre Jaurepa mãga k'inia bairã. Wãit'ee k'awa-e bi mĩda k'ãata mi ome oodait'ee mama.

23 Nãgapai k'awa bi. P'uuru bee chaa wãyaarude Tachi Ak'õre Jaurepa mĩmaa k'awapiru mi miait'ee mãik'aapa carcelde chupiria nĩbanait'ee.

24 Mamãda mia p'ua-e bi, piuru pijida Jesupa oopi bik'a oo k'inia bairã. Jĩp'a jaratee k'inia bi na pedee pia: Tachi Ak'õrepa eperãarã k'inia iru bairã, tachi k'aripaji Jesucristo piuda k'aurepa.

25 'Māga jarateeeji parā t'āide. Ma awara Tachi Ak'ōrepa parāmaa jarateeeji ichia oopi k'inia bi Cristode ijāapataarāmaa. Mia k'awa bi parāpa mi k'īra waa unuda-e pait'ee.

26 Mapa idi weda Tachi Ak'ōre k'īrapite mia jara bi: parādepema aba piuk'āri atuaru pirā, mi k'aurepada ada-e pait'ee.

27 Māga jara bi mia jarateeda perā jōmaweda Tachi Ak'ōrepa jarapidak'a.

28 Mapa ĩpemaarā, chik'aripa p'anapatáati māik'aapa ijāapataarā pia ak'i p'anapatáati, ma-it'ee Tachi Ak'ōre Jaurepa parā jirit'erada perā. Tachi Waibiapa k'inia bi parāpa ak'idamerā ichide ijāapataarā, ichia āra o k'achiadeepa k'aripa atada perā, ichi waa bat'ada k'aurepa.

29 Mia k'awa bi ne-animal k'achia beerā atu chepatak'a eperāarā peede, māga pik'a mi nāik'aapa wāda t'ēpai awaraarā chedait'ee Cristode ijāapataarā ijāa amaapide.

30 Ichiaba pāchi t'āideepa pida uchiadait'ee seewa jarapataarā. Māgirāpa ijāapataarā āchi eere atee k'inia p'anadait'ee.

31 Mapa k'īra ĩbia p'anāti māik'aapa k'irāpāti sāga mi chupiría nībaji año ōpee, parā ūraa bi misa p'ārik'ua māik'aapa āstaawa.

32 'Īrá ĩpemaarā, mia parā biru Tachi Ak'ōre juade, ichia parā pia ak'i bapariimerā ichi ūraa p'ādade jara bik'a. Ichi aupaita parāmaa oopii ichia oopi k'inia bik'a, māgá iru-it'ee p'anapataadamerā chí apemaarā awara bidaarāk'a.

33 Mia chīara p'arat'a, nēe māik'aapa p'aru k'īa-e bi.

34 Parãpa pia k'awa p'ani michi juadoopa mimiapari mãik'aapa ne-inaa atapari michi-it'ee mãik'aapa mi ome p'anirã-it'ee.

35 Mia parãmaa at'apai jarateedoo, auk'a mimiadamerã mãik'aapa chik'aripa para bamerã. K'irãpãti Tachi Waibia Jesupa jarada: "Pipãara bi teeit'ee, jitai k'ãyaara."

36 Mãga jarap'eda, Pablo bedabaidachi mãik'aapa it'aa t'iji Tachi Ak'õremaa jõmaarã ome.

37 Mãpai jõmaweda jëejida t'ãri p'uapa mãik'aapa Pablo wëre atapachida.

38 K'ira pia-ee para baji, Pabopa ichi k'ira waa unuda-eda ada perã. Maap'eda, barco badamaa k'õp'ãyanajida.

21

Pablo Jerusalendee wãda

1 Mãgã despeditap'eda, barcode tai bataujida mãik'aapa wãjida Cos isladee. Ai norema wãjida Rodas isladee. Mamãik'aapa panajida Pátara p'uurude.

2 Mama barco Fenicia eujãdee wã nipadade bataujida mãik'aapa wãjida.

3 Ma wãdade Chipre isla unujida tai juabi eere. Mata wãjida Siria eujãde Tiro p'uurude panarutamaa, mama net'aa barcode atee wãdap'edaa atabëidait'ee pada perã.

4 Mama ijãapataarã jiridak'ãri, unu atajida mãik'aapa ewari siete p'aneejida ãra ome. Mama bide Tachi Ak'õre Jaurepa ma ijãapataarãmaa k'awapiji Pablo Jerusalende p'asait'ee. Mapa irumaa jarajida wãnaamerã.

⁵ Māga jarajida mīda, tomiamaa tai mamāik'aapa uchiajida. Māpai ijāapataarā āchi wēra māik'aapa chi warrarā ome p'uurudeepa taawaa tai k'ōp'āya tee chejida p'usa ide. Ma ipude bedabajida māik'aapa jōmaweda Tachi Ak'ōremaa it'aa t'ijida.

⁶ Maap'eda, despediidap'eda, tai wājida barcode. Jōdee, ma ijāapataarā āchi te chaa erreujida.

⁷ Tiro p'uurudeepa tai wājida. Mata panajida Tolemaida p'uurude. Mama ijāapataarā ome ewari aba p'aneejida.

⁸ Ai norema uchiadak'āri, panajida Cesarea p'uurude. Mama panadak'āri, wājida Tachi Ak'ōre Ūraa jarateepari Felipe temaa. Māgí Felipe Cristopa jirit'eradaarā k'aripapataarā sietedepema paji. Mama p'aneejida.

⁹ Felipepa k'au k'īmari iru baji, at'āri imik'īra wēe. Māirāpa jarapachida Tachi Ak'ōre Jaurepa jarapidak'a.

¹⁰ Mama taarā p'anide Judea eujādeepa cheji Tachi Ak'ōre pedee jarapari, t'ijarapatap'edaa Agabo.

¹¹ Taimaa pachek'āri, Pablo k'irride jīpari ēra ataji. Māpai Agabopa ichi jua bīiri ome p'ārajī ak'i beeji māik'aapa māgaji:

—Tachi Ak'ōre Jaurepa jara bi: “Jerusalende judiorāpa nāgá oodait'ee nāgí k'irride jīpari chipari ome, iru judio-eerā poroorā jua ek'ari bidak'āri.”

¹² Taipa māik'aapa Cesareadepema ijāapataarāpa māga ūridak'āri, Pablomaa enenee jōneejida Jerusalendee wānaamerā.

¹³ Mamīda irua māgaji:

—¿K'ãare-it'ee jãk'iara jëe p'anima? aji. Mi t'ãri p'uapit'aaruta. Ichita mi wãit'ee Jerusalendee jĩ nĩbiruta pijida, ma awara peet'aaruta pijida, mia Cristopa ooda jaratee bi k'aurepa.

14 Tai pedee ũri-e pada perã, ichiak'au bijida. Jĩp'a Tachi Ak'õre juade bijida, Tachi Ak'õrepa ichiak'au oomerã ichia oo k'iniata.

15 Maap'eda, net'aa p'e atadap'eda, wãjida Jerusalendee.

16 Cesaredepema ijãapataarã ũk'uru wãjida tai ome, ateedait'ee Chipre isladepema Mnasón ap-atap'edaa temaa, Jerusalende bi. Mãgí eperã taarã weda Cristode ijãa bapachi.

Pablo Santiagomaa p'asiade wãda

17 Jerusalende panadak'ãri, ijãapataarãpa o-ĩa tai auteebaijida.

18 Ai norema Pablo tai ome Santiagomaa wãji. Mama ichiaba ijãapataarã ak'ipataarã p'anajida.

19 Pablopa saludaap'eda, nepiriji jõma Tachi Ak'õrepa ooda ichi k'ap'ia pari judio-eerã t'ãide.

20 Mãga ũridak'ãri, o-ĩa para beeji mãik'aapa it'aa t'ijida Tachi Ak'õremaa jaradait'ee iruta jõmaarã k'ãyaara waibiara bi. Mãpai Pablomaa mägajida:

—Ipema Pablo, pia k'awa bida ajida, nãpema judiorã cho-k'ara Cristode ijãa p'ani. Mamĩda at'ãri k'ĩsia p'ani Moisepa p'ãdade jara bik'a oodaipia bi.

21 Mãgĩrãpa ũri p'ani pia judiorã awaraa eujãde p'anĩrãmaa jaratee ni Moisepa p'ãdade jara bik'a oonaadamerã, mãik'aapa warra k'ap'iaade tauchaa binaadamerã, ma awara ne-inaa chonaarãweda oopatap'edaa oonaadamerã.

²² Maperã, ¿taipa sãga oodaima? Ārapa pi nama che bi k'awaa atadait'ee.

²³ Mapa nãga oopáde aji: nama ijãpataarã k'ĩmariirãpa Tachi Ak'õremaa jaradap'edaak'a ewaa oodait'ee, waya iru tede t'ĩu pia p'aneedamerã.

²⁴ Pichi ome p'e atepáde aji, mãik'aapa p'aapáde aji, ãchimaa p'aapipataarãpa iidi p'ani. Oodapáde aji, Tachi Ak'õre Ūraade jara bik'a; puda t'ĩpidamerã mãik'aapa Tachi Ak'õre tede t'ĩu pia p'aneedamerã. Mãgá ooru pirã, jõmaarãpa k'awaadai pi ãpíte seewa nepiri p'ani. Ma awara pia mãgá ãramaa ak'ipii Moisepa p'ãdade jara bik'a ichiaba oopari.

²⁵ Jõdee mãga oopi k'iniada-e judio-eerãmaa, ichiaba Cristode ijãadak'ãri. Jĩp'a taipa ãramaa p'ã pèi p'ani: k'onaadamerã nechiarã ata bidap'edaa ne-inaa eperãpa ooda k'ĩrapite, ai k'ĩrapite it'aa t'ĩpata; k'onaadamerã ne-inaa waa maa-e pirã ne-animal ÿyapa jĩa piuda chiara mãik'aapa pariatua p'ek'au oonaadamerã.

Pablo Tachi Ak'õre te waibiade jita atadap'edaa

²⁶ Ai norema Pablopa ma eperãarã k'ĩmari ateeji Tachi Ak'õre temaa. Oojida Moisepa p'ãdade jara bik'a t'ĩu pia p'anadamerã Tachi Ak'õre te waibiade. Maap'eda Pablo t'ĩuji Tachi Ak'õre tede jarait'ee sãapaita Tachi Ak'õremaa ãchia jaradap'edaa jõdait'ee mãik'aapa sãapaita ãchia ne-animalaarã atedait'ee p'aareerãmaa peedap'eda, paadamerã Tachi Ak'õre-it'ee.

²⁷ Ewari siete jõit'ee nĩbide ma eperã k'ĩmari jõdait'ee paji ãchia oodait'ee bada t'ĩu pia p'aneedamerã Tachi Ak'õre te waibiade. Mama

p'anide Ásia eujãdepema judiorãpa Pablo unu atajida Tachi Ak'õre te waibiade. Mapa ãchia arii p'anadap'edaarã k'ĩraupik'oojida. Pablo jita atadap'eda, biajida:

28 —Israel pidaarã, tai k'aripáti. Nãgí eperãpa p'uuru bee chaa ne-inaa k'achia jaratee ni tachi judiorã ãpíte. Jaratee bi Moisepa p'ãdade jara bik'a oonaadamerã mãik'aapa pedee k'achia jara bi na te ãpíte. Ma awara judio-eerã t'ĩupiji nama, mãgeerã Tachi Ak'õrepa t'ĩupiik'araa bida a bi mĩda. Mãgá Tachi Ak'õre te waibia k'achia oomaa bi.

29 Mãga biapachida ai naaweda Pablo unudap'edaa perã p'uuru jãde ni Trófimo ome. Mãgí Éfeso p'uurudepema paji. Ma omé unudap'edaa perã mãgá, judiorãpa k'ĩsiajida Pablo ma eperã auk'a t'ĩupiji Tachi Ak'õre tede.

30 Ma k'aurepata p'uuru pidaarã jõmaweda k'ĩrau para beeji. Mãpai eperãarã p'ĩsua cheepuru nĩbeeji. Pablo jita atajida mãik'aapa jidi babataa atadachida Tachi Ak'õre temãiipa. Aramata Tachi Ak'õre te jãpataarãpa chi t'ĩupata jõmaweda jãjida.

31 Mãga nide taawa Pablo peet'aadait'ee pak'ãri, Romadepema soldaorã poro waibiamaa jarana-jida p'uuru pidaarã jõma k'ĩrau para nĩbi.

32 Aramata ichi soldaorã p'e atap'eda, awaraa poroorã ome p'ira chejida see nĩbadamaa. Ma soldaorã poro waibia chi soldaorã ome cheruta unudak'ãri, eperãarãpa Pablo ichiak'au bijida.

33 Mãpai ma soldaorã poro waibia chep'eda, Pablo jita ataji mãik'aapa cadena omeepa jĩ nĩbipiji. Maap'eda eperãarãmaa iidiji k'asaa t'ĩjarapata jã eperã mãik'aapa k'ãare k'achiata ooji.

³⁴ Biuk'a nībeeji; abaapa ne-inaa jarapachi, awaraapa ne-inaa awara. Mapa chi soldaorã poro waibiapa p'oyaa k'awa-e paji k'asaa jara para bi. Maperã jaraji soldaorãmaa āchi temaa ateedamerã.

³⁵ Soldaorã temãi tomede panadak'āri, Pablo it'í jira ateejida eperãarã waidoopa,

³⁶ eperãarã t'ēe bia wādap'edaa perã:

—jPeet'áati!

Pablopa judiorãmaa jarada

³⁷ Mamīda teeda panadai naaweda, griego pedeede Pablopa mǎgaji ma soldaorã poro waibiamaa:

—Mi pi ome arak'atia pedee k'inia bida aji.

Mǎpai mǎgí poro waibiapa p'anauji:

—¿Pia griego pedee k'awa bi-ek'ã? aji.

³⁸ ¿Mǎgara pi-ek'ã aji, jā Egipto pidapa mēepemaarã cuatro mil ateeda eujã pania wēe bima?

³⁹ Pablopa p'anauji:

—Mǎga-eda aji. Mi judiopi Tarso p'uurudepema. Mǎgí p'uuru Cilicia eujāde bi. Mi ma p'uuru pipiara bidepemapi. Mi chupiria pedee pipāde aji, eperãarãmaa.

⁴⁰ Mǎpai mǎgí soldaorã poro waibiapa pedee piji. Pablo tomede baini beep'eda, juapa eperãarãmaa jaraji k'īup'ee p'aneedamerã. Eperãarã k'īup'ee para beek'āri, Pablo hebreo pedeede pedeeji.

—Miichi auk'aarã mãik'aapa chonaarã, ùrítì mia jararu.

² Hebreo pedeede pedeeru ùridak'ãri, eperãarã k'ĩup'ee para beeji. Mãpai Pablopa mågaji:

³—Mì judiopi, Tarso p'uurude t'oda. Māgí p'uuru Cilicia eujãde bi. Mamĩda mì nama Jerusalende estudiaji Tachi Ak'õre Ûraa jaratepari Gamaliel ome. Iru k'aurepa mia k'awaaji Moisepa p'ãda, tachi chonaarãpa bëidap'edaa. Ma awara mia oo k'inia bapachi Tachi Ak'õrepa oopi k'inia bik'a, parãpa idi oo p'anik'a.

⁴ Mapa naaweda mia Tachi Ak'õre Ode P'anĩrã apata miapipachi. Æchi jita atap'eda, carcelde t'i nĩbipachi. Wẽraarã mãik'aapa imik'ĩraarã auk'a mágá oopachi.

⁵ P'aareerã poro waibiapa mãik'aapa jõma nãpema poro waibiarãpa k'awa p'ani na jara bi wãara. Ærapa k'art'a p'ãjida mãik'aapa mì ome pëjjida judiorãmaa Damascode, mia ijãapataarã mama p'ani p'e aneemerã nama miapiit'ee. Mamĩda mì k'ĩsia awara k'ĩsiaji.

*Pablopa jarada sãga ichi Cristode ijãada
(Hch 9.1-19; 26.12-18)*

⁶—Mì Damasco k'ait'a pa wãde, imat'ipa it'ariipa ìdaa jëra t'ĩudachi mì ìri.

⁷ Mãpai mì eujãde baainaji mãik'aapa ùriji pedeeru: “Saulo, Saulo, ¿sãap'eda michideerã jiri nima?” aji.

⁸ Mãpai mia iidiji: “¿K'aima pi?” P'anauji: “Mì Jesús Nazaretdepema, pia jiri ni eperãarã poro waibia.”

⁹ Mi ome wādap'edaarāpa ma ĩdaa jēra t'ĩuda unujida. Mamĩda ũrida-e paji mi ome pedeemaa bada.

¹⁰ Māpai mia māgaji: “Tachi Waibia, ¿mia k'āata oopia bima?” aji. Māpai ichia p'anauji: “P'irabáji māik'aapa wāji Damasco p'uurudee. Jāma jaradai pia k'āata ooit'ee.”

¹¹ Ma ĩdaa jēra t'ĩudapa mi tau p'āriudachi. Mapa mi k'ōp'āyoorāpa juadeepa jidiu ateejida Damascodee.

¹² 'Mama baji eperā t'ĩjarapatap'edaa Ananías. Māgipa oopachi Moisepa p'ādade jara bik'a. Mapa Damascodopema judiorāpa iru pia unupachida.

¹³ Irua mi ak'i chek'āri, māgaji: “Ipema Saulo, waya unupáde” aji. Aramāgá tau eratidachi māik'aapa mia iru unuji.

¹⁴ Māpai irua māgaji: “Tachi chonaarā Ak'ōre Waibiapa pi jirit'eraji k'awaamerā ichia pĩmaa oopi k'inia bi. Ma awara pi jirit'eraji unumerā Jesucristo, chi p'ek'au k'achia wēe bi māik'aapa ũrimerā pedee ichi it'aideepa.

¹⁵ Māga ooji pita jōmaarā taide irua jararu jarateepari pait'ee perā, jarak'āri na unuda māik'aapa ũrida.

¹⁶ Mapa ĩraweda poro choopipáde aji, māik'aapa Jesumaa it'aa t'ĩpáde aji, irua p'ichi p'ek'au k'achia wēpapimerā.”

Tachi Ak'ōrepa Pablo jirit'erada judio-eerāmaa jarateenamerā

¹⁷ —Waya Jerusalendee chek'āri, wāji Tachi Ak'ōre te waibiadee it'aa t'ĩide. Mama k'āimok'araa pik'a bide unuji Jesús.

18 Ichia mĩmaa mǎgaji: “Isapai uchiapáde aji, Jerusalendeepa, nama pia jarateek'ári mia ooda, ũri k'iniada-e pait'ee perǎ.”

19 Mǎpai mia p'anauji: “Mamĩda jōmaarāpa k'awa p'ani Tachi Ak'ōre Ũraa jarateepata te chaa wāk'ári, mia ijǎapataarǎ p'e aneepachi carcelde t'ik'oode mǎik'aapa p'u oopide.

20 Ma awara pi mimiapari Esteban peedak'ári, mi arii baji mǎik'aapa iru peedap'edaarǎ p'aru ak'i baji. Írá pide ijǎa bita, ¿ũridaik'ǎ mia āramaa nepirik'ári mi pi ome unuda?”

21 Mamĩda ichia mĩmaa mǎgaji: “Namǎik'aapa uchiapáde aji, mia pi pēit'ee perǎ awaraa eujádee judio-eerāmaa jarateenamerǎ.”

22 Mǎgapai eperǎarāpa Pablo pedee ũrijida. Mǎpai ma ũri para badaarāpa biamaa p'anejida:

—jǎ eperǎ chok'ai baik'araa bida! ajida.
jPeet'aadapáde! ajida.

23 Eperǎarǎ waapiara biuk'a nĩbeeji. Āchi p'aru jĩap'ejida mǎik'aapa eujǎ p'ora it'aa bat'apachida, k'ĩrau para bada perǎ.

Pablo soldaorǎ poro waibia juade

24 Mǎpai chi soldaorǎ poro waibiaapa jaraji Pablo ateedamerǎ soldaorǎ temaa mǎik'aapa widamerǎ. Mǎga ooji ichia ũri-e pada perǎ Pablopa jarada judiorǎ pedeede. K'ĩsijaji Pablo widak'ári, jarapidai sǎap'eda eperǎarǎ jǎga k'ĩrau para bi iru ome.

25 Mamĩda jĩmaa p'anide widait'ee, Pablopa iidiji chi widait'ee p'anadap'edaarǎ poromaa:

—Mi Romadepema. ¿Pia wipiipia bik'ǎ aji, eperǎ Romadepema, ateedai naaweda charraarāpa ak'idamerǎ?

26 Māgí capitanpa māga ũrik'āri, isapai wāji āchi poro waibiamaa māik'aapa māgaji:

—¿Pia, k'āata ooit'eema aji, jā eperā Romadepema ome?

27 Māpai āchi poro waibia chek'āri, Pablomaa iidiji:

—¿Wāara pi Romadepemak'ā? aji.

Pablopa p'anauji:

—Wāarada aji.

28 Māpai soldaorā poro waibiapa māgaji:

—Mia p'arat'a waibia p'aajida aji, eperā Romadepema pait'ee.

Māpai Pablopa p'anauji:

—Mi Romadepema, mi ak'ōre māga bada perā.

29 Māpai chi widait'ee p'anadap'edaarāpa ichiak'au bijida. Āchi soldaorā poro waibia jida p'eraji Pablo jīpi bada perā wīpiit'ee, Romadepema bita.

Pablo Junta Suprema k'īrapite

30 Ai norema soldaorā poro waibiapa Pablo cadenapa jī bada ērapiji māik'aapa uchua ataji carceldeepa, k'awa k'inia bada perā sāap'edata judiorāpa Pablo perá peejida. Mapa p'aareerā poroorā māik'aapa Junta Supremadepemaarā jōmaweda t'ī p'e atap'eda, Pablo uchiapiji āchi k'īrapite.

23

1 Pablopa Junta Supremadepemaarā see nībadamaa ak'iji māik'aapa māgaji:

—Michi auk'arā, mi at'āri k'īsia p'ua-ee ni Tachi Ak'ōre k'īrapite, mia oo k'inia bairā irua oopi bik'a.

² Māga ũrik'āri, p'aareerā poro waibia Ananiapa Pablo it'aïmaa wipiji iru k'ait'a p'anadap'edaarāmaa.

³ Mamīda Pablopa māgaji:

—¡Tachi Ak'ōrépata pi k'achia ooyada aji, t'āri k'achia-idaa bairā! Pi jāma su-ak'i bi mia ooda ak'iit'ee Moisepa p'ādade jara bik'a. Mamīda irua p'ādak'a oo-e bi. Moisepa p'ādade jara bi chupiria k'awaamerā. Mamīda pia mi chupiria k'awa-e bi. ¡Ma k'āyaara mi it'ai wipiru!

⁴ Māpai arii p'anadap'edaarāpa māgajida:

—¿Jāgata ik'achia jararuk'ā ajida, Tachi Ak'ōre p'aareerā poro waibiamaa?

⁵ Māpai Pablopa p'anauji:

—Michi auk'arā, mia k'awa-e pajida aji, iru p'aareerā poro waibia. Tachi Ak'ōre Ũraa p'ādade jara bi:

'Pedee k'achia jaranáati pāchi p'uuru pidaarā poroorā āpite.'

(Ex 22.28)

⁶ Maap'eda Pablopa unuk'āri ma see nībide para bi saduceo eerepemaarā māik'aapa fariseo eerepemaarā, ichi t'āridepai k'īsiaji. Maap'eda golpe pedeeji:

—Michi auk'arā, mi fariseopi; fariseorādeepa uchiada. Mia ijāa bi tachi piup'eda, chok'ai p'irabaidait'ee. Maperāta nāgá parā k'īrapite mi anee p'ani, mia ijāapari ak'idait'ee.

⁷ Pablopa māga jarak'āri, fariseo eere p'anadap'edaarā māik'aapa saduceo eere p'anadap'edaarā āchi pitapai aupedee para beeji.

⁸ Māga oojida saduceorāpa jarapata perā piu-dap'edaarā chok'ai p'irabaida-e, angeleerā wē-e māik'aapa tachi jaure wē-e. Jōdee fariseorāpa ijāapachida māgí jōma paraa.

⁹ Maperāpi biuk'a nībeeji. Ũk'uru Moisepa p'āda jarateepataarā fariseo eere p'anadap'edaarāpa māgajida:

—Na eperāpa ne-inaa k'achia oo-e bida ajida. ¿Eperā jaurepa maa-e pirā angelpa irumaa pedeeji-ek'ā? ajida.

¹⁰ Audupai biuk'a nībeek'āri, soldaorā poro waibiapa, ewaa Pablo peet'aadai jīak'aapa, t'iji chi soldaorā iru uchia atadamerā ma biuk'a nībadadeepa māik'aapa ateedamerā āchi temaa.

¹¹ Ai norema p'ārik'ua Tachi Waibia Jesús Pablo ik'aawa bainī ba cheji māik'aapa māgaji:

—jWaaweenāaji! Mia ooda eperāarā k'aripait'ee pia jarateedak'a Jerusalende, jāgá ichiaba jarait'ee Roma p'uurude.

*Judiorāpa pedeeteedap'edaa Pablo
peet'aadait'ee*

¹² Ai norema judiorā ũk'uruurāpa pedeeteejida Pablo peet'aadait'ee. Māgírāpa Tachi Ak'ōre k'īrapite nek'oda-eda ajida, Pablo peet'aarutamaa.

¹³ Māgí pedeeteedap'edaarā cuarenta imik'īraarā audú paji.

¹⁴ Āchi wājida p'aareerā poroorāmaa māik'aapa judiorā poro waibiarāmaa māik'aapa māgajida:

—Taipa Tachi Ak'ōre k'īrapite juraajida nek'oda-e pait'ee Pablo peeda-emāi.

¹⁵ Írá parāpa māik'aapa awaraa Junta Supremadepemaarāpa jara pēiti soldaorā poro

waibiamaa nu Pablo aneedamerã, seewata parãpa pipiara k'awa k'inia p'anadairã k'ãare k'achiata oo bi irua. Ma aneerutade taipa ode peet'aadayada ajida.

¹⁶ Mamĩda Pablo ipewẽra warrapa k'awaak'ãri mãga pedeeteeruta, wãji soldaorã temaa jarat'aade Pablomaa.

¹⁷ Maap'eda Pablopa soldaorã poro t'iji mãik'aapa mãgaji:

—Atéjei nãgĩ warra pichi poro waibiamaa, ne-inaa jara k'inia bairã.

¹⁸ Mapa ma soldaorã poropa ateeji ichi poro waibiamaa mãik'aapa mãgaji:

—Pablo preso bipa mi t'iji na warra pĩmaa aneemerã ne-inaa jara k'inia bairã.

¹⁹ Chi soldaorã poro waibiapa warra juade jita atap'eda, ãyaa ateeji mãik'aapa iidiji:

—¿K'ãata mĩmaa jara k'inia bĩma? aji.

²⁰ Mãpai ma warrapa mãgaji:

—Judiorãpa pedeeteejida pĩmaa iididait'ee Pablo nu ateemerã Junta Suprema k'ĩrapite, pipiara k'awaadait'ee iru nepĩra.

²¹ Mamĩda ijãanaapãde aji, imik'ĩraarã cuarenta audú ot'ewa p'anadait'ee perã. Ma awara ãchia Tachi Ak'õre k'ĩrapite juraajida nek'oda-e pait'ee Pablo peet'aarutamaa. Mapa taarã-e mãga iidi chedait'ee, pia Pablo ãchĩmaa atepimerã.

²² Mãpai soldaorã poro waibiapa mãgaji:

—K'ĩrak'aupai chĩaramaa jarai pia mĩmaa nepĩri cheda.

Maap'eda ma warra pëiji ichi temaa.

Pablo Romadepema poro Félix k'ĩrapite pëida

23 Aramata soldaorã poro waibiapa t'ĩ p'eji soldaorã poro omé. Mãirãmaa mãgaji:

—P'e atadapáde aji, doscientos soldaorã bĩriipa wãdamerã, ma awara setenta caballo ĩri wãdamerã, ma awara doscientos miasu ome, uchiadamerã p'ãrik'ua a las nueve. Wãdait'ee Cesarea p'uurudee.

24 Ichiaba Pablo-it'ee caballo anéeti ai ĩri wãmerã. K'ĩra jĩp'a ateedapáde aji, Roma jua ek'ari eujã ak'ipari Felixmaa.

25 Ma soldaorã poro waibiapa ichiaba k'art'a p'ã tee pëiji. Made jara pëiji:

26 “Claudio Lisiapa nãga p'ãru Felixmaa.

Mia salude pëiru pĩmaa. Pi Roma jua ek'ari eujã ak'ipari pipiara bi. Mapa na nepira mia jara k'inia bi pĩmaa.

27 Na eperã mia pëiru pĩmaa judiorãpa jita atajida mãik'aapa perá peet'aajida. Mamĩda mia k'awaak'ãri iru Romadepema, michi soldaorã ome wãdap'eda, ãra juadeepa k'aripa ataji.

28 Mia k'awa k'inia baji k'ãare-it'eeta ãrapa iru imiatee p'anajida. Mapa iru ateeji judiorã nepira ak'ipataarã k'ĩrapite.

29 Mamĩda mama bide k'awaaji na eperã neinaa k'achia oo-e bi. Jĩp'a ãra chonaarãwedapema ũraa p'ãdade jara p'anajida. Pedee k'achia jarajida iru ãpĩte. Mamĩda irua ne-inaa k'achia oo-e bada perã, mia k'awaji iru peepiik'araa bi, ma awara carcelde pida baik'araa bi.

30 Ai t'ẽepai mia k'awaaji judiorãpa pedee-teedap'edaa iru peet'aadait'ee. Mapa pĩmaa pëiru. Jara pëiji iru imiatee p'anadap'edaarãmaa pi k'ĩrapite wãdamerã ãchi nepira jarade.

Mãgapai paji.”

³¹ Māpai ma soldaorāpa Pablo p'ārik'ua ateejida Antípatris p'uurudee āchi poro waibiapa jaradak'a.

³² Ai norema soldaorā biiripa wādap'edaarā chejida āchi temaa. Jōdee chi caballo ĩri wādap'edaarā wājida Pablo ome.

³³ Cesarea p'uurude panadak'āri, ma Roma jua ek'ari eujā ak'ipari Felixmaa ma k'art'a teejida, ichiaba Pablo teenajida.

³⁴ Felixpa k'art'a leep'eda, iidiji Pablomaa sāmepema māik'aapa k'awaak'āri Cilicia eujādepema,

³⁵ māgaji:

—Pi pedee ũriyada aji, pi imiateepataarā chedak'āri.

Maap'eda preso jīapataarāmaa jaraji jīa paraa bidamerā Rey Herodepa oopida palaciode.

24

Pablopa Felixmaa ichia ooda nepirida

¹ K'āima joisomaa t'ēpai, p'aareerā poro waibia Ananías pacheji Cesarea p'uurude judiorā poro waibirā ome. Āchi ome cheji Romadepemaarā abogado t'ijarapatap'edaa Tértulo. Ma jōmaweda Roma jua ek'ari eujā ak'iparimaa chejida Pablo imiateedait'ee.

² Māpai Pablo ma see nībadamāi aneedak'āri, Tertulopa jōmaarā k'īrapite Felixmaa māgaji:

—Aai, tachi waibia, pi k'aurepa tai k'āiwee p'anapata na eujāde māik'aapa ĩrā ne-inaa pipiara jēra bi na eujāde, pi k'īsia k'awaa bairā.

³ Tai o-īa p'ani pi ome, ne-inaa jōma pipiara oo bairā.

⁴ Mak'iarā taarā pedee k'inia-e bairā, pi ewari at-uapiamaapa, chupiria k'awāaji mi pedee ūrimerā.

⁵ Jāgí eperā nepira jiriyaa bapari ichi wārumaa na eujāde, judiorā chōopi nipapari perā āchi auk'arā ome. Ma awara ichi nazareno eere p'anirā poro.

⁶ Ichiaba Tachi Ak'ōre te waibiade ne-inaa k'achia ooit'ee paji. [Mapata taipa iru jita atapijida ateedait'ee tai nepira ak'ipataarāmaa.

⁷ Mamīda soldaorā poro waibia Lisias pachek'āri, tai juadeepa jāri ataji, māik'aapa jaraji pi k'īrapite chedamerā.]

⁸ Irá pia jā eperāmaa iidipia bi k'awaait'ee taipa seewa jarada-e p'ani.

⁹ Judiorā arii see nībadaarāpa wāarada ajida.

¹⁰ Maap'eda ma Roma jua ek'ari eujā ak'iparipa Pablomaa juapa jaraji pedeemerā. Māpai Pablopa māgaji:

—Mi o-īa bida aji, pi k'īrapite pedeeit'ee perā michi k'ap'ia pari. Mia k'awa bi pi taarāru na eujādepemaarā charra.

¹¹ Pichia k'awa k'inia bi pirā, iidíji sāaweda mi pache bi. Mi k'āima docepai iru bi Jerusalende pacheda Tachi Ak'ōremaa it'aa t'īde.

¹² Judiorāpa mi unuda-e paji chīara ome aupedee pedeemaa wa eperāarā chōopimaa Tachi Ak'ōre te waibiade. Ichiaba māga unuda-e paji Tachi Ak'ōre Ūraa jarateepata tede pida, wa awara āi.

¹³ Na eperāarāpa pīmaa p'oyaa ak'ipida-e āchia wāarata jara p'ani.

¹⁴ Wāara mia ijāa bi Tachi Ak'ōre Ode P'anirā apata ijāa p'anik'a. Mi it'aa t'īpari tachi chonaarāwedapema Ak'ōremaa māik'aapa ijāa bi

Moisepa p'ädade jara bi, ichiaba Tachi Ak'öre pedee jarapataarãpa p'ädap'edaade jara bi. Nata mia k'achia ooda a p'aní nama p'aníãrãpa.

15 Mia ijãa bi ächik'a; Tachi Ak'örepapa piudap'edaarã chok'ai p'irabaipiit'ee, eperã t'ãri pia beerã mãik'aapa eperã t'ãri k'achia-idaa beerã.

16 Mapa mia jõma oopari k'íisia p'ua-ee bait'ee Tachi Ak'öre k'írapite mãik'aapa eperãarã k'írapite.

17 'Mamída taarã nipap'eda to bee chaa, cheji michi auk'aarãmaa Jerusalende, teeit'ee p'arat'a p'edap'edaa chupiria beerã k'aripait'ee. Ma awara cheji ne-animalaarã teeit'ee p'aareerãpa peedap'eda, paadamerã Tachi Ak'öre-it'ee.

18 Mãpai jõma oop'eda Tachi Ak'öre tede t'íu pia beeit'ee, mama t'íuji. Maap'eda Tachi Ak'öre-it'ee ne-inaa teemaa bide, Asiadepema judiorãpa mi unujida. Mamída chíara ome pida chõo-e paji.

19 Maperã ächita pi k'írapite chek'ajida mi imiateede, wãara k'achia oo baji pirã.

20 Maa-e pirã nama see nĩbĩrãmaa iidíji k'ãare k'achiata unujida mi wãk'ãri Junta Suprema k'írapite Jerusalende.

21 ¿K'achia ooji-epaama aji, ächi k'írapite mia golpe pedee k'ãri: "Idipema ewari parã k'írapite mi aneeruta ijãa bairã tachi piup'eda chok'ai p'irabaidait'ee?"

22 Felixpa mãga ùrik'ãri, jaraji ma nepira ichiak'au bidait'ee soldaorã poro waibia Lisias cheru misa. Mãga jaraji pia k'awa bada perã sãga p'anapata Tachi Ak'öre Ode P'aníãrã.

23 Mãpai Felixpa soldaorã poromaa jaraji Pablo

jĩa paraa bídamerã, mamĩda ichiak'au ak'i chepi-pataadamerã chi k'õp'ãyoorãmaa.

²⁴ Maap'eda taarãpai Félix waya pacheji chi wëra Drusila ome. Mãgí judío wëra paji. Pachedak'ãri, Felixpa Pablo t'ĩ pëiji k'awaait'ee irua ijãada Jesucristode.

²⁵ Mamĩda Pablopa jaramaa bide t'ãri pia nipapariimerã Tachi Ak'õre k'ĩrapite mãik'aapa k'ĩra jĩp'a bapariimerã, ichiaba tachi piuda t'ëepai Tachi Ak'õrepa ak'it'ee tachia pia oodap'edaa mãik'aapa k'achia oodap'edaa, Félix p'eradachi. Mãpai mägaji:

—Jãgapai pia bida aji. Na ewari jua pari bak'ãri, waya pi t'ĩ pëiit'eeda aji.

²⁶ Ma t'ëepai, Felixpa Pablo ip'ii t'ĩ pëipachi, k'ĩsia bada perã Pablopa p'arat'a p'aai, ichi juadeepa uchua pëimerã.

²⁷ Año omé mägá wãyaaji. Ma t'ëepai Félix pari t'ĩuji awaraa eujã ak'ipari, t'ĩjarapatap'edaa Porcio Festo. Mamĩda Félix judiorã ome pia bee k'inia bada perã, Pablo preso bëiji.

25

Pablo Festo k'ĩrapite

¹ Festo pachek'ãri Cesarea p'uurude ma eujã ak'ipari bade, k'ãima õpee mama baji, Jerusalendee wãi naaweda ma p'uuru k'awade.

² Mama bide p'aareerã poroorãpa mãik'aapa judiorã poro waibiarãpa Pablo ãpíte pedeejida.

³ Chupiria iidijida Festomaa Pablo Jerusalendee pëimerã. Mãga oojida pedeetee p'anadap'edaa perã ode peet'aadait'ee.

⁴ Mamīda Festopa māgaji:

—Pablo preso bida aji, Cesarea p'uurude. Taarā-ee mi araa wāit'ee.

⁵ Mapa parā poro waibiarā mi ome pēiti. Māgá ma eperāpa ne-inaa k'achia ooji pirā, iru k'īrapite āchi nepira jaradayada aji.

⁶ Festo Jerusalende baji tomia aba maa-e pirā k'āima diez. Maap'eda cheji Cesarea p'uurudee. Ma pacheda norema charra mimiapari tede su-ak'i beeji māik'aapa Pablo atapiji.

⁷ Pablo pak'āri, judiorā Jerusalendeepa cheep-urudap'edaarāpa imiateejida Festomaa. Mamīda āchia jara p'anadap'edaa p'oyaa ak'ipida-e paji.

⁸ Jōdee Pablopa p'anauji:

—Mia pedee k'achia jara-e bida aji, judiorā ūraa Moisepa p'āda āpīte maa-e pirā Tachi Ak'ōre te waibia āpīte. Ma awara César āpīte pedee k'achia jara-e bida aji.

⁹ Mamīda Festo, judiorāpa ichi t'o p'anadamerā, Pablomaa māgaji:

—¿Wā k'inia bik'ā aji, Jerusalendee, mia jāma pi nepira ak'imerā?

¹⁰ Pablopa p'anauji:

—Nama mi nepira ak'idaipia bida aji, nama mi César charra k'īrapite bairā. Pia k'awa bi mia judiorāmaa ne-inaa k'achia oo-e bi.

¹¹ K'achia oo bi pirā, mi peedaipia bi. Waawee-ee piut'ee. Mamīda k'achia oo-e bi pirā, apidaapa mi āchima teedaik'araa bi. Mapa mia k'inia bida aji, Cesarpa mi nepira ak'imerā.

¹² Māpai Festo pedeeji ichi ūraapataarā ome māik'aapa māgaji Pablomaa:

—Cesarmaa wā k'inia bairā, pi irumaa wāit'ee.

Festopa Pablo nepira jarada Rey Agripamaa

13 Maap'eda, taarāpai Rey Agripa chi ipewēra Berenice ome Festomaa p'asiade wājida Cesarea p'uurudee.

14 Taarā p'anadap'edaa perā, Festopa Pablo nepira nepiriji reymaa:

—Nama bida aji, Felixpa preso bëida.

15 Jerusalende nipak'āri, p'aareerā poroorāpa māik'aapa judiorā poro waibiarāpa mīmaa jarajida Pablo ome nepira iru p'ani. Maap'eda jarajida peepit'aamerā.

16 Mamīda mia p'anauji Romadepema charraarāpa chīara peepidak'aa, ma presopa ichi k'ap'ia pedee-ema ichi imiateepataarā k'īrapite.

17 T'ēepai āra nama pachedak'āri, ai norema mi charra tede wāji maap'eda aneepiji ma preso.

18 Mamīda iru imiateepataarāpa p'oyaa wāarada ada-e paji ma preso k'īrapite. Mia k'īsia baji Pabloma k'achia oo bi. Mamīda māga-e paji.

19 Jip'a jara p'anapachida āchia ijāa p'ani Ak'ōre Waibiapa ooda māik'aapa Jesuda a p'ani piuda; māgita Pabloma chok'ai bida a bi.

20 Mia k'awa-e pada perā sāga ooi, Pablomaa iidiji wā k'inia bi pirā Jerusalendee, jāma mia na nepira waya pia ak'imerā.

21 Mamīda ichia chupiria iidiji Tachi Rey Waibia Cesarpa na nepira ak'imerā. Mapa mia jaraji at'āri preso bamerā, Romadee pëiru misa.

22 Māga ūrik'āri, Rey Agripapa māgaji Festomaa:

—Mia ma eperā pedee ūri k'inia bida aji.

Māpai Festopa p'anauji:

—Nu iru pedee pia ūriyada aji.

²³ Ai norema Agripa Berenice ome, reyrã chi-oo jõmaweda jĩdap'eda, t'ũjida eperãarã chip'edaipata tede. Ichiaba t'ũjida soldaorã poroorã mãik'aapa ma p'uurudepema poro waibiarã. Mãpai Festopa Pablo aneepiji ãchi k'ĩrapite.

²⁴ Festopa mǎgaji:

—Rey Agripa mãik'aapa k'õp'ãyoorã nama see nĩbi, pãchi k'ĩrapite na eperã unu p'ani. Judiorã jõmaarãpa ichi imiatee chepata Jerusalendeepa mãik'aapa Cesarea p'uurudeepa. Jõmaarãta biuk'adaipata mia ichi peepit'aamerã.

²⁵ Mamĩda mi-it'ee irua k'achia oo-e bi piumerã. Ma awara ichia chupiria iidida perã Cesarpa ichi nepira ak'imerã, mapa mia maaaa pëiit'ee.

²⁶ Ichi nepirade mia ne-inaa k'achia unu-e pada perã, p'ã pëiit'ee wëe bi michi poro waibia Cesarmaa. Mapata mia aneeru na eperã parã k'ĩrapite mãik'aapa ma k'ãyaara pi k'ĩrapite, Rey Agripa. Taipa k'awaadak'ãri k'ãare k'achiata oo bi, mia p'ã pëiit'ee reyrã poro waibiamaa.

²⁷ Mi-it'ee pia-e pik'a bi pëiit'ee preso, jara-ee k'ãare k'achiata ooji.

26

Pablopa Rey Agripamaa jarada

¹ Mãpai Agripapa Pablomaa mǎgaji:

—Pedéjei pichi k'ap'ia pari.

Pablopa ichi jua it'aa iaji mãik'aapa mǎgaji:

² —Tachi Rey Waibia Agripa, mi o-ĩa bida aji, idi pi k'ĩrapite pederu perã. Wãarata jarait'ee michi k'ap'ia pari, judiorãpa mi ãpite seewa jara jõnapata perã.

³ O-ĩa bi pedeeit'ee pi k'ĩrapite, pia k'awa bairã tai judiorã p'anapata mãik'aapa k'ĩsiapata. Mapa pĩmaa chupĩria iidit'ee ũrimerã mi pederu misa.

Pablo bapata Cristode ijãai naaweda

⁴ —Judiorã jõmaarãpa k'awa p'ani mi bapata ãra ome miichi tode mãik'aapa Jerusalende.

⁵ Ichiaba k'awa p'ani mi k'ũtrãa weda fariseorã eerepema paji, mãirãpa jõmaarã k'ãyaara pipiara oopata perã Tachi Ak'õre Ũraa p'ãdade jara bik'a. ãrapa mãga jara k'inia p'ani pirã, wãarada adai.

⁶ Maperãta mi parã k'ĩrapite anee p'ani, ijãa bairã Tachi Ak'õrepa jaradade tai chonaarãmaa.

⁷ Tai Israeldeepa uchiadap'edaa ëreerã docedepemaarãpa ni p'ani Tachi Ak'õrepa oomerã ichia jaradak'a. Maperãta ewari chaa tai Tachi Ak'õremaa it'aa t'ĩpata mãik'aapa oopata iru ũraa p'ãdade jara bik'a. Mia auk'a ijãa bi mĩda, mi imiatee p'ani judiorãpa, imiichi auk'aarãpa pida!

⁸ ¿K'ãata k'ĩsia p'anima? ¿Eperã piup'eda, Tachi Ak'õrepa p'oyaa p'irabaipi-e paik'ã?

Pablopa nepirida ichia Cristode ijãapataarã peepida

⁹ —Naaweda mia pida k'ĩsia baji judiorãpa k'ĩsia p'anik'a. Mapa Jesús Nazaretdepema t'ide ijãapataarã miapipachi.

¹⁰ Mãga oopachi Jerusalende. Ijãapataarã chok'ara carcelde t'i nibipachi, p'aareerã poroorãpa mãga oopidap'edaa perã. Ma awara ãrapa ijãapataarã peepidak'ãri, mi o-ĩa beepachi.

¹¹ Ichiaba at'apai mia ijãapataarã miapipachi Cristode ijãa amaadamerã. Mãga oopachi Tachi

Ak'õre Ũraa jarateepata te chaa, āra unuamaa p'e iru bada perā. P'uuru t'imí beemaa, judio-eerā t'āide paara, āra jiri nipapachi.

Pablopa waya jarada ichia sāga Cristode ijāada

12 —Māga ooit'ee paji mi wāk'āri Damasco p'uurudee, p'aareerā poroorāpa mi k'aripadap'eda.

13 Mamīda ode wāde imat'ipa unuji it'ariipa īdaa jēra t'īudaru ak'õrejīru k'āyaara īdaara, mi īri māik'aapa mi ome wādap'edaarā īri.

14 Tai jōmaweda eujāde baainajida. Māpai mia ūriji tai hebreo pedeede pedeeru: “Saulo, Saulo ¿sāap'eda michideerā jiri nima? aji. Pichi k'īradoopa k'achia oomaa bi, p'ak'apa ooparik'a āpītee t'iak'āri chipari nek'ida misuamaa.”

15 'Māpai mia iidiji: “¿Pi, k'aima?” aji. P'anauji: “Mi Jesupi, pia eperāarā jiri ni poro waibia.

16 P'irabaipāde aji, mi mimiapari pait'ee perā. Eperāarā k'īrapite pia jarait'ee mi idi unuda māik'aapa ichiaba jarait'ee mia ne-inaa na ewari ak'ipiit'ee pīmaa.

17 Ma-it'ee pi pēiit'eeda aji, judiorāmaa māik'aapa judio-eerāmaa. Mamīda pi k'aripa atait'ee āchi juadeepa.

18 Āchima pēiit'eeda aji, k'awaadamērā sāga uchiadai o k'achia p'āriu pik'a bideepa māik'aapa Satanás juadeepa. Māgá nipadai īdaa pik'a bide Tachi Ak'õre juade. Mide ijāa p'anī pirā, Tachi Ak'õrepa āchi p'ek'au k'achia wēpapiit'eeda aji, māik'aapa āchia it'ari iru p'anadait'ee jōma Tachi Ak'õrepa k'īsia iru bi ichia awara bidaarā-it'ee.”

Pablopa ooda Tachi Ak'õrepa oopi k'inia bik'a

19 —Mapa Rey Agripa, mia ooji mi ome pedee badapa jaradak'a.

20 Naapiara jaranaji Damasco p'uurude, maap'eda Jerusalende mãik'aapa Judea eujãde. Ichiaba judio-eerãmaa jarateeki. Ma jõmaarãmaa jaraji k'achia oo amaadamerã mãik'aapa oodamerã Tachi Ak'õrepa oopi bik'a, mágá awaraarãmaa ak'ipidait'ee wãara Tachi Ak'õrede ijãa p'ani.

21 Maperãpi judiorãpa mi jita atajida mãik'aapa perã peejida Tachi Ak'õre te waibiade.

22 Tachi Ak'õrepa mi k'aripapari perã, atãri nama ak'inĩ bi jarateeki'ee k'ira jip'arãmaa mãik'aapa waibiarãmaa. Mia jarateepari Tachi Ak'õre pedee jarapataarãpa jaradap'edaa mãik'aapa Moisepa jarada, mágá aupai.

23 Ærapa jarajida Cristo piut'ee mãik'aapa naapiara chok'ai p'irabaiit'ee. Mágá p'irabaik'ãri, ak'ipiji judiorãmaa mãik'aapa judio-eerãmaa ãchi ichiaba it'aa wãdai, mágá ãchi uchiadamerã p'ãriu pik'a bideepa ãdaa bidee.

Pablopa Rey Agripamaa jarada Cristode ijãamerã

24 Pablopa atãri mágá jaramaa bide, Festopa golpe pedeeji:

—Pablo, pi k'ira k'awa-ee baibida aji, audú estudia bipa.

25 Mãpai Pablopa p'anauji:

—jMãga-epi, tachi poro waibia Festo! Mi k'ira pia bida aji. K'ira jip'a nepirãmaa bi mãik'aapa wãarata jara bi.

²⁶ Rey Agripapa pia k'awa bi mia jara bi. Mapa waawee-ee mia nepirímaa bi ichi k'irapite, k'awa bairã nãgí net'aa mera ooda-e paji.

²⁷ Tachi Rey Waibia Agripa, pia ijãa bida aji, Tachi Ak'õre pedee jarapataarãpa jaradap'edaa. ¿Mãga-ek'ã?

²⁸ Mãpai Agripapa mãgaji:

—¿Taarã-e weda mi Cristode ijãapi k'inia bik'ã? aji.

²⁹ Pablopa p'anauji:

—Taarã pedeerupa maa-e pirã mak'íara pedee-eepa, Tachi Ak'õremaa mia chupiria iidi bi pi pari mãik'aapa nama jõma see nĩbi pari, parã mik'a papimerã, mamĩda na cadena wẽe.

³⁰ Mãpai Rey Agripa mãik'aapa eujã ak'ipari Festo p'irabaidap'eda, uchijida Berenice mãik'aapa awaraa mama su-ak'í p'anadap'edaarã ome.

³¹ Maap'eda ãchi pitapai mãgapachida:

—Na eperãpa k'achia oo-e bi piumerã maa-e pirã carcelde bamerã.

³² Mãpai Rey Agripapa mãgaji Festomaa:

—Iru carceldeepa uchía pëik'ajida aji, César k'irapite wã k'inia-e bida ada paara.

27

Pablo Romadee pëida

¹ Pedeteedap'eda, tai pëijida Italiadee. Pablo awaraa presoorã ome bijida soldaorã poro juade, Julio apatap'edaa. Mãgí baji soldaorã batallonde t'ijarapatap'edaa Reyrã Poro Waibiadeerã.

² Bataujida Adramitio p'uurudepema barcode, mãgí wãit'ee pada perã Ásia eujãdee, p'usa ide

p'uuru bee chaa. Tai ome ichiaba nipaji Aristarco, Tesalónica p'uurudepema. Māgí p'uuru Macedonia eujāde bi.

³ Tai uchiadap'edaa norema Sidón p'uurude wiibainajida. Mama soldaorā poro Juliopa Pablo chupiría k'awaap'eda, ichiak'au chi k'ōp'āyoorāmaa p'asiapiji, ārapa iru ak'idamerā māik'aapa k'aripadamerā.

⁴ Waya bataudak'āri, uchijida Sidón p'uurudeepa. Mata Chipre isla āpite wāyaajida, taimaa nāu p'ua nībada perā.

⁵ P'usa jāde wāyaajida Cilicia māik'aapa Panfilia eujā k'īrapite. Mata panajida Mira p'uurude. Māgí p'uuru Licia eujāde bi.

⁶ Mama soldaorā poropa unuji barco Alejandría p'uurudepema wāru Italiadee. Mapa tai jōma ma barcode bataupiji. Māgá wājida tai wādap'edaa ode.

⁷ Mamīda nāu golpe p'ua nībada perā, taarājida piak'āa wādapa. Mata panajida Cnido p'uuru k'īrapite. At'āri nāu taimaa p'ua nībada perā, Creta isla āpite wādade wāyaajida punto Salmona k'īrapite.

⁸ Māgá isla k'ait'a piak'āa wādapa, t'īujida Buenos Puertos bahiade. Māgí Lasea p'uuru k'ait'a baji.

⁹ Maapai judiorā fiesta nek'odak'aa ewari wāyaa baji. Ewari chok'ara atuadai baji nāu k'aurepa. Maperā k'achia baji p'usa jāde wāyaadait'ee, p'usa t'ojara pait'ee nībada perā. Mapa Pablopa ūraaji:

¹⁰ —K'ōp'āyoorā, ĩraweda uchiaruta pirā namāik'aapa, k'achia wādait'eeda aji. Net'aa, barco māik'aapa eperāarā paara atuadariita unu bida aji.

11 Mamĩda ma soldaorã poropa Pablo pedee ũri k'inia-e paji. Ma k'ãyaara barco chipari pedee m̃aik'aapa barco p'erapari pedeeta ũriji.

12 Āchi panadap'edaamãi pia-e bada perã p'usa t'ojara wãyaait'ee, perã jõmaarãpa k'ĩsajida wãyaanadait'ee Fenice p'uurude. Mãgí puerto baji Creta islade. Mãgideepa unupachi noroeste m̃aik'aapa suroeste.

Nãumiapa p'usa jãde atuapit'aada

13 Ewari aba baarek'aapa nãu p'ua nĩbeeji. Mapa ancla jira atajida m̃aik'aapa uchijida, āchia k'ĩsia p'anadap'edaak'a. Isla k'ait'a wãjida tok'esaa wãdaamaapa.

14 Mamĩda taarã-e nide nãumia golpe p'uaji barcomaa, nok'ooreepa m̃aik'aapa ak'õrejĩru uchiapari eereepa.

15 Mapa barco t'imí atadachi. Chi p'erapataarãpa p'oyaa k'ĩrapa nãumaa bida-e paji. Maperã ichiak'au nãumaa atee pijida.

16 Mãgá wãdapa Cauda isla āpĩte wãyaajida. Mãpai waa nãu golpe p'ua-e pak'ãri, barco ātauwaare japa jĩ ateedap'edaa, it'ĩ barcode jidiu atajida āripiamaapa.

17 Mãgí japa it'ĩ jira atadap'eda, barcode mimiapataarãpa barco ek'ari p'irrabai jĩ nĩbijida jĩk'arapa, barco t'oop'epiamaapa. Ma awara waawee p'anajida, p'ooni p'anana dai jĩak'aapa p'usa jãde ipu t'ĩjarapatap'edaa Sirte ĩri. Maperã chi vela pirat'aajida. Maap'eda, ichiak'au nãumaa atee pijida.

18 Ai norema at'āri p'usa waapiara t'o nībada perā nāumiapa, barcode mimiapataarāpa net'aa nībada bat'amaa p'aneejida.

19 Ai norema k'āima ōpeemaa ma nāumia p'ua nībide, vela, jik'ara, pak'uru paara toidaa āchi juadoopa bat'amaadachida.

20 K'āima chok'ara ak'ōrejīru māik'aapa lucero unuda-e paji, eu k'achia nībada perā. Mapa k'īsia p'anajida tai k'iniidait'ee.

21 Barco pidaarā jua araadak'aa paji nek'odait'ee pida, audú mimia p'anadap'edaa perā. Mapa Pablo bainī beep'eda āchi esajīak'a, jōmaarāmaa māgaji:

—K'ōp'āyoorā, mia jarajida aji, uchiada-e pait'ee Creta isladeepa. Mi pedee ūridap'edaa paara, nāga p'asada-e pak'aji. Net'aa chok'ara āridai wā māik'aapa atuadai wā.

22 Mamīda k'īsia p'uanáati. Tachi nama p'anīrādepema apida piuda-e. Mamīda tachi barco atuadait'ee.

23 Mia māga k'awa bi Tachi Ak'ōrepa mīmaa jarada perā ichi ángel it'aideepa. Māga ooji mi ichide ijāapari perā māik'aapa ichia oopi k'īnia bik'a oopari perā. P'ārik'ua mīmaa ichi ángel pēiji.

24 Māgipa mīmaa māgaji: “Pablo, p'eranaapáde aji, ichita pi César k'īrapite wāit'ee perā. Tachi Ak'ōre t'āri pia bairā, ūriji pia chupīria iidida na barcode p'anīrā pari. Mapa maarepida piuda-eda” aji.

25 Maperā k'ōp'āyoorā, k'īsia p'uanáati mia ijāa bairā Tachi Ak'ōrepa jaradak'a uchiat'ee.

26 P'usapa isla bĩmaa tachi jira bat'ak'ooit'eeda aji.

27 Māgá wādapa k'āima catorcemaa tai p'anajida Adriático p'usa jāde. Ma ewate p'ārik'ua esapite barco p'erapataarāpa k'ĩsiajida eujā k'ait'a pa p'ani.

28 Mapa chaajida chi nāpia. Chaadak'āri, juachama veinte baji chi nāpia. Ma waapai waya chaadak'āri, juachama quince baji.

29 Barcode mimiapataarāpa māu ĩri p'ooni p'ananadai jīak'aapa, barco ātauwaare ancla k'ĩmari t'aak'oojida. Maap'eda it'aa t'ĩjida Tachi Ak'ōrepa isapai ewaripimerā.

30 Mamīda k'ĩsia atajida barcodepa jirabododait'ee. Mapa japa jira atajida māik'aapa toidaa bat'at'aajida, seewata k'ĩmaapema ancla toidú bat'arutak'a.

31 Mamīda Pablopa māga k'awaak'āri, māgaji soldaorā poromaa māik'aapa chi soldaorāmaa:

—Jā eperāarā barcode p'aneeda-e pĩrā, parā nāik'aapa chok'ai uchiada-eda aji.

32 Mapa soldaorā japa jīk'ara t'ūt'aajida māik'aapa toidú bat'at'aajida, eperā wēe.

33 Tap'eda pa wāk'āri, Pablopa jaraji nek'odamerā.

—Tomia omé paruta pia nek'oda-ee, k'ĩsia jōnīpa.

34 Mapa nek'óti ma-āri pida, juatau paraadamerā. Mamīda k'ĩsia p'uanáati, apida piuda-e pait'ee perā.

35 Māga jarap'eda, Pablopa pan ichi juade atap'eda, jōmaarā taide Tachi Ak'ōremaa it'aa t'ĩji māik'aapa ma pan t'ook'oop'eda, k'oji.

36 Māpai ma jōma barcode nipadap'edaarāpa māga unudak'āri, auk'a k'ojida.

37 Tai ma barcode wādap'edaarā doscientos setenta y seis paji.

38 Jōmaweda nek'odap'eda, bi jāwaadaidak'āri, barcode atee wādap'edaa trigo toidú bat'ak'oojida barco wēsaatimerā.

Barco t'oop'edarida

39 Ewarik'āri, barco pidaarāpa ma eujā k'awada-e paji mīda, unujida ipu i joobai nībi. Mapa k'īsiajida barco ipude p'oo atadait'ee.

40 Māpai ancla jī bada jōmaweda t'īk'oodap'eda, toida atabaibeejida. Ichiaba chi timón jī nībada ērat'aajida māik'aapa chi vela k'īmaapema bainī bijida. Māpai barco to idee sirria nībeeji.

41 Mamīda barco p'oo nībanaji ipu at'āri p'oo-ee badamāi. Barco k'ī pia p'oo nībeeji ipude, p'oyaa āyaa mimik'a-ee. Māpai chi tru t'odoohook'oodachi p'usapa.

42 Aramata soldaorāpa k'īsiajida presoorā jōma peek'oodait'ee, ipudee mirudaridai jīak'aapa k'ui wādapa.

43 Mamīda āchi poropa māga oopi-e paji, Pablo peepiamaa bada perā. Ma k'āyaara jaraji chi k'ui k'awaa beerā toidú jīchoodamerā, māgá to idee naapiara panadamerā.

44 Jōdee jaraji chi k'ui atua beerā tabla īri maa-e pirā barco pak'uru pite īri wādamerā. Māgá tai jōma pia to ide panajida.

28

Pablo Malta islade

¹ Tai jōma ipude panadak'āri, k'awaajida ma isla t'ijarapata Malta.

² Ariipema eperāarāpa tai pia ak'ijida. K'oi che nībada perā māik'aapa jīsua nībada perā, t'ipitau oro jira bijida. Maap'eda taimaa jarajida t'ipitau ik'aawa k'ara p'ai chedamerā.

³ Pablopa t'ipi jua p'ūasaa p'e atap'eda, t'ipitau de oromaa baji. Māga nide t'ipi wāsiapa taama uchi-adaip'eda, Pablo juade k'aa jira ba cheji.

⁴ Māga unudak'āri, ma islade pema eperāarāpa āchi pitapai māgajida:

—¿Na eperā chīara peepari-ek'ā? ajida. P'usa jādepa uchijai mīda, tachi eperāarāpa oopata ak'iparipa chok'ai bapi-e pajida ajida.

Māga jarajida Pablo piudariit'ee jīak'aapa.

⁵ Mamīda Pablopa taama t'ipitau de jīap'et'aaji māik'aapa k'āiwee beeji.

⁶ Jōmaarāpa ni jōnapachida sāapaita Pablo jua oorodarii maa-e pirā piudarii. Mamīda maarep-ida māga p'asa-e pak'āri, k'īsia awara k'īsiadachida. Jarajida Pablo ak'ōre waibiak'a.

⁷ Tai p'anadap'edaa k'ait'a baji ma isladepe-maarā poro waibia eujā. Māgí poro waibia t'ijarapachida Publio. Māgípa tai pia ak'iji ichi tede k'āima ōpee.

⁸ Tai mama p'anide Publio ak'ōre k'ayaa baji k'iampiapa māik'aapa amipa. Mapa Pablopa ak'inak'āri, it'aa t'iji māik'aapa ichi jua biji ma k'ayaa bada ĩri. Māgá jipa beeji.

⁹ Māga k'awaadak'āri, ma islade pemaarāpa āchi k'ayaa beerā p'e ateejida māik'aapa Pablopa jōma jipak'ooji.

¹⁰ Māgá jipa p'aneedap'edaa perā, māpema eperāarāpa tai pia ak'ijida māik'aapa ne-inaa tee chejida tai-it'ee. Ichiaba mamāik'aapa barcode uchiadak'āri, net'aa jōmaata taimaa teejida ateedamerā.

Pablo Romade panada

¹¹ Atane ōpee ma islade p'anadap'eda, bataujida barco p'usa t'ojara wāyaapimaa badade. Māgí barco Alejandria p'uurudepema paji. Ma barco k'īmaa baji santok'a, Romadepemaarā ak'ōre waibiarā Cástor māik'aapa Pólux apatap'edaa.

¹² Ma barcode wājida Siracusa p'uurudee. Mama k'āima ōpee p'aneejida.

¹³ Ma p'uurudeepa wājida to i k'ait'a. Mata wi-ibainajida Regio p'uurude. Ai norema tai āp'iteik'a eereepa nāu p'ua nībeeji. Mapa ma norema wi-ibainajida Pozzuoli p'uurude.

¹⁴ Mama unujida ijāapataarā. Māirāpa tai āchi temaa ateejida p'anade tomia aba. Maap'eda, wājida Romadee.

¹⁵ Romadepema ijāapataarāpa k'awa p'anajida tai wā nidá. Mapa tai k'īrachuu chejida Romadeepa, ūk'uru Foro de Apio apatap'edaamāi, jōdee ūk'uru Tres Tabernas apatap'edaamāi. Pablopa āchi unuk'āri, Tachi Ak'ōremaa it'aa t'īp'eda, o-īadachi.

¹⁶ Roma p'uurude panadak'āri, Pablo te jīp'aade bijida jīapari abaa ome.

Pablo judiorã ome Romade unuda

¹⁷ Mama panadap'eda, k'ãima õpeemaa Pablopa Roma p'uurudepema judiorã poroorã t'ĩ p'eji. Jõma pachedak'ãri, mãgaji:

—Michi auk'aarã, maarepida mia ne-inaa k'achia oo-e bida aji, judiorã k'ĩraupiit'ee maa-e pirã tachi chonaarãpa oodap'edaak'a oo amaadamerã. Mamida Jerusalende mi jita atadap'eda, Romadepemaarã juade bijida.

¹⁸ Romadepemaarãpa mimaa iididak'ãri k'ãare k'achiata oo bi, k'ena pëidait'ee paji, maarepida k'achia oo-e pada perã mi peedait'ee.

¹⁹ Mamida judiorãpa k'iniada-e paji mi uchia pëidamerã. Mapa mia chupiria iidiji Cesarpa mi nepira ak'imerã. Mãga ooji michi auk'aarã ãpите jarai wëe bi mida.

²⁰ İrá parã t'ĩ pëiji jara k'inia bairã mi nãgá cadenapa jĩ nĩbi, tachi Israel pidaarãpa ijãa p'ani k'aurepa.

²¹ Mãpai ma judiorãpa p'anaujida:

—Taipa k'art'a p'ãda apida waide jitada-e p'anida ajida, Judea pidaarãpa tee pëidap'edaa. Ichiaba araapa pache p'anadap'edaarãpa pi ãpите maarepida k'achia jarada-e p'ani.

²² Mamida taipa k'awa k'inia p'anida ajida, pia k'ĩsia bi, k'awa p'anadairã jõmaarãpa pedee k'achia jara p'ani pichi eere p'anirã ãpите.

²³ Mãpai ewari aba bijida Pablo pedee ũridait'ee. Ma ewate pak'ãri, eperãarã cheepurujida Pablo badamãi. Tap'eda weda k'ewara parumaa Pablopa jarateëji Tachi Ak'õrepa jarapidak'a, k'awaadamerã sãga Tachi Ak'õredeerã p'aneedai.

Jarateeji k'aita Jesús, Moisepa p'ãdadeepa m̃aik'aapa Tachi Ak'õre pedee jarapataarãpa p'ãdap'edaadeepa.

²⁴ Mãga ùridak'ãri, ùk'uruurãpa ijãajida Pablopa jarateeda Jesude. Mamĩda ùk'uru ijãada-e paji.

²⁵ Æchi pitapai k'ĩsia auk'a p'anada-e paji. Mãpai erreudait'ee pak'ãri, Pablopa mãgaji:

—Wãarata jarajida aji, Tachi Ak'õre Jaurepa ichi pedee jarapari Isaías it'aideepa parã chonaarãmaa jarak'ãri:

²⁶ 'Jã eperãarãmaa jaranapáde aji: Parãpa ùridait'ee mi pedee. Mamĩda k'awada-e pait'ee k'ãata jara k'inia bi. Mia oo bi unudai mĩda, k'awada-e pait'ee.

²⁷ Na eperãarã k'ĩri k'isua p'anadairã, pia ùridak'aa. Ma awara tau p'ãrajĩ pik'a jẽra bi ununaadamerã; k'ĩri jida t'ap'a pik'a jẽra bi ùrinaadamerã. Maperãpi mĩmaa chedak'aa, mia Æchi t'ãri pia p'anapimerã m̃aik'aapa Æchi o k'achiadeepa k'aripa atamerã. (*Is 6.9-10*)

²⁸ Mãpai Pablopa mãgaji:

—Idi wãara uchijida aji, ma et'ewa jarada, parãpa ijãa k'iniada-e p'anadairã Ak'õrepa mĩmaa jarapida. K'awáati Tachi Ak'õrepa it'aa wãpiit'ee judio-eerã, Ærapa parã k'ãyaara ùridait'ee perã Tachi Ak'õrepa jara p̃ei bi.

²⁹ [Pablopa mãga jarap'eda, judiorã uchijida. Aupedee erreu wãjida Æchi pitapai.]

³⁰ Pablo año omé beejí Romade, te alquilaa ata badade. Mama bide irumaa p'asianarutaarã jõmaweda auteebaipachi.

³¹ Jarateepachi Tachi Ak'õrepa jara p̃eida ijãadamerã Tachi Waibia Jesucristode, mãgá

it'aa wãdait'ee. Maapai apidaapa irumaa
jarateenaapáde ada-e paji.

Tachi ak'õre pedee
New Testament in Epena (CO:sja:Epena)

copyright © 2005 Wycliffe Bible Translators, Inc.

Language: Epena

Translation by: Wycliffe Bible Translators, Inc.

Epena

sja

Colombia

Copyright Information

© 2005, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Epena

© 2005, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-23

PDF generated using Haiola and XeLaTeX on 18 Apr 2025 from source files dated 29 Jan 2022

1e08d4cb-71aa-5440-b08f-b522fabb6441